

# PROBLEMATA 2.

EX OMNIBVS PROPE SCIENTIIS  
SVMPA,

QVAE A FRANCISCO PONTIO  
PATRITIO VENETO  
ALOISII F.

PATAVII, AC VENETIIS  
PVBLICE DISPVTANDA  
PROPONVTVR.



VENETIIS,  
EX OFFICINA VALGRISIANA.  
M D LIX.

# ATAMENHO

THE FIRST PART OF THE HISTORY OF THE

INDIANS OF THE NORTH AMERICAN CONTINENT

BY JAMES OGDEN

1791

THE SECOND PART OF THE HISTORY OF THE

INDIANS OF THE NORTH AMERICAN CONTINENT

BY JAMES OGDEN



THE HISTORY OF THE INDIANS OF THE NORTH AMERICAN CONTINENT  
BY JAMES OGDEN  
1791

# LAVRENTIO PRIOLO

REIPVB. VENETORVM

PRINCIPI SERENISSIMO,

ATQVE ILLVSTRISSIMO.

FRANCISCVS PONTIVS S. P. D.



ETVS est consuetudo, Princeps illustrissime, quæ cum multos abhinc annos initium nacta sit, ad hanc vsque diem, grauissimorum hominum vsu confirmata est; vt, cum quispiam philosophiæ, ac bonarum artium disciplinis diu operam dederit, & in iis quosdam se iam progressus fecisse existimauerit: is in celebri aliqua urbe problemata nonnulla in publicum proponat; quæ dum tueatur, peritiæ suæ periculum omnino faciat. A qua nullo pacto mihi recedendum esse visum est. neq; tam eam certe ob causam, quoniam sex ijs annis, quibus Patauij studiorum gratia vitam quiete dego, multum iam me profecisse putem: quàm ne, aut ipse memetipsum contempsisse, aut præclarum hoc institutum neglexisse iudicaretur. Cum primum autem id animo meo decretum, atque statutum fuit: illud mihi in mentem venit, non de-

futuros mihi permultos obtreſtatorum morſus.  
Siquidem multi ſunt homines, quibus hæc diſpu-  
tandi ratio nequaquam probari poteſt. totam  
nanque tenuem, atque puerilem eſſe dicunt,  
pompæ potius, quam pugnæ accommodatam,  
qua Sophiſtarum forſan reſellantur ineptiæ; ſed  
nihil ſolidi, ac certi omnino ſtabiliatur. Alij autem  
reperiuntur, qui inani tantum uocum ſonitu ob-  
lectentur: nitidum, inquam, ac purum elegansq;  
dicendi genus ament, id ſuſcipiant, reliqua au-  
tem omnia deſpiciant. Non deerunt etiam, ut  
opinor, qui me arrogantia inſimulabunt: quippe  
quod de abditis, reconditisque rebus, id autem  
eſt, de ſacræ philoſophiæ arcanis, deque altiſſi-  
mis omnium ſcientiarum dogmatibus; in cele-  
berrimis Venetiarum & Patauij vrbibus, inque  
ampliſſimo eruditiſſimorum hominum cœtu, diſ-  
putationem proponere non dubitauerim. Cum  
igitur hæc animo agitare, nequaquam illis mi-  
hi reſpondendum eſſe duxi, qui uel ſola eloquen-  
tiæ ſpecie decepti, uel maximæ rei uim non agno-  
ſcentes, in hunc diſputandi uſum, & grauiores  
maioresque diſciplinæ quodam quaſi impetu fe-  
runtur. hoc nanque crimen, ſi ullo tamen mo-  
do cri men dicendum eſt, communem ihi eſt,  
cum clariſſimis multarum ætatum uiris, philoſo-  
phisque nobiliſſimis: cum quibus malo equidem  
vehementer



vehementer uituperari, quam unâ cum iis meis  
vituperatoribus uel non mediocribus laudibus  
ornari. Verum illud mihi molestius accidit, quod  
id oneris uiribus meis omnino graue, iuuenili  
hac ætate susceperim. quæ quidem in re multis  
vrgeor difficultatibus. si namque illi me parem  
dico, impudentis penè, & nimium saltem mihi  
ipsi blandientis; si imparem fateor, imprudentis,  
& temere res arduas subeuntis notam effugere  
non possum. Quid itaque faciendum? conque-  
rar ne? cum assiduam hanc meorum laborum, ac  
multarum vigiliarum curam in id discriminis ad-  
ductam uideam; ut inde mihi dedecoris non me-  
diocre periculum immineat; unde non parum cer-  
te laudis me consecuturum sperabam: uel mise-  
ram potius calamitosorum horum temporum cō-  
ditionem doleam? quibus nihil tam omnino pium  
ostendi potest, nihil tam fructuosum, nihil tam  
firmum, quin quorundam hominum maleuolen-  
tia atque liuore dilaceretur; atque, si fieri potest,  
deleatur. Verum enimvero cum diutius mecum  
cogitarem, & cogitando animaduernerem, vo-  
luntatem vel solam in rebus maximis plurimum  
laudis acquirere; atque in iis exercitationibus,  
quæ literarum sunt, illud accidere, ut qui uictus  
est, plurimum lucri plerunque faciat, cum do-  
ctior inde recedat: ob id haud ueritus sum, tametsi  
iuuenis

iuuenis penè rudis , ac meæ imbecillitatis con-  
fcius sum, in hanc aciem uenire, hæc omnia pro-  
ponere, summosque uiros prouocare . Quod te  
auspice, Princeps illustrissime, tuoque quasi nu-  
mine afflatus in primis ausus sum . te nanq; , quæ  
tua est incredibilis humanitas, summa cum sapien-  
tia iuncta , egregiaque erga parentem meum,  
meosque omnes tua uoluntas, nunquam mihi de-  
futurum puto . NICOLAVS etiam optimus pa-  
truus, qui, te iubente, hoc tempore PATAVII  
PRAETOR est, quique in Rep. administranda sem-  
per tecum maxime coniunctus fuit, ut me semper  
ad aliquod edendum ingenij specimen hortatus  
est : ita in tanta rerum difficultate, nunquam cer-  
te me deserturus est . Locus autem is exposcere  
uidetur , ut de te, tuisque laudibus aliquid dicam:  
quod libentissime equidem facerem . quid enim  
mihi gratius accidere posset, quam uirum princi-  
pem, atque Venetiarum Principem, & LAUREN-  
TIVM PRIOLVM ad cælum extollere ? cuius ex-  
cellsa uirtute, altoque animo factum est, ut inter  
se quæ maxime dissidere, semper uisa sunt, egre-  
gie confociata sint . ea autem sunt, non tam agen-  
di ratio, cum contemplandi ui, quam summa sa-  
pientia, cum summa potestate . difficile nanque  
habitum fuit, ut qui in rebus uersaretur agendis,  
is cognitioni, atque contemplationi operam na-  
uare

uare posset: multo autem difficilius semper iudicatum, ut, qui rerum omnium affluentia, summis copijs, opibus, nobilitate, amicis abundaret, & in altissimo rerum culmine collocatus, is eam moderationem adhiberet, qua in sui admirationem omnes homines traheret. hoc abs te factum, hoc admirabile, hoc incredibile omnino esse statuo. Sed quo iam progredior? epistolam ad te scribo, tuum auxilium imploro, non autem laudationem conscribo. Complectere igitur Princeps optime, atque amplissime, quem tibi addictum, tibi deuinctum, penitusque uides tuum, tuoque nutu, tuaque auctoritate, quod facile potes, me, atque mea omnia tuere. Data Patauij III. nonas Maij. M D LIX.

# PROBLEMATATA

LOGICA.

pag. 1

MATHEMATICA. 15

Ex {	Geometria.	17
	Stereometria.	22
	Perspectiva.	24
	Mechanica.	26
	Arithmetica.	29
	Algorismo.	32
	Musica.	34
	Astronomia.	37

NATURALIA.

Ex Lib. {	de Physico auditu.	39
	de Calo & Mundo.	53
	de Generatione, & Corru-	
	ptione.	62
	Meteororum.	69
	quarto Meteorologicorum.	86
	de Anima & parvis na-	
	turalib.	93


METAPHYSICA. 121.

MORALIA.

Ex {	Ethicis.	126
	Oeconomicis.	143
	Politicis.	149



# Problemata logica.



**H**OMO in medio mundi, quasi in mundana scena spectator, corruptibilis, & æternæ naturæ vinculum, in ipso, & per ipsum cuncta perspicuens, & quæ vult intelligit, & quam vitam appetit, consequitur.

2. **N**ON est autem illi se ipso quicquam proximus; & ob id si in sui cognitionem se conuerterit, in se, tanquam in paruo mundo, rerum omnium formas, ex diuini intellectus lumine illustratas conspiciet; iureq; totius mundi miraculum, iuxta Trismegistum, nuncupabitur.

3. **V**ERVM, quia ab eius ortu, ea humiditate replentur eius sensoria, (quod ex animarum per flumen lethæum transmigratione innuerunt Platonicæ) qua male affectis organis, interiores menti deferuientes facultates obumbrantur: ideo ante omnia exercitio quodam excitandus est homo, ne veluti ebrius, & amens inanem vitam traducat.

4. **E**XERCETVR vero mirum in modum, si ante cæteras disciplinas facultati logicæ operam nauauerit. hæc enim fallaciam discursus corrigit, hominemque ad maiores disciplinas conducit. ex cuius defectu antiquos philosophantes in quâplurimos incidisse errores, testatus est cõmentator.

- 5 INCIPIT logica à prædicamentorum libello. isagogicus enim liber Porphyrij, logices pars non est. quorum prædicamentorum subiectum non sunt voces, vt opinati sunt Burleus, & Simplicius: non sunt conceptus, vt Scotus, & Parisienses: non sunt omnia mundi entia, ut Eustratius; sed secundæ intentiones: quanuis nihil prohibet nullum in illis subiectum esse, iuxta Alexandrum.
- 6 HORVM prædicamentorum natura uniuoca est: uniuoca illa dicuntur, quorum nomen commune est, & secundum illud nomen ratio substantiæ: quam definitionem æquiuiocis posse conuenire, pro uirili tuebor.
- 7 PRAEDICAMENTA, licet ex omnium Peripateticorum sententia denario numero constituantur: ad unum tamen redigi posse existimo, simulq; ad tria. ualeat autem Scotus, & Auicenna, qui ad pauca respicientes, hac in re, Peripateticorum principem accusare sunt ausi.
- 8 HORVM autem primum substantiam esse cuncti afferunt: ego uero, quanuis substantiam, inter cætera mundi entia principem locum obtinere crediderim: cum Auerroe tamen nouam in medium afferre opinionem haud uerebor; nempe ad relationem, tanquã ad commune, & uniuocum genus, prædicamenta esse omnia reducenda.
- 9 SUBSTANTIA, de qua, crassa quadam Minerua,

in iis libris egit Aristoteles, sub se diuinas mentes non continet. Deum enim, & diuinas mentes in aliquo reperiri prædicamento, Platonis & Aristotelis philosophia non admittit.

10. CIVIS prædicamenti differentias tum in substantiarum numerū esse redigendas, tum a substantiarum consortio secludendas defendo; quod etiam animaduertunt Scotistæ.
11. CAETERVM substantię proprietates, tametsi uulgo affertur illa, quod eadem numero subsistens contraria suscipiat: ego tamen, pace omnium philosophorum, (cum nemini philosophandi uia sit interclusa) nullam ab Aristotele de quarta specie proprietatem allatam fuisse sustineo.
12. HANC naturę ordine quantitas insequitur: quæ ad numerum, & ad magnitudinem uniuoca est; licet secus Auerrois cęsuerit. de quibus quantitatis speciebus uberius suo loco, ubi mathematica problemata subiungemus.
13. NUMERVS quanuis de eorum genere, quę positione carent, ponatur ab Aristotele: eius tamen dogmati non aduersatur, quin oppositam partem tueri possimus; quod etiam admittunt Mathematici, concedentes dari numeros lineales, superficiales, & cubos.
14. NEQVIT autem quantitas tum magis & minus, tum contrarietatem suscipere: tametsi hæc omnia
- A 2
- accuratius



accuratius perscrutanti non absurda in Peripatetica doctrina uidebuntur.

- 15 VTRVM uero Aristotelis argumentum procedat, quo in quantitate contrarietatem non reperiri demonstrauit, (essent enim contraria, ut inquit ille, in eodē, sursum nempe & deorsum) Scoti auctore, utranque opinionem sustineo.
- 16 QVÆ quidem contraria, sursum scilicet & deorsum, tum non esse contraria dicendum est, si quis hic Aristotelem perspexerit, tum uere esse contraria, si quis eiusdem libros de cœlo perpendarit.
- 17 VTRVM uero relationis categoria quantitatem proxime sequatur, utrinq; probabiles adsunt rationes, ex quibus utranque opinionem tuendam suscipimus. cuius quidem relationis definitionem assignare nemo potest:
- 18 QVAM non de genere eorum esse dicimus, quæ entia sunt rationis, ut inquit huius dogmatis princeps Gulielmus Ocham: sed de eorum numero tum quæ sunt in anima, tum quæ sunt extra animam, ut perbelle Scotus, & Thomas opinati fuerunt: hinc relationem uniuocum non esse prædicamentum elicimus.
- 19 HABENT relatiua hanc naturam, ut se inuicē respicientia se inuicē quoq; definiant; unoq; de pto tollatur alterum, & per oē genus entis reperiatur:

Quæ



- 20 **Q**UAE si recte assignabuntur, necessario cōuer-  
tentur. argumentum autem Aristotelis de circuli  
quadratura, quæ scibilis, & nondum scita est, ni-  
hil inferre contenderem, nisi arrogantiae crimen  
extimescerem.
- 21 **S**USCIPIVNT autem magis & minus, si Scoti &  
Simplicij doctrinam sectemur; quanvis a summa  
Dei potestate, quod relatio primo & per se inten-  
sionem suscipiat, fieri non possit.
- 22 **N**EQVE solum ad diuersorum fundamentorum  
multiplicationem relationes multiplicantur, sed  
ad unius etiam, & aduersus multa correlatiua ha-  
bitudinem, augentur: & ideo contra Thomam  
pro Scoto tuemur, patrem decem habentem fi-  
lios decem quoque paternitates habere.
- 23 **Q**UALITAS uero, quæ cunctis accidentibus di-  
gnitate pollet, quatuor habet inferiores species:  
quarum & primam præcedere quartam, ut Sim-  
plicius & Ammonius: & quartam antecedere pri-  
mam, cum Scoto defendo.
- 24 **P**ORRO passio, & passibilis qualitas, qua distin-  
ctione ab habitu & dispositione differant, ma-  
gnam litem Alexander, Porphyrius, Simplicius,  
& Thomas inter se faciunt: sed opinionem Ale-  
xandri sequor, & sustineo.
- 25 **V**ERVM enimvero, quia Aristoteles in prædi-  
camentorum tractatu nonnullarum uocum satis  
difficilium

difficilium mentionem fecerat : ideo ad earum expositionem postpredicamentorum locum subiunxit; in quo dum de quadruplici oppositorum genere pertractat, maxime opponi cōtradictoria existimamus, licet Scotus hac in re secus senserit.

26 A PRIVATIONE ad habitum, licet communis philosophantium uia regressum dari non admittat; ueritatis tamē gratia regressum dari defendo.

27 HVIVSMODI porrò categoriis humanus intellectus diuidens atque componens, diuerfos ueritatis & falsitatis conceptus fabricat, quos interpretatur uox, haud secus atque uocem interpretantur literæ.

28 DIVIDITVR uox in nomē & uerbum, tanquam in ueras species; quibus id est commune, ut ambæ significatiuæ, sint ad placitum, & earum partes a toto separatae, totius natura dissoluta, nihil significant.

29 QVANVIS ex Platonis in Philebo argumentis adducti, uocem unicuique natura insitam esse tueri possimus: non ob id tamen accusandus est Aristoteles, qui uocem inter ea, quæ sunt ad placitum, collocauit.

30 NOMINIS illud proprium est, ut ex negationis additione infinitatem suscipiat; quod & uerbo conuenire arbitror, licet omnes refragentur interpretes.

Nobilissima

- 31 NOBILISSIMA orationis species, qua Philosophi utuntur, enunciatio est, quæ est alicuius de aliquo, uel alicuius ab aliquo.
- 32 HÆC in categoricam, & hypotheticam distinguitur: categorica quantitatem suscipiens, particularis & uniuersalis euadit; ratione cuius uniuersalitatis & particularitatis cōtraria, subcontraria, & subalterna nuncupatur.
- 33 HYPOTHETICA triplex est, uidelicet condicionalis, quæ, si oppositum consequentis repugnat antecedenti, uera est; si non repugnat, falsa: disiunctiua, quæ ad eius ueritatem, unicam saltem propositionem ueram requirit: coniunctiua, quæ omnium propositionum ueritatem postulat.
- 34 VERVM quia enūciationes aliquando nos latēt, ideo instrumētum nobis natura comparatum est, quo ex notis ad ignota procedimus; id autem est syllogismus:
- 35 QVI licet ex communi Peripateticorum consensu subiectum in libris priorum collocetur: ego tamen demonstrationem, quæ nobilissima est syllogismi species, unā cum syllogismo subiectum esse in libris priorum defendo.
- 36 QVI liber non ea sanè ratione priorum resolutionum liber dicendus est (ut Græci autumant) quia de genere agat; posteriorum uero, quod de specie: sed duplici existente resolutione, ut inquit



quit Themistius; hac quidem priori, illa uero posteriori; de priori in iis, qui de syllogismo, de posteriori in iis, qui de demonstratione, pertractauit Aristoteles.

37 **FALSO** uero philosophati sunt (ni fallor) recentiorum complures; qui una Auerrois auctoritate adducti, in prioribus analyticis Aristotelē de forma, in posterioribus de materia demonstrationis egisse defendunt: cum res cōtrario se habeat modo. in priori enim de materia, in posteriori uero de iis quæ ad formam spectant, differuit Aristoteles.

38 **SYLLOGISMVS** ratio est, in qua quibusdam positis & concessis, aliud necessario sequitur per ea quæ posita sunt; qui in tres resoluitur terminos, extremos duos, medium alterum; ex cuius uaria positione uariæ oriuntur figuræ:

39 **INTER** has illā, quæ secunda dicitur, ex duabus posse affirmatiuis concludere arbitramur; quin immo nulla, hac uia relicta præternaturales predicationes subterfugere possemus, ut perbelle inquit Auerrois.

40 **PRAETER** hanc autem arguendi rationem est inductio, enthymema, & exemplum: enthymema truncatus est syllogismus; sicut exemplum diminuta est inductio.

41 **QVAE** quidem inductio non ab eadem animæ facultate



facultate proficiscitur, ut Latinorum fuit opinio; sed a subordinatis facultatibus, cogitatiua nempe, & intellectu, ut optime arbitratus est Themistius.

42 Cuius inductionis duæ sunt species: physica, quæ ex unius singularis enumeratione concludit; & oratoria, quæ multorum singularium testimonio comprobatur.

43 SYLLOGISMI uero nobilissima species, de qua in libro posteriorum pertractauit Aristoteles, est Demonstratio: cuius tractatum topicorum libro minime præmittendum esse arbitror, ut plures sensisse uidentur; neque contra, librum topicorū libro de demonstratione, ut Auicenna uoluit; aut librum Elenchorum, ut Paulus Venetus: cum nulla inter illos essentialis ordinis existat ratio.

44 Huius demonstrationis tres sunt species, ut optime hac in re philosophatus est Auerrois, demonstratio simpliciter, propter quid, & quia: quæ quidem (parcant mihi Auicenna & Albertus) non solum accidentali differentia distinguuntur, sed essentiali.

45 Est autem demonstratio scientialis syllogismus, quo perfecte scire rem unāquāq; possumus per causam, & quod illius rei sit causa, & quod aliter res ipsa se habere non possit; hanc autem semper efficientem esse ex Auerrois sententia sustineo.

46 FIT uero demonstratio a notioribus natura, quanuis a notioribus nobis confici possit: contingit enim nonnunquam, teste Alexandro, quod eadem sint nota nobis, & natura.

47 MEDIVS terminus in demonstratione simpliciter, passionis est definitio, cuius causam per se inquit demonstrator. si uero interna sit de subiecto passio demonstranda: præter passionis definitionem est quoque subiecti definitio, non ea tamen ratione, qua Albertus & Egidius credidere.

48 AVICENNA uero a ueritate dissentit, qui mediij termini demonstrationis illud proprium esse arbitratus fuit, quod is causa esset inexistenti maioris in minori extremo: hoc enim commune est unicuique syllogismo.

49 CONSTAT demonstratio ex principiis, ex quorum notitia conclusio innotescit; quare notiora conclusione principia dicenda sunt. propter quod enim unumquodq; tale, & illud magis. quod axioma in unoquoque genere causæ ueritatem habere, aduersum Thomam; ueramq; dignitatem esse, contra Pomponatium defendo.

50 QUAE principia licet sint sua luce manifestissima, quale illud, De quolibet dicitur affirmare, uel negare: superiora tamen alia requirunt principia, ex quibus, teste Auerroe, confirmantur.

51 SUNT quoque necessaria: de contingentibus enim

enim per accidens est scientia : uere autem necessaria non essent, nisi & per se, & secundum quod ipsum essent.

- 52 **P**ER se modi sunt quatuor, pluribus tamen refertur gradibus : inter quos connumerandus non est is, (pace Latinorum dicam) in quo de se ipso idem dicitur.
- 53 **S**I subiectum a prædicato definiatur, primus est modus : si a subiecto prædicatum, secundus ; qui in mediatam semper degenerat propositionem.
- 54 **Q**UI uero inter hos modos demonstrationi cōducant, primi duo non tantum sunt ; sed & quartus, ut Thomas optime opinatus fuit, Auerrois autem fuit ambiguus.
- 55 **N**OBILISSIMAE demonstrationi nobilissima figura, præstantissimusq; modus adiudicatur. hæc autem prima figura, primusq; modus est.
- 56 **C**UM igitur ex principiis necessariis per se, secundum quod ipsum, notioribus, & prioribus, in prima figura, primoque modo syllogizabimus : demonstrationem nos confecisse arbitrandū est.
- 57 **Q**UOD si passionem a subiecto remouere uouerimus : secunda figura nobis opus erit, ut si a pariete respirationem. in quo exemplo animaduertere oportet, Græcos, Latinos, & Arabas expositores, ni fallor, a ueritate defecisse, arbitran-  
tes hanc propositionem esse ex immediatis, Ani-



malia respirant, quoniam pulmonem habent; quandoquidem alia sit proximior causa.

58 NEQVIT autem demonstratio simpliciter terminos semper habere conuertibiles, ut optime Auerrois, & Linconiensis opinati fuere:

59 CONTINGITQVE sæpenumero, si Auerroi fides adhibenda est, ( id quod multis forte uidebitur paradoxum ) demonstrationem simpliciter euadere in syllogismum topicum, definitionemq; numeris omnibus absolutâ fieri descriptionem.

60 RESOLVITVR demonstratio in principia, passionēs, & subiectum: principiorū quædam complexa, quædam incomplexa sunt: quorum aliqua sunt cognoscendi; aliqua cognoscendi, & essendi. qua in re deceptus Gandauensis, ansam errandi cæteris præbuit. addit enim principia quæ tantum sint essendi: huiusmodi autem nulla reperiuntur.

61 COMPLEXORVM principiorum quædam communissima sunt, quæ in uirtute omnibus demonstrationibus inferuiunt; quædam communia; nonnulla particularia, & propria. ex quibus cum demonstrationes construuntur, quod uera sint præsupponit artifex, ne principiorum sint principia.

62 DE passionibus præcognouisse sat est, quid significant; de subiecto autem, & quod, & quia. fit  
enim



enim omnis demonstratio & disciplina ex præexistenti cognitione.

63 IN cuius propositionis explanatione deceptus est Auërrois, qui mechanicas artes ab illa distinguit; subtilissime uero Theophrastus, qui doctrinam omnem intellectus possibilis ex præexistenti cognitione intellectus agentis fieri interpretatus est.

64 ET quanuis communis philosophantium schola cum Auerroe cognitionem definitiuam sub illa propositione contineri negauerit: ego tamen Alpharabij opinionem defendens hanc sub illa propositione locum habere sustineo, & in hanc uenisse opinionem Simplicium, & Alexandrum, ne dicam quoq; ipsum Auerroem.

65 INTER principiorum species primo loco Dignitates collocandæ sunt, quæ uix uerbis, nedum mente negari possunt: Suppositiones hanc maxime naturam sapiunt, cum syllogizari tantum possint: Petitiones uero maxime distant; demonstrantur enim quando fert necessitas, licet illas sibi dari petat demonstrator.

66 SVBIECTVM, a quo distinguuntur scientiæ, & unitatem habent scientiæ, formalis est ratio considerandi, quæ uniuscuiusq; scientifici propria est; & iccirco migrare de genere in genus omnino nequeunt scientiæ:

- 67 **S**i tamen symboleitatem habebunt, tresque illas conditiones ab Aristotele enumeratas, id temporis quisq; suo arbitratu migrare poterit.
- 68 **E**st autem subiectum in scientia notum ita, ut nulla indigeat demonstratione; licet aliter hac in re opinatus fuerit Scotus: potest tamen aliquando demonstrari, si Philoponi doctrinā sectemur.
- 69 **P**RAETER demonstrationem simpliciter, utuntur scientiæ tum demonstratione quia, tum demonstratione propter quid. procedit demonstratio quia ex effectibus in causam, demonstratio propter quid ex causis in effectus.
- 70 **E**x iis colligimus dari regressum in quacunque scientia, licet aliter Vgo Senensis opinatus fuerit. impossibilis est autem circulus.
- 71 **N**ON est autem regressus iste ponendus ex intellectu negotiatione, ut Sueffanus, & plerique philosophantes crediderunt; sed simplici existēte discursu effectus ad causam, & causæ ad effectum.
- 72 **P**ORRO alterum sciendi genus est definitio, quā ingredi demonstrationem asseruimus; ex qua substantia haud secus ac ex demonstratione accidentia nobis innotescunt:
- 73 **Q**UAE simpliciter & per se in substantiis reperitur; secundum quid autem in accidentibus: eorum enim esse cum a substantia dependeat, per substantiam definiri debet.

Constat

74 **CONSTAT** autem definitio tum ex forma, tum ex materia. quod autem uere definitur, ex Auerrois & Aristotelis sententia, est forma.

75 **UTRUM** autem definitio sit conceptuum, aut particularium rerum, communis philosophorum opinio, tantum esse definitionem uniuersalium arbitratur: ego cum Eustratio incomplete uniuersalium; perfecte autem tum uniuersalium, tum particularium esse defendo.

76 **DEFINITIONIS** species duæ sunt: altera, formalis: altera, materialis. prior est principium demonstrationis: posterior uero est conclusio. illa enim quæ per formam, lucidior est, quàm illa, quæ per materiam. ex ambabus autem fit definitio solo situ differens a demonstratione.

## Problemata Mathematica.

I



**INTER** scientias speculatiuas primas tenent disciplinæ mathematicæ. quarum subiectum neq; omnino materiæ coniunctum est fluens, & uariabile, quale est physicum; neq; penitus a materia & sensibus seiunctum, cuiusmodi est metaphysicum; sed partim materiale, partim abstractum: uersatur enim mathematicus, teste Proclo, circa quantum phantasiatum.

Huiusmodi

- 2 Huiusmodi autem subiectum neque ab arithmetico, neque à geometra consideratur, sed à communi quodam artifice, ut optime arbitratus est idem Proclus: est enim quantitas ens uniuersum, licet Auerrois aliter senserit.
- 3 INTER passionem, huius artificis tantum inter est proportionem, & proportionalitatem considerare. quare si quis per multiplicatam, quatuor proportionales numeros, uel lineas demonstrare uoluerit, errorem dicendi per se committer.
- 4 IN mathematicis scientiis potissimæ illæ numeris omnibus absolutæ demonstrationes expectendæ non sunt: hæ enim uel nullæ, uel admodum raræ. quod ob id contingere non asseruerim, quod per plura media &que immediata unica possit deduci conclusio; cuius opinionis quidam recentiores fuerunt: sed quoniam tum ueræ definitiones nos latent aliquando, tum quia sæpissime mathematicus pro dignitatibus petitionibus utitur.
- 5 INTER quas dignitates, illam nempe, inter maius & minus dari æquale, modo ueram esse defendam, modo falsam.
- 6 PROPTER quid autem certissimæ sint ipsæ mathematicæ, quinimmo in primo, ut inquit Auerrois, certitudinis gradu: hoc non ad ipsum subiectum, quod medium inter abstractum & sensibile sit, referendū est, ut Proclus, & sequaces sunt arbitrati;



arbitrati; sed ad ipsas dignitates, & principia, a quibus certitudo conclusionis immediate dependet.

- 7 **O**B id, qui in mathematicis nullum esse bonum autumant, a veritatis scopo aberrant; cum certissimæ & nobilissimæ sint scientiæ, quæ pluribus præclaris artibus opem ferunt, quanvis temporum iniuria satis destitutæ sint.
- 8 **N**AQVIT autem mathematicus, licet fine suo frustretur, per bonum, seu finem, quidpiam concludere: caret enim operatione quantitas. Hinc nulla indigent experientia, qui mathematicis scientiis incumbunt. æque enim puer, ut senex, ex Aristotelis sententia, ad has percipiendas idoneus est auditor.

## Ex Geometria.

- 1 **S**ED iam ad particulariores mathematicas scientias nostra se cōuertat oratio: iuxta enim duas quantitatis species, duæ quoque haud spernendæ scientiæ emanarunt; quippe quæ inter mathematicas scientias principem locum obtineant:
- 2 **V**ERSATVR enim Geometria circa magnitudinem, quatenus alteri æqualis, uel inæqualis dicitur. ad quam considerationem diriguntur inscriptiones, descriptiones, & circumscriptiones figurarum

rarum, quas geometra contruere, seu delincare  
docent.

- 3 SPECIES quantitatis continuæ tres sunt, linea, superficies, & corpus. in quibus si quis punctum fluentem causare lineam, seu lineam fluentem efficere superficiem crediderit: allucinabitur.
- 4 DEFINIUNT Geometra lineam, quod longitudo sit sine latitudine; superficiem, quod longitudo sit cum latitudine. in quibus definitionibus breuitati nimium studentes, naturam definitorum non sunt consecuti.
- 5 CONCINNIVS uero ex Aristotelis sententia has dimensiones quispiam definiet, quod linea sit longitudo simpliciter diuisibilis; superficies bifariam, corpus trifariam diuisibile. præter quas dimensiones nulla potest excogitari alia.
- 6 LINEAM uero & superficiem si quis in rectam & curuam distinxerit: non ut in species eiusdem prædicamenti; sed ut in qualitates oppositas. has distinctas fuisse arbitrabitur.
- 7 EADEM quoq; ratione ab Euclide superficies in circularem & triangularem diuisa, tanquam in oppositas qualitates diuiditur.
- 8 EVM autem genus in proprias subiectas species tunc diuissse crediderim, cum figuram in triangularem, aut circularem distinxit.
- 9 LINEAE parallelæ uocata in quocunque spatio protractæ

protractæ non concurrunt. quarum definitiones  
 si quis uariare uoluerit, quamplurimas Euclidis  
 demonstrationes inuertere ei opus erit.

10 SI uero linea super lineam ceciderit, uel per-  
 pendiculariter, uel oblique: tunc perpendicularis  
 semper æquales faciet angulos, huiusmodi autem  
 sunt recti: obliqua autem alterum obtusum, alterum  
 acutum efficiet angulum.

11 DATUM angulum in duas æquales partes secare  
 licet, ex Euclidis propositione nona primi libri:  
 in tres autem æquales partes diuidere, antiquio-  
 res Geometræ ignorauerunt, neque sufficiens est  
 Campani demonstratio.

12 INTER angulos omnes acutos, angulus contin-  
 gens circumferentiam dici potest iuxta Euclidis  
 comparisonem minimus, etsi simpliciter mini-  
 mus non est.

13 FIGURARVM cum infinitæ possint esse species:  
 ultima illarum, quæ infinitorum sit laterum, non  
 est circulus; cuius opinionis nonnulli fuere; quin-  
 immo prima est figurarum, & simplicissima.

14 CIRCVLVS est figura plana, unica constans li-  
 nea æquidistante a centro, cuius linea secans cen-  
 trum diameter dicitur. quam quidem diametrum  
 circulo comparari posse defendo.

15 CIRCULI se inuicem secantes idem cētrum ha-  
 bere possunt; nec ob id errasse Euclidem credi-

derim, qui libro tertio elementorum, propositione quinta, id omnino iuit inficias.

16 SI in diametro circuli aliquod sumatur punctū, quod minime centrum non sit, ab eoque puncto quædam rectæ lineæ procedant: maxima erit, in qua centrum, minima uero reliqua, aliarum autem semper proximior centro, erit remotiore maior.

17 SI in æquis circulis æqui sumantur arcus: infra illos formatos angulos, qui supra centra eorum, seu supra circumferentias cōstituuntur, æquos esse necesse est.

18 CAETERVM inter rectilineas figuras simplicissima est triangulus; ad quem cæteræ reduci possunt, quanuis finis potius Geometræ sit tetragonismus.

19 SI parallelogrammum, & triangulus in eadem basi, atque in eisdem alterutris lineis fuerint constituta: parallelogrammum triangulo duplum erit.

20 RECTILINEO dato æquale quadratū designari potest, tum prius æquale parallelogrammo descripto, si Theonem sequamur, tum si parallelogrammum illi æquale non constituatur, ex Campani sententia.

21 QVAECVNQVE in secundo libro elementorum traduntur demonstrationes, ad numeros reducere pos-



re possumus, excepta tamen undecima, quæ & ipsa ad radices numerorum redigi potest.

- 22 CAETERVM si plures inter se quantitates comparentur; proportionem habebunt. est autem proportio duarum eiusdem generis quantitatum certa alterius ad alterum habitudo, siue ratio.
- 23 NON tamen secum pugnat, qui dicit proportionem esse irrationalem, quanuis proportio ratio sit; neque si magnitudines irrationales sint, necesse est, ut sint improporcionales.
- 24 SPECIES proportionis sex sunt: conuersa, permutata, disiuncta, coniuncta, euerfa, & æqua, ut ex libro quinto elementorum Euclidis satis constat. proportionalitas est duarum proportionum similitudo, quæ in tribus saltem terminis reperiri potest.
- 25 QUANTITATES proportionales sunt, quarum æqualiter multiplicia, aut æqua sunt, aut sine interpolatione addunt uel minuunt. quam definitionem tum male esse traditam a Campano, tum incongrue interpretatam per geometricam proportionem, qua multiplicia se excedunt, sustinere conabor.
- 26 MAGNITVDINES ea ratione, qua sunt commensurabiles uel incommensurabiles, decimus elementorum Euclidis considerat; atque istud, nihil aliud est, quam considerare magnitudines

ea ratione, qua ueniunt sub formam numeri.

27 DIFFERT rationale & irrationale ab ipso commensurabili: rationale enim positionem nostram sequitur: commensurabile & incommensurabile naturam ipsam.

28 RATIONALES illæ dicuntur magnitudines, quarum altera ad alteram se habet, ut numerus quadratus ad numerum quadratum; uel quarum magnitudinum similes sunt plani: hinc diametrum costæ quadrati rationalem habere proportionem omnino nequit.

29 HUIUSMODI autem rationalitas uel a longitudine, uel a potentia commensurabili sumitur; irrationalitas autem opposito se habet modo.

## Ex Stereometria.

1 SED iam ad Stereometriam, quæ circa corpora uersatur, deueniamus: hæc autem sunt sphaeræ, coni, pyramides, prismata, columnæ, & quæ regularia dicuntur corpora, & iis consimilia; est autem Stereometria pars ipsius Geometriæ.

2 NEQUE ad Stereometram pertinet tantum consideratio corporum; sed eorum etiam, in quibus est aliquid, quod ad tertiam dimensionem spectat.

3 UT autem hæc facilius intelligerentur corpora,  
ra,

ra, ab Euclide quædam sunt excogitata: descri-  
ptiones, modum istorum producendorum cor-  
porum delineantes. inter quas est connumeran-  
da definitio sphæræ, coni, cylindri, & aliorum  
corporum.

4. QUAM tamen sphæræ definitionem intimius at-  
tigisse Theodosium crediderim, quod corpus sit  
constans superficie æquidistante a centro.
5. CORPORA regularia quinque sunt, pyramis,  
cubus, octaedrum, dodæcaedrum, & icosaedrum;  
ita ut non immerito illa corporibus simplicibus  
adscripserint Platonici. conuenit enim dodæcae-  
drum cælo; quoniam intra ipsum omnia regula-  
ria corpora describi possunt: cubus terræ, ob sta-  
bilitatem: icosaedrum aquæ, ob eius fluxibilita-  
tem: octaedrum aëri, quia solum octaedrum in  
pyramide describi potest, sicut aër continetur in  
igne: pyramis autem igni, ob eius diuisionem.
6. CONVVS quinque potissimum habet sectiones,  
triangularem, circularem, ellipsin, hyperbolen, &  
parabolen.
7. SUPERFICIES sphæræ quadrupla est circulo  
maximo in ea contento. sphæra quadrupla est co-  
no, cuius basis æqualis est maximo sphæræ circu-  
lo, & altitudo ipsi diametro.
8. INVENTIO duarum linearum, quæ sint mediæ  
proportionales, pertinet ad Geometram; dupla-  
tio



tio autem cubi, quæ ex iisdem lineis habetur, pertinet ad Stereometram.

- 9 LATENT autem duæ lineæ proportionales, quarum ope duplatio cubi inueniatur.
- 10 QVÆ quidem cubi duplatio numeris designari non potest: lineæ enim sunt irrationales potentia, & longitudine incommensurabiles.

## Ex Perspectiua.

- 1 CIRCA radios lineas, quatenus diuersitatem efficiunt in aspectu, uersatur Perspectiua scientia: cuius principia, a quædam naturali philosophia, quædam a Geometria sumuntur. est enim scientia media inter naturalem, & mathematicam, tametsi magis mathematicam esse, quam naturalem, defendere conabor:
- 2 SVMIT autem tanquam principium Perspectiuus per pyramidem uisionem fieri, cuius basis sit in superficie rei uisæ, conus uero in centro oculi; quapropter omnia sub angulo uideri concludit.
- 3 DIFFERUNT autem inter se Perspectiui de producendæ uisionis ratione: quidam enim per radios ab oculo emissos, fieri uisionem arbitrantur, ut Euclides: quidam ex actione rei uisilis in uisum, ut Vitellio: nos Vitellionis opinionem magis ueritati consonam esse defendimus.

Porro



4 **PORRO** res uisibiles, dum sui speciem multiplicat in medio, ita quidem multiplicat, ut ad quemcunque intuentium aspectum, pyramidem efficiat. neque ob id sequitur absurdum, quin species, in quocunque medij puncto reperiatur, & sphaerice multiplicata esse, dici possit.

5 **E A** uidentur uisibilia, inter quæ & oculum perpendicularis linea protrahi potest. hinc organum uisus optime a natura sphericum conformatum fuit: eodem enim permanens situ animal plura potest apprehendere uisibilia.

6 **Ex** angulorum proportionalitate quamcunque corporis tum altitudinem, tum longitudinem, tum profunditatem, tametsi inuiam, perspectius huiusmodi certissima ratione metitur; ut siue ex instrumento, siue ex uisu non decipiatur, labi non possit.

7 **SPHAERA** utcunque inspecta ab uno oculo minus semper hemisphaerio cernitur; ipsum uero uisum sub sphaerae circulo comprehensum apparet.

8 **BINIS** uero sphaera uisa oculis si diameter sphaerae aequalis fuerit rectae lineae distantiae ab oculis; totum sphaerae hemisphaerium uidebitur.

9 **RECTANGULAE** figurae ex magno interuallo spectatae circulares apparent: angulorum enim ob distantiam, pyramides ita exiguas cuspides habent, ut uisum excitare nequeant.

10. **ÆQUALIS** magnitudines inæqualiter expofitæ inæquales apparent; maior uero femper ea, quæ propius oculum adiacet, cum fub maiori uideatur angulo.
11. **PRAETER** hunc autem uifionis fimplicem, & uerum modum, alia eft uidendi ratio, quæ fit per reflexionem imaginum a fpeculo: in qua uidendi ratione allucinatur uifus.
12. **SPECULORVM** uero regularium, a quibus regularis fit reflexio, feptem funt genera: planum, conuexum, fphæricum, conuexum columnare, conuexum pyramidale, concauum fphæricum, concauum columnare, concauum pyramidale.
13. **TERTIA** eft adhuc uidendi ratio per imaginum fractionem: in qua fractione, fpeculum eft mediū inter obiectum & uifum. frangitur uero imago ob medijs difformitatem. cuius uifionis tum per reflexionem, tum per refractionem innumeras præmittimus confulto paffiones, breuitati ftudentes.

## Ex Mechanicis quæftionibus Aristotelis.

1. **INTER** eas fcientias, quæ mediam naturam fapiunt inter naturalē & mathematicam, collocandæ quoq; funt, quæ ab Aristotele mechanicæ quæftiones infcribuntur:

Quippe

- 2 QVIPPE quæ synceræ mathematicæ, cum naturalem materiam respiciant, dici nequeant; neque naturales, cum modus demonstrandi ex Geometria assumatur: magis tamen Geometriæ subalternari, quàm alteri cuiquàm scientiæ crediderim.
- 3 VERSATUR autem mechanicus circa principia & causas, quibus, iis, quæ præter naturam fieri contingunt, ferat opem; ut inde naturæ relictatione superata, quæ illi sunt usui, consequatur: & hæc tanquam miracula uulgo circunferuntur.
- 4 HUIUSMODI autem miraculorum principia ex circulo sumuntur. quod quidem ratione contingit; ex admirabili enim mirandum accidere quippiam, non est absurdum.
- 5 MIRAS autem habet circulus proprietates, tum quia ex commoto, & ex manente effectus est, tum quia lineâ, quæ illum amplectitur, curuitatē habet, & concauitatem, tum quia sursum & deorsum secundum diuersas partes moueri potest.
- 6 Ex quibus circuli proprietatibus ansam quidam accipientes, quasdam excogitauerunt machinas, ut earum admiratione spectatores detinerentur. huiusmodi sunt tum nostra horologia, tum inanimata illa corpora, quæ rotularum quarundam ope, & choreas ducunt, & citharam pulsan, & alia similia faciunt.
- 7 SED præter hæc in circulo adhuc est quippiam



admirandum : quæ enim a centro ductæ sunt lineæ, quo longiores ductæ sunt, eo celerius; quo breuiiores, eo tardius mouentur.

8 QVINIMMO eadem linea a centro ducta tota non eadem celeritate mouetur: eodem enim tempore pars centro proximior minus pertransit spatium, quam pars a centro remotior: magis enim incuruatur & retrahitur breuior in orbem lata linea, quam linea longior eodem motu circûacta.

9 Ex iis autem tanquam principiis & causis, multarum mechanicarum artium quæsitâ dissolui possunt. ut quare maiores libræ sint minoribus exactiores; an quia maiores ex magnarum linearum ambitu maiorem describunt circulû, in quo quæ a centro magis distant lineæ, celerius ab eadem uirtute mouentur.

10 HVIC autem ab Aristotele traditæ solutioni cum aduersetur experientia; paruulis enim libris utimur, cum quippiam siue auri, siue argenti exacte ponderamus: nos & experientiæ satisfacimus, & a calumnia Aristotelem liberabimus.

11 CVR paruum existens gubernaculum in extremo nauigij positum tantas uires habeat, ut ab exiguo temone, & ab unius hominis uiribus, alioquin modicè nitentis, magnæ nauigiorum moueantur moles? an quia uectis gubernaculum nauis est, onus mare, gubernator autem mouens, fulci-



fulcimentū cardo est, ad quod accedit quod modica in puppi agitatio, maxima est in prora, ut duabus patet lineis se inuicem secantibus.

12. **V**NDE est, quod quo antenna sublimior fuerit, iisdem uelis, & eodem modo expansis, quinetiam eodem flante uento, celerius mouentur nauigia? an quia malus uectis fit; fulcimentum, mali sedes, in qua collocatur; pondus est nauigium; mouens uero, qui uela tendit spiritus; & quoniam in sublimiori antenna longiores fiunt uectis lineæ, ideo celerius mouetur nauigium.

13. **Q**UARE paruo existente cuneo magna scinduntur corpora, ualidaque fit percussio? an quia sunt uectes sibi inuicem contrarii, ac etiam duo fulcimenta, duoque pondera, unum autem mouens ambobus feruiens uectibus; quæ quidem fulcimenta propter aduersam uim diuelluntur & comprimuntur: eademq; ratione facilius forcipe, quā manibus dentes euelluntur.

## Ex Arithmetica.

1. **A**LTERA est quantitatis species, quæ discreta quantitas dicitur; huiusmodi autem est numerus, qui a re numerata tanquam forma simplex, & abstracta ab Arithmetico consideratur.

2. **D**ESCRIBITVR numerus ab Euclide, quod ex multis

multis unitatibus sit composita multitudo . quam descriptionem nō omnino reprehendendam existimo , ut multi credidere .

3 VTRVM autem unitas numerus dicenda sit , demonstrationes Euclidis perpendenti , unitatem dici numerum opus esse defendam .

4 DIVIDITVR numerus in parem & imparem . nō est autem par numerus , qui in maxima & minima simul diuidi potest , cuiusmodi fuit Pythagoreorū definitio , sed qui bifariam diuiditur . bifariam autem idem sonat , qui in æquales partes , ut etiam quinto Ethicorum , capite quarto , usus est Aristoteles .

5 PRIMVS inter omnes pares numeros , in quem cæteri resoluuntur , binarius est ; qui cum a simplicissima unitate tantillum degeneret , diuisibilitatis capax efficitur . ob id haud temere materiam sub binario , formam sub unitate collocauerunt Platonici .

6 INTER pares perfectissimus est , qui suis partibus simul coaceruatis est æqualis : inter hos primus & simplicissimus est senarius ; secundus est uigesimus octauus , & quicunque in eadem sunt proportione .

7 TERNARIVS uero an primus inter impares numeros collocandus sit , ex uariis de ipsa unitate opinionibus , uarie determinandum est . siquidem  
si in-

si inter numeros illa reponenda est; nequit tertiarius primus dici. nos uero utranque opinionem conciliare conabimur.

- 8 CAETERVM numerorum affectiones, quæ de numeris quæri solent, ad æqualitatem, & inæqualitatem, compositionem, & diuisionem, proportionem, & figuram redigendæ sunt; huiusmodi autem figuræ per analogiam ad magnitudinem considerantur.
- 9 DVÆ uero numerorum potissimum sunt figuræ, plana, & solida. plana ex duobus multiplicatis numeris confurgit, sicut solida ex tribus. neque absurdum est, eundemmet numerum secundum diuersas multiplicationes, & planum & solidum dici posse.
- 10 SIMILES dicuntur plani, qui proportionabilia habent latera, ita ut ex iis multiplicatis quadratus oriatur numerus: quadratus autem is est, qui sub duobus æqualibus numeris, sicut cubus est qui sub tribus æqualibus, continetur.
- 11 TRIANGVLARES autem, pentagonæ, exagonæ, circulares, pyramidales numerorum figuræ, in quibus, ut ingenue fatear, percurrentis, nimius fuit Boëthus, non exactam retinent analogiam; atque inter eas minus cæteris illæ, quæ neque a triangulari numero, neque a quadrangulari trahunt originem.



- 12 SI fuerint quatuor numeri, quorum primus tota pars aut partes secundi, quota tertius fuerit quarti: erunt primus & tertius pariter accepti tota pars aut partes secundi, & quarti pariter acceptorum, quota primus secundi.
- 13 QUILIBET numeri contra se primi, sunt secundum suam proportionem minimi; sicut etiam quilibet secundum suam proportionem minimi, sunt ad inuicem primi.
- 14 QUILIBET numeri minimos numeros suae proportionis maior minorem, & minor maiorem multiplicantes, minimum ab iis numeratum producent.
- 15 DVORVM numerorum quadratorum unus medius proportionalis est numerus; & quadratus ad quadratum duplam habet proportionem, quam latus ad latus.
- 16 DVORVM autem cuborum, bini medij sunt proportionales numeri; & cubus ad cubum triplam habet proportionem, quam latus ad latus.

## Ex Arithmetica practica, quæ dicitur algorismus.

I VERVM enimvero cum characteribus quibusdam designetur numerus, idque per accidens: de hoc numero figuris descripto, quædam est



est arithmetica particularis, quæ ueluti est numerorum practica.

2. **SCORVS** huius arithmetici est characteribus designatis per quasdam regulas facillime computando, & plures numeros ad unum redigere, & a maiori minorem subtrahere, & eos tum diuidere; tum multiplicare.
3. **DEARTICVLATIO** autem numerorum per decades est per accidens: unde nonnulli per quinariorum dearticulant numeros, ut testis est Aristoteles in problematibus.
4. **VNITAS** omnem numerum numerat, nullum autem multiplicando auget. binarius omnem numerum numerat, cuius primam figuram, quaternarius, qui duas primas; octonarius, qui tres primas numerat.
5. **TERNARIVS**, & octonarius omnem numerum numerant, cuius figuras tanquam simplices, pariter acceptas numerant.
6. **SENARIVS** uero eos pares numerat, qui a ternario numerantur; quinariorum eos, qui primam figuram habent quinarium aut zifram; denarius qui primam figuram habent zifram.
7. **SEPTENARIVS** omnes numeros numerat, qui componuntur ex tribus, nouem, aut duodecim, aut quindecim terminis proportionis duplæ, quadruplæ, & sexdecuplæ, & consimilium.

# Ex Musica.

- 1 **S**VBALTERNATVR musica arithmeticae scientie; cuius subiectum sunt numeri, quatenus consonantiis inseruiunt. quilibet enim sonus successiue producit, & plures sequitur percussiones.
- 2 **C**VIVS soni differentia duae sunt, grauitas & acumen. grauitas, ut inquit Boethus, tardas & raras sequitur percussiones; acumen uero celeres & frequentes.
- 3 **I**USTA uero percussionum diuersitatem, diuersae oriuntur proportionales: aliae enim dicuntur multiplices; aliae dicuntur superparticulares; aliae superpartientes; aliae multiplices & superpartientes; aliae multiplices & superparticulares. in multiplicibus autem, & superparticularibus tantum reperiri consonantiam arbitrati sunt Pythagorici.
- 4 **E**RRAVIT autem Ptolemæus, qui in superpartientibus consonantiam reperiri arbitratus est; hoc enim a ueritate recedit, quemadmodum eius argumentum ex falsis deductum falsa concludit.
- 5 **N**EQVE tamen in omnibus multiplicibus, & superparticularibus consonantia reperitur; sed quae uel in duplici, & diapason dicitur; uel in triplici, & diapason diapente nuncupatur; uel in quadrupla, & est disdiapason; uel in sesquialtera, & est diapente; uel in sesquitercia, & est diateffaron.

Quocirca

6 QVOCIRCA temere a recentioribus ueteres  
musicos reprehensos crediderim : cum aliarum  
consonantiarum species se ij reperisse glorietur,  
quas ueteres illi consulto silentio prætermiserunt;  
cum eas tantum consonantias literarum monu-  
mento tradendas curauerint, quæ ex se, nullisque  
aliis permixtæ suauis existunt.

7 ALLVCINANTVR quoque recentiores practici,  
qui in suis cantilenis consonantiã diatessaron non  
admittunt, quasi non sit inter consonantias con-  
numeranda. quod & sensui, & rationi, & Ptole-  
mæo, Boetho, & Vitruuio aduersatur.

8 PORRO in iis consonantiis dignoscendis neque  
tantum auribus, neque tantum rationi fides ad-  
hibenda est; sed utrisque, ut Pythagoras admo-  
nuit, ita ut minister sit sensus, imperans uero ra-  
tio.

9 PENES autem quid, perfectio consonantiarum  
æstimanda sit, ardua & difficilis apud musicos  
quæstio est. ego tamen hanc perfectionem diu-  
dicari crediderim ex maxima dissimilium inter se  
uocum concordia: quod quidem contingit, quan-  
do celeritas & frequentia percussionum in sonis  
acutis, tarditati & raritati percussionum, quæ in  
sonis grauib; fiunt, ita unitur, & coniungitur,  
ut unicus diiudicetur sonus.

10 QVARE nobilissima inter consonantias rum ex



communi musicorum omnium, tum ex Aristotelis sententia est diapason: unicus enim in ipsa sentitur sonus; cætera uero, quo magis ab hac defleunt, eo imperfectiores sunt.

11 **CONSTAT** diapason ex diapente, & diatessaron. differt diapente a diatessaron tono: diapente enim ex tribus tonis, & semitonio; diatessaron uero ex duobus tonis, & semitonio constant. hinc diapason ex quinque tonis, & duobus semitoniis constare concludimus.

12 **EST** autem tonus inter octo & nouem positus, qui in duo æqualia semitonia diuidi non potest. cuius rei particularem causam adducit Boethus, quoniam inter decem & octo, & sexdecim, nullus est medius numerus æque distans ab extremis; uniuersalis autē causa ex Euclide colligi potest.

13 **RECTIVS** a Philolao diuiditur tonus in apotomen, & semitonium, siue in duo semitonia minoræ, & commæ; constat enim duobus semitoniis minoribus & commate. hinc diapason, cum ex quinque tonis, & duobus semitoniis minoribus absoluat, sex perfectos tonos non habet.

14 **VERVM** cum modicas in eius primordio consonantias haberet musica: Pythagoricorum cura, & opera ad quindecim interualla, & sexdecim chordas peruenit, ita ut extremæ disdiapasson consonantiam efficerent.



- 15 **HAB** in monochordo per tetrachorda diuiduntur; iuxta quorum diuersitatem, diuersa musices genera emanarunt, ut Diatonicum, Enarmonicum, & Chromaticum.
- 16 **TETRACHORDA** in genere Diatonico per tres tonos, & semitonium diuiduntur; in Chromatico per duo semitonia, & trihemitonium; in Enarmonico per duas dieses, & ditonum. inter hæc accommodatius est uiris probis genus Diatonicū.
- 17 **MODI** autem, quibus ueteres utebantur ad animorum tum sedandos, tum commouendos affectus, iniuria temporum periire. quapropter, quæ ex antiquorum monumentis de Musica supersunt, mutila ualde, & diminuta sunt.

## Ex Astronomia.

- 1 **D**IFFICILLIMA, atque incertissima inter omnes scientias est Astronomia; cum circa ea uersetur, quæ a sensibus nostris remotissima sunt; est tamen præstantissima ob subiecti nobilitatē.
- 2 **DIVIDITVR** hæc scientia in Theoricam, & Iudiciariam, hoc est in Astronomiam, & Astrologiam. Theorica iudiciariâ doctrinæ ordine præcedit; sciri enim effectus nequeunt ex cælestibus motibus effecti, motibus cælestibus ignoratis.
- 3 **VERSATVR** Astronomia circa cæleste corpus  
mobile,

mobile, quatenus ex illius motu diuersi fiunt aspectus: quæ corporis cælestis consideratio, neq; omnino mathematica, neque omnino naturalis est; magis tamen mathematicam, quam naturalem esse defendo.

4 HANC autem Theoricæ Astronomiæ considerationem, licet satis firmam atq; certam arbitrentur Astronomi: mihi tamen satis difficilis, atq; incerta uidetur. ob sensuum enim imbecillitatem, ob terræ situs, ob mediij difformitatem, ob instrumentorum fallaciam diuersæ contingunt fieri observationes, ex quibus quoque diuersæ oriuntur Astronomorum sententiæ.

5 DIFFICILLIMUM porro illud est, planetarum motus, qui modo uelociiores, modo tardiores, modo stationarij, modo retrogradi conspiciuntur, in determinatas causas referre. Astronomi ad epicyclos, & eccentricos orbes confugiunt, quos naturalis philosophia non admittit.


6 VERVM tametsi philosophia naturalis eos admitteret: aduersus Astronomos, ex eorum tamen principiis defendo, motuum cælestium regularitatem per eccentricos & epicyclos adhuc undiquaque saluari non posse, quo sublato, tota fere Astronomia ruit.

ASTROLOGIA uero, quæ altera est huius scientiæ pars, quæ & iudiciaria, & diuinatrix appellatur,

tur, cum nullis sit necessariis rationibus suffulta;  
sed fallacibus tātum quibusdam obseruationibus  
comprobata: tanquam inanis & uana a scientia-  
rum consortio secludenda est.

## Problemata naturalia

*Ex libris de physico auditu.*

1  **N**ATURALIS philosophia mathe-  
maticas scientias commodioris do-  
ctrinæ ordine non antecedit, cuius  
opinionis tum Thomas & Alber-  
tus, tū Ammonius & Olympiodo-  
rus fuerunt; sed eas subsequitur, ut Aristotelis &  
Platonis fuit sententia.

2 **C**VIUS subiectum non est ens mobile, ut opinati  
sunt Thomas, & Buridanus; sed naturale corpus,  
ut naturale: in quam sententiam conuenerunt  
Auerrois, & Simplicius.

3 **D**E quo cum ex principiis passiones essent de-  
monstrandæ: haud iniuria naturæ ordinem imita-  
tus Aristoteles, a cōmunissimis tum passionibus,  
tum principiis exordium sumpsit. quæ quidem  
principia & passiones, ex Auerrois & Græco-  
rum sententia, in iis libris, qui de physico auditu  
inscribuntur, sunt subiectum; tamen a calumnia  
liberari



liberari possint Latini, corpus naturale in iisdem libris subiectum esse defendentes.

4 QVI physicorum libri, quanuis a Simplicio & Adraſto in eos, qui partim de principiis, partim sunt de motu, diuidantur: ( in quam cæteri philosophantes uenerunt sententiam ) ego tamen omnes de motu uocandos esse, Auerrœe auctore, defendo.

5 HÆC autem principia genere infinita nō sunt; sed si per se principia connumerentur, sunt quatuor; si per accidens, sunt quinque: ad quæ exemplarem, & instrumentariam causam a diuino Platone excogitatam, referendam arbitramur:

6 QVI quidem Plato, quemadmodum in sex principiorum positione dissentit ab Aristotele; ita assentitur illi, dum materiam, formam, finem, & efficientem rerum omnium causas statuit. neque de priuatione dissentiunt summi isti philosophi, cōmuni philosophantiū opinione prætermissa.

7 PRINCIPIORVM quædam sunt interna; quædam sunt externa: interna, quæ ad generationem requiruntur, tria sunt, priuatio, forma, & materia: externa duo, efficiens, & finis.

8 INTERNIS principiis, quibus competit, ut contraria sint, quanuis uni competat, ut subiectum sit contrarietatis: conuenit, ut maneant semper, non quidem in ratione principiorum, ut Zimara; neq;  
in



in specie, ut Egidius, & Albertus; sed simpliciter, ut Simplicius opinatus est.

9 MATERIA, quam sub Protei nomine cecinerunt philosophantes poëtæ, principium est, ex quo fit aliquid; cum insit terminus, in quem naturalia entia resoluuntur, ingenerabilis, & incorruptibilis.

10 QVÆ si per intellectum a quacunque forma seungeretur, una fieret numero; tametsi hæc unitas unitati, quæ a forma provenit, collata, diceretur æquivoca.

11 EST de ratione materiæ tum potentia, tum actus essendi, ut perbelle interpretatus est Aristotelem Themistius. potentia autem in materia infinita non sunt, ut quorundam latinorum fuit opinio.

12 NEQVIT materia a quacunque spoliari forma; rueret enim ad nihilum deducta, ut dicit Auerrois. quod quidem non solum in Aristotelis, sed etiam in Christianæ persuasionis principiis veritatem habere, ut diuus Thomas sensit, mihi persuadeo, Scoti opinione prætermissa.

13 VT autem formæ illi non deficerent, insitus est illi appetitus, quo ut turpe a pulchro, & mulier a viro, ita a formis exornari desiderat. est enim inter cætera mundi entia deformis & turpissima:

14 NON ob id tamen tantæ turpitudinis illam esse

crediderim, quin nonnihil diuini fulgoris, ( ut Plotini uerbis utar ) in illa corruscare opinandum sit.

15 **NEQVIT** tamen ex fulgore illo materia per se intelligi; adulterina enim, ut dicebat Plato, cognitione percipitur, siue illam ad formæ analogiam, siue ad materiæ artificialis habitudinem intellexeris.

16 **EST** alterum principium forma, endelechia scilicet & actus materiæ, propter quam compositum naturale & actu est, & operatur; quemadmodum per materiam tum in potentia fit, tum subiicitur passionibus.

17 **QVÆ** non extrinsecus inducitur a Colcodea, ut Auicenna; neque ab ideis per se subsistentibus, ut Platoni adscripsit Aristoteles: sed a naturali agente educitur, habitibus in materia existentibus.

18 **EST** autem forma tū excellentior materia, quod non admiserunt ueteres philosophi, tum nobilior composito, cui non assentitur Scotus, quanuis & Scoti opinionem tueri polliceamur.

19 **FORMÆ** perfectio ex operationibus nobis innotescit: nobiliori enim formæ nobiliores operationes congruunt; quibus demptis ociosæ essent in rerum natura formæ, sicut absque trāsmutatione inanis esset materia:

20. Cui quidem formæ opponitur priuatio; quæ est principium ex quo fit aliquid, quod non inest rei productæ; terminus autem est a quo, in rei productione:
21. QVAM qui de prædicamento substantiæ, hoc est formarum quendam abyssum, ut Auicenna, Albertus, & Sueffanus, esse defendunt, a ueritate Peripatetica dissentiunt.
22. HANC oscitanter animaduertentes antiquiores philosophi, in sexcenta falsitatum genera inciderunt; formatam enim materiam pro naturalium rerum exordio statuerunt.
23. HINC alij ex aëre, alij ex igne, nonnulli ex aqua, alij ex mediato elemento, quidam ex atomis insectilibus omnia ortum habere feruntur. inter quas opiniones, quæ ex atomis insectilibus omnia constare asserit, Peripateticæ ueritati non aduersatur, licet aliter arbitrentur cæteri philosophi.
24. DE forma, & de materia natura dicitur, tametsi prius de forma, deinde de materia: quapropter eius definitio inter analogicas ex Auerrois sententia connumeranda est.
25. QVÆ natura spiritus ille non est per æthera fusus, omnia permeans, cælum, ac terras, camposque liquentes: ( ut inquit Platoniam philosophiam professus Vergilius) sed est principium motus & quietis eius in quo est, per se, & non secundum



quod accidens. quam definitionem temere reprehendens Philoponus, se ipsum reprehensione dignum exhibuit.

26 PORRO si quis disjunctim, hoc est in diuiso sensu, naturæ definitionem interpretari uoluerit: nulla prorsus erit difficultas, quin corpora celestia iure dici possint naturalia. utrum uero coniunctim intellecta de cælo ueritatem habeat, utranq; opinionem sustineo:

27 ET quanuis definitionem istam passiuè iuxta Simplicij sententiam interpretadam crediderim: dissentio tamè a Simplicio, qui animam ab hac definitione seiungit:

28 QUAM naturam existere, tantæ certitudinis est, ut axioma naturale hoc sit. quare merito reprehenditur Auicenna ab Auerroe, qui naturam demonstrare conatus est.

29 PROPRIUM est naturæ, ut nihil agat temere, sed statutum finem a superiori agente gubernata, nulloq; coacta impedimento consequatur. est autem finis causa causarum, propter quam ceteræ agunt causæ.

30 QVOD si ob quantitatis, aut qualitatis defectû, aut excessum, sine frustretur suo natura: monstrabuntur, quæ secundum naturam uniuersalem non sunt, ut Philoponus; sed ut Simplicius a natura, licet præter naturæ intentionem.

Gubernans



- 31 **GVBERNANS** naturam efficiens causa est; est autem efficiens principium unde motus, cuius beneficio id quod erat in potentia, fit in actu. quapropter elicio æternorum permanentium nullam ueram esse assignandam causam, ut recte sentit Auerrois, cui contradicit Thomas.
- 32 **EFFICIENTIS** principij duæ sunt species: una, uniuersalis; particularis reliqua. quæ non ea ratione inter se opponuntur, ut particularis disponat, uniuersalis, formam inducat, ut Auicenna opinatus est; sed utriusque est tum materiam disponere, tum formam educere.
- 33 **AGENTI** causa per accidens opponitur. huiusmodi casus est, & fortuna; quæ tantum abest, ut rerum naturalium causæ sint, uelut Anaxagoras, & Democritus falso opinati sunt, ut neque in iis quæ ut in pluribus, neq; in iis quæ æqualiter eueniunt, locum habeant.
- 34 **FORTVNA** est causa indeterminati effectus præter agentis propositum in iis quæ raro eueniunt; quapropter iis tantum competit, quæ ex proposito causant.
- 35 **CAVSA** illa efficiens, quæ aliquem finem sibi proponens, nulloq; coacta impedimento ipsum non consequitur, otiosa nuncupatur. hinc fortuna otiosa non est dicenda causa; finem enim nullum respicit.

- 36 <sup>40</sup> **P**ORRO inter has quatuor causas aliquæ perfectiores, aliquæ non tantæ sunt perfectionis; perfectissima omnium finalis est, quam sequitur efficiens, efficientem forma, & formam materia.
- 37 **I**AM uero de passionibus, quæ omnibus corporibus naturalibus communes sunt, uerba faciamus: hæ uero quatuor sunt, continuïtas, locus, motus, & tempus; inter quas motus maxime ad entia naturalia cognoscenda confert:
- 38 **Q**UO motus, quia in pluribus reperitur prædicamentis, ideo eius definitio inter eas connumeranda non est, quæ sunt uniuocæ; neque inter eas, quæ puræ sunt æquiuocæ; analogia igitur erit.
- 39 **T**AMETSI motus in pluribus reperitur prædicamentis, non reperitur tamen in omnibus, ut Eudemum, & Theophrastum uoluisse testatur Simplicius. quapropter in illis, quæ & duos terminos stabiles, & fluentes habent, uersatur.
- 40 **H**ÆC sunt quatuor, Substantia, Quantitas, Qualitas, & Vbi; nihil tamen uetat & in solo actionis prædicamento, & in passionis tantum, & in sola quantitate motum esse.
- 41 **N**ON est autem motus pura potentia, neque purus actus, sed potentiæ admixtus actus. quare actus erit in potentia, ut in potentia; quod idē est actus mobilis, ut mobile est.
- 42 **Q**UAE motus definitio uirtute quadam species

cies motus ingreditur. alteratio enim actus est alterabilis, ut alterabile est; quemadmodum augmentatio actus est augmentabilis, ut augmentabile.

43 Ex qua definitione constat motum in eorum numerum non esse referendum, quæ ut permanentia, uel indiuisibilia sunt entia: est enim & diuisibilis, & successiuus; tamen si disputandi gratia indiuisibilem esse motum defendere possum.

44 REPERITVR motus in motore, ut in actiuo principio; in mobili, ut in passiuo. unus enim & idem actus est motoris & mobilis; quemadmodum actio & passio eadem sunt subiecto, sed sola ratione distinguuntur.

45 DE ratione motoris est, ut actu sit; de ratione autem mobilis est, ut sit in potentia, partim quidem a termino a quo, partim a termino in quem, a quo mobile denominatur.

46 Ex quo colligimus aduersus Scotum, qui temere hac in re philosophum reprehendit, indiuisibile moueri naturaliter non posse, quanuis orthodoxa fides aliter nobis persuadeat.

47 MOTVS species duæ sunt: altera, quæ transmutatio dicitur, & est generatio, uel corruptio: altera, quæ uere motus, & est uel latio, uel augmentatio, uel alteratio.

48 GENERATIONIS duæ sunt species: altera, quæ  
simplici



simpliciter: altera, quæ secundum quid dicitur. utrique illud commune est, ut terminos priuatiuos habeat; quanuis altera subiectum in actu, altera subiectum in potentia requirat.

49 HINC aduersus alios exponentes colligimus ueriores sumi differentiam in generatione a subiecto, quam a termino. est igitur generatio transmutatio de non esse ad esse secundum priuatiuos terminos in subiecto potentia.

50 QUAE si misti sit, momentanea est: si elementi, successiua, iuxta Auerrois sententiam, id quod Thomas, & Scotus non admittunt.

51 MOTVS species, quas in propriis Aristoteles determinauit tractatibus, ordine quodam se ipsas respiciunt: prima enim, sine qua alia non essent, circularis est cæli latio; quanuis quoque latio nobiliorem esse generationem, mihi sumo defendendum.

52 LATIO uero, cum locum respiciat, sine loco non est dignoscenda; non est autem locus cuiuscunque rei forma, seu materia, ut ueteres philosophi opinabantur; neque interuallum tribus refertum dimensionibus, ut Philoponus, neque locatarum partium ordo, ut Damascius, quem Simplicius est insecutus:

53 SED est superficies immobilis continētis; immobilis quidē non solum per se, sed per accidens.



- 54 **LOCUS** id proprium est; ut uirtute quadam affectus locatum corpus conseruet: quapropter uere cælum dici in loco nequit, nullo indigens conseruatore.
- 55 **DICI** tamen possunt cælestia corpora esse in loco per se, si a superiori ambiantur corpore; ultima tamen cæli superficies non per partes; ut Themistius; sed per cætrum locatur, ut Auërois.
- 56 **VIRTUS** autem hæc conseruatiua locati non est simpliciter elementorum superficies; sed per lumen, & motum a cælo transmissa qualitas: quam intelligentes Platonici cuilibet elementorû sphaeræ Dæmonem cælestem præesse fatentur.
- 57 **EORUM**, quæ sunt in loco, quædam sunt per accidens; quædam sunt per se: per se in loco sunt corpora; per accidens sunt accidentia. utrum autem incorporeis locus sit adscribendus, aduersus alios philosophos, affirmatiuam opinionem tuebhor.
- 58 **DIFFERENTIAE** loci duæ sunt, sursum, & deorsum simpliciter; ad quæ grauiæ & leuiæ simpliciter mouentur localiter.
- 59 **EST** autem ratio motus ad ubi, cui diuisibilitatē largitur resistentia mobilis ad motorem; in elementis autem mobilis ad medium. quare elementa in uacuo moueri, ut sensit Thomas & Scotus, impossibile est.

- 60 VACVVM autem tantum abhorrere naturam asseruit Auicenna, ut si daretur, (quod fieri nullo modo potest) cælum quidem descendere, natura pateretur, ut locus uacuuus repleretur.
- 61 PORRO quanuis a medio diuisionem nanciscatur latio; non est tamen hoc cuiuscunque lationis proprium; cæli enim motus diuisibilis est, quanuis resistantiam medij non patiatur.
- 62 HABC autem cæli latio, tempore, tanquam diuino quodam horologio, mensuratur. est autem tempus non sphæra cælestis, ut ueteres philosophi opinabantur; neque cæli conuersio, ut Platoni adscribit Aristoteles: sed numerus motus mensurati ab anima per prius, & per posterius.
- 63 QVICVNQVE igitur prius & posterius in fluente motu non percipiunt, temporis fluxum ignorant. hinc dormientes, & qui maxima sunt uoluptate affecti, prioritatem, & posterioritatem motus non animaduertentes, momentaneas fere iudicant esse noctes, uel dies.
- 64 QVATENVS igitur successio fluentis motus ab anima per prius & per posterius distinguitur, eatenus in anima tempus tantum reperitur; solus enim homo tempus perfecte dignoscit: ut autem pro motus duratione tempus accipitur, ita est ens extra animam.
- 65 PORRO dum est motus mensura, interea tempus

- 51
- pus appellatur, de cælesti latione primo, quæ simplicissima est intelligitur; per illam enim inferiores motus mensurantur.
- 66 DIFFERENTIAE, quæ ratione temporis motibus insunt, celeritas & tarditas sunt. celerius id dicitur moueri, quod in minori tempore æquale, aut maius spatium pertransit; tardius aliquod mouetur quod æquale, aut minus spatium in maiori tempore conficit.
- 67 VELOCITAS & tarditas augentur, & minuuntur penes proportionem maioris, uel minoris inequalitatis motiue potentiæ ad resistantiam. quapropter si potentia motiua mouet resistantem ut duo per datum spatium: in dimidio illius temporis mouebit ut unum; & sic in infinitum.
- 68 PROPORTIO autem recti motus penes alium rectum diiudicatur, sicut circularis ad circularem. proportio autem circularis motus ad rectum nulla excogitari potest, si Aristoteli fides adhibenda est, cum tamen dissentiant mathematici.
- 69 MOTIVVM nonnulli sunt naturales, quidam præter naturam. de naturalibus in libris de cælo pertractat Aristoteles. præternaturales sunt quatuor, proiectio, uectio, uolutatio, tractio. dicuntur autem præter naturam; quia a principio extrinseco passo non conferente uim producantur.
- 70 ID quod proiicitur, medij resistantiam superare



debet: si enim æqualis esset projecti uirtus medij  
resistentiæ, (cum ab æqualibus non fiat actio) nul-  
lus contingeret fieri motus.

71 **MOVETVR** projectum non a medio, ut Auer-  
rois opinatus fuit; sed ab impetu proicientis;  
quod est abiunctum a projecto, qui continuo a  
resistentia medij diminuitur, donec cesset pro-  
portio maioris inæqualitatis uirtutis ad resisten-  
tiam:

72 **CVM** autem ad terminum illum peruenerit, rur-  
sus reflectitur, in punctoque reflexionis quiescit.  
continui enim duo motus contrarij nunquam re-  
periuntur.

73 **VTRVM** autem motus & tempus cœperint ali-  
quando, aut nūquam principium habuerint, neq;  
finem sint habitura: maxima apud antiquos lis or-  
ta est; quam dissoluens Aristoteles æternum mo-  
tum esse statuit. cuius rationes quemadmodum  
secundum eius principia demonstrant, ita secun-  
dum ueritatem Christianam falsæ sunt.

74 **VERVM** quoniam quodcunque mouetur dum  
mouetur, ideo ab alio mouetur, ne inanis fiat  
progressio in infinitum: ad unum supremum mo-  
torem deueniendum est, qui sit immobilis tū per  
se, cum per accidens; & hæc nobis sola uia ad pri-  
mum motorem demonstrandum concessa est.

75 **HIC** autem, quia æterni motus principium ef-  
fectiuum



fectiū est, ideo æternus quoque est, & abstractus; uirtus enim in magnitudine quælibet finita est, & materialis.

- 76 QVAPROPTER & inalterabilis, & intransmutabilis existit, nihil in mouendo laborans; qui si a primi mobilis motu desisteret, mista & quatuor elementa euerterentur, & in nihilum reciderent, est enim superior motus uita omniū inferiorū.

## Ex libris, qui de cælo & mundo inscribuntur.

- 1 **I**N libris de cælo & mundo subiectum non est Vniuersum, ut sentit Alexander: neque corpus mobile ad ubi, in quam hæresim ceciderunt latini omnes: neq; cælum tantum, ut opinati sunt Iamblicus, & Syrianus: sed simplex corpus, ut Simplicius, a quo fortassis non dissentit Alexander nisi uerbis.

- 2 **C**ORPORVM duo sunt genera, physicum, & mathematicum. ualeat autem Albertus, & qui sunt eius doctrinam secuti, quod tertium reperiatur corpus methaphysicum.

- 3 **C**ONVENIUNT autem hæc corpora, quod ambo continua sunt. Est uero continuum id quod est diuisibile in semper diuisibilia. quare componi continuum

tinuum ex superficiebus, ut Platoni imponit Aristoteles; aut ex atomis, ut Democritus & Leucippus arbitrati sunt, omnino negandum est.

4 EST porro hæc continui definitio, non de mathematica magnitudine intelligenda, ea ratione quod passio sit naturalis corporis, ut Hispanus ex recentioribus opinatus est; neque ut signum corporis naturalis, cuius opinionis fuit Zimara; sed ut naturalis corporis naturalis est affectio.

5 CORPVS uero naturale id est, quod trifariam est diuisibile, quod idem est, quod omnifariam: natura enim nō admittit quartam dimensionem, ut ex secantibus lineis demonstrauit Ptolemæus.

6 QVOD corpus naturale, quanuis uere continuum sit, diuisibile scilicet in semper diuisibilia: habet nihilominus proprium terminum; maximum & minimum; ultra quem, & citra quem res naturalis non consistit. determinata est enim cuiusq; naturalis entis quantitas.

7 INVENTVR igitur in quacunque specie naturali corpus minimum uel maximum, quo minus, uel maius reperiri non potest, Nominalium, & Petri Mantuani opinione prætermissa.

NIHIL tamen prohibet, quanuis dari tum maximum, tum minimum in natura defendamus: quin etiam maius maximo, & minus minimo disputationis gratia sustineamus.

Porro

9 PORRO corpus naturale cum in homogenum, & heterogeneum diuidatur: non solum heterogeneum, vt Auerrois & Thomas, sed homogenum quoque minimum reperitur. quicquid autem de minimo corpore, & de maximo dictum est: id verò non solum secundum speciem, sed simpliciter reperitur.

10 INTER naturalia corpora principem locum cælum obtinet; quippe quod tum Deorum esse sedem, ex antiquorum opinione memoriæ traditum est, tum confinium æternitatis, & corruptibilitatis, tum vinculum, quo immaterialis mundus corruptibili corporeo connectitur.

11 QVOD quidem cælum non ex materia constat, quæ rationis eiusdem sit cum inferiori; quippe quæ semper sit appetens formarum, quam opinionem sequitur Egidius: sed ex materia, quæ a Themistio uere subiectum dicitur, suapte natura in actu non per formam perficientem, quod existimauit Thomas, sed per assistentem intelligentiam, quod recte sensit Auerrois.

12 QVAPROPTER cum in cælo nulla sit materia, quæ formam dantem esse respiciat: cælum neque generatur, neque corrumpitur, neque augetur, neque diminuitur, neque alteratur, sed perfectiua tantum qualitate afficitur; cuiusmodi est illuminatio.

13 NEQVE ob id corrumpitur, quod diuina sit voluntate



luntate incorruptibile, suapte uero natura sit corruptioni obnoxium; quod opinati sunt Plato, & Philoponus: sed quoniam simpliciter, & omnino a quacunque intrinseca uacuum sit corruptione.

14 **S**I QVIS tamen accuratius Platonis opinionem perscrutari uoluerit: summos hos philosophos de natura cæli incorruptibili, Platonem scilicet & Aristotelem, conciliare poterit, sicut egregie conciliauit illos Simplicius.

15 **M**OVETVR cælum incessabili, atque perpetuo motu ab intelligentia. cælum enim quiescere, terram moueri, quod imaginatus est Heraclides Ponticus, a ratione alienum est.

16 **P**ORRO efficiens motus cælestis est intelligentia; quæ a natura, dum mouet, non distinguitur: inter quam & orbem tanta reperitur proportio; ut ne transuersum quidem unguem celerior fieri possit motus.

17 **Q**UONIAM autem cælum est corpus simplicissimum: ideo simplicissimus motus illi conuenit; huiusmodi autem est conuersio.

18 **Q**VI cælo præter naturam non accidit, alioquin uiolētum esset perpetuum; sed cælo naturalis existit, cui tamen nullus opponitur inter simplices motus. utrum autem uiolentum æterno permanere possit tempore, disputationis gratia, utranque opinionem sustineo.

Simplicissimo

- 19 **SIMPLICISSIMO** autem huic motui perfectissima est figura assignanda; hæc autem circularis est, cui circularis motus tantum accommodari potest.
- 20 **INDIGET** autem quilibet motus quiescente: quapropter ut cælestis motus existat, centri immobilitate opus est; quam fortasse sub Atlantis commento ueteres poetæ innuerunt.
- 21 **MOVE**T enim uero intelligentia nullo impetu, nullaque ui in cælum facta; obtemperans enim cælum est intellectui & appetitui, quibus intelligentia proprium mouet orbem:
- 22 **QVI** motus non ea ratione ab intelligentia proficiscitur, ut ex motu perfectionem aliquam, quæ sibi desit, nanciscatur: sed quoniam in motu suam consistere perfectionem intelligit.
- 23 **PORRO** cum inter animata corpora ob huiusmodi intelligentiæ præstantiam, perfectissimum locum cælum obtineat: iure dextrum & sinistrum cælo assignandum est. quod quidem dextrum non secundum densiores cæli partes, ut Albertus & Egidius, neque secundum quasunque: sed penes constitutas præordinatasque partes in cælo collocatur.
- 24 **UBI** uero hæc posteriores loci differentiæ, ibi necessario & priores reperiuntur; huiusmodi autem sunt sursum & deorsum, ante & retro, quas omnes in cælo reperiri fatendum est.

- 25 **V**ERVM tametsi cælum animatum corpus esse defendimus: nequit tamen uere appellari animal. quapropter calumnia Simplicius non uacat, qui tactum & uisum cælo adiudicauit.
- 26 **N**EQVE tantum exteriores sensus, sed interiores a cælo seiungendi sunt. Phantasiari enim cælum & discurrere in philosophia Peripatetica falsa hæresis est, quanuis huius fuerit sententiæ Philoponus.
- 27 **P**ORRO cælos plures esse, tum sensu, tum ratione diiudicamus. octo autem ab Aristotele fuerunt connumerati, cū octo sint qui stellis sint referti.
- 28 **I**NTER hos autem primus orbis perfectissimus est, plurimis præditus syderibus, immediate a cælo dependens; cæteri unicum tantum astrum habentes, iuxta primi orbis propinquitatem perfectiores appellantur. hinc haud iniuria Luna ab Astronomis terra nuncupatur; cum tantam habeat proportionem inter sydera; quantam terra inter caduca corpora:
- 29 **Q**VAE quidem Luna, luce accepta a Sole, nobis eandem largitur. absurdum est autem, si quis Lunam quacunque luce carere crediderit; est enim ipsi nonnihil luminis, quod in eclipsibus animaduertimus.
- 30 **Q**UAS uero in Luna maculas conspiciamus, hæc non quidem altissimorum montium sunt imagines,



nes, ut nonnulli sentiunt, iuxta enim diuersas terræ situationes diuersæ apparerent; neque quod ex illis partibus uapores pro sui nutritione Luna sursum attrahat, ut poëtæ, & Plinius credidere: sed quoniâ quædam partes Lunæ sint luminis magis peruiæ; quædam minus, ut contingit in Alabastro.

31 INSEQUITVR autem quilibet orbis inferior motum primi orbis. quapropter duplici motu saltem mouetur, proprio atque diurno. qui quidē diurnus falso raptus appellatur; cum nulla ui, sed sponte ab intelligentiis efficiatur.

32 VERVM cum de astris superius meminerimus; iam quid sint astra, dicamus: non sunt igitur a propriis orbibus specie distincta astra, sed accedente differunt; densiores enim partes sunt orbis.

33 NEQVE astra unius orbis ab astris eiusdem orbis specie differunt, sed accidente tantum, penes scilicet densitatem & raritatem; neque eiusdem speciei plura sunt indiuidua, sed eiusedē indiuidui plures sunt partes.

34 SVNT autem quælibet astra sphericæ figuræ, ut ex Lunæ aspectibus dignoscimus: quæ non quiescente orbe circumferuntur, ut opinati sunt quidam; neque proprio centro uoluuntur, ut Plato; sed per se manent omnino immobiles orbi affixa, quasi nodi in tabella, mouentur autem per

accidens ad motum orbis.

- 35 **D**VM autem orbis mouentur, nullum quidem sonum edere possunt: qui sonus si ederetur, ob excellentiam sensibilis nihil auditu a nobis percipi posset: quapropter absurda est Pythagoricorum opinio, tum fundamentum.
- 36 **A**GIT uero quilibet orbis in mundum inferiore tum lumine, tum motu, sine quibus nulla fieri posset transmutatio: influxus autem, quos ponunt Albertus, Thomas, & Astronomi, a Peripateticis refelluntur.
- 37 **N**EQUE tantum lumine & motu cælesti caliditas his inferioribus impertitur; sed humiditas, frigiditas, & siccitas; neque hoc quidem per accides, sed per se.
- 38 **P**RÆTER cælum alia adhuc sunt corpora simplicia, ignis, aër, aqua, & terra; quæ materiæ rationem habent ad mistorum productionem, sicut cælum omnium efficiens causa est.
- 39 **M**OVENTVR hæc omnia motu recto, qui sibi secundum naturam conuenit; deorsum quidem graui, sursum leuia. qui motus cum in simplici corpore, & simplici fiat linea: simplex quoque erit motus.
- 49 **P**RINCIPIVM elementorum actiuum cælū non est expellens aut centrum attrahens, aut contra, sicut opinabantur antiqui philosophantes; neque generans,

generans, ut Thomas; neque totum elementum,  
ut Scotus: sed forma quidem elementi; ut opti-  
me sensit Auerrois.

41 **Q**UANTUM opinio sancti Thomæ sustineri pos-  
sit, si tamen illam interpretari uoluerimus; ut ap-  
posite, & apprimè eleganter interpretatus fuit  
Illustrissimus Cardinalis CONTARENVS in aureo  
suo tractatu de elementis.

42 **C**ONCVRIT autem ad motum in elementis ef-  
ficiendum, ut materia ipsum medium: ex cuius  
in elementum resistantia causatur motus; qui sine  
medio nullus omnino fieri cōtingeret, licet aliter  
sanctus Thomas opinatus fuerit.

43 **I**N propriis autem sphaëris an elementa leuitatē  
aut grauitatem habeāt, magna inter philosophos  
fuit contentio. in cuius resolutione quanuis ad  
negatiuam partem inclinare uideatur Aristoteles:  
ego tamen nullā reperiri grauitatem, neque leui-  
tatem defendo; experientiisque in oppositum ad-  
ductis facillime satisfacio:

44 **S**I uero elementa in non sibi proprio reperian-  
tur loco, nulloq; impedimento detineantur: quā-  
primum ad naturalem locum remeabunt. qui  
motus continuo uelocitatem intēdit, quousque  
ad terminum deuenit.

45 **C**AUSATUR autem hæc celeritas elementorum  
uel ea sane ratione, quod in approximatione rei  
grauis



grauis ad centrum confortetur, & corroborretur  
 grauitas, ut fuit opinio sancti Thomæ: uel quia  
 intendatur elementi desiderium, ut Auerrois; aut  
 ab ipso medio impellente rem grauem, ne uacuum  
 admittatur. nos huiuscemodi opiniones quascūq;  
 tueri conabimur.

- 46 **FIGURAM** elementa nullā sibi determinant: im-  
 perfectissimæ enim sunt substantiæ, ad quascunq;  
 mixtorum formas suscipiendas idoneæ. quare cir-  
 cularis aqua, uel ignis, uel terra, uel aër dici mi-  
 nime potest.

## Ex libris de generatione & corruptione.

- 1 **I**N iis libris, quos Aristoteles inscribit de ge-  
 neratione, & corruptione, subiectum esse ele-  
 menta defendimus, nec inanem esse Aristotelis  
 operam; tametsi de elemētis in libris de cælo Ari-  
 stoteles pertractauerit.
- 2 **N**EC ob id Themistium, & Philoponum re-  
 prehensione dignos existimo, qui generationem  
 & corruptionem subiectum esse defenderūt, cum  
 utranque opinionem tueri possimus.
- 3 **E**ST autem generatio transmutatio totius in  
 totum, nullo sensibili remanente ut subiecto per  
 se.

se: quare aberrauerunt antiqui, generationē esse alterationem existimantes.

4 QVÆ generatio unius semper alterius est corruptio: & hoc non solum respectu termini primarij, ut Alexander, sed etiam secundarij; neq; ratione tantum formæ immediatæ, ut Scotus, sed mediatæ; neque tantum in successiuis, ut Marcellus, sed in omnibus substantiis.

5 FIERT autem aliquid ex alio illæso permanente (quod fortasse paradoxum in philosophia peripatetica uidebitur) tueri possumus, quāuis refragari uideatur auctoritas Aristotelis.

6 VNIVS igitur generatio, quoniam alterius semper est corruptio, ideo æternam esse generationē inferimus: cuius æternæ generationis actuum principium est Sol, sub obliquo circulo æterno tempore circumactus.

7 GENERANTVR elementa, quando præcedentibus in materia dispositionibus, ab agente naturali eorum forma educitur, non per atomorum congregationem, siue disgregationem, ut opinati sunt ueteres philosophi.

8 NON sunt elementa infinita numero, ut statuerunt Leucippus & Democritus; neque unum tantum, ut Thales & Anaximander, & plerique alij opinati sunt: sed finita sunt elementa, & secundū numerum quatuor, ignis, aër, aqua, & terra.

Hunc

- 9 H V N C autem elementorum quaternarium numerum, ex simplici elementorum motu, tū graui, tum leui, tum simpliciter, tum secundum quid; in libris de cælo demonstrauit Aristoteles; ex qualitatū autē primarū combinationibus, scilicet caliditate, frigiditate, humiditate, & siccitate, in libris de generatione, & corruptione.
- 10 NEQVEVNT enim primæ qualitates, si in singulis elementis duæ sint, nisi quatuor tantum elementa efficere, alioquin in eodem duo contraria reperirentur.
- 11 FACTVM autem hoc esse in uniuerso a natura prouida crediderim, ut singulis elementis duæ applicarentur qualitates, ut ex maxima elementorum inimicitia maximam affinitatē partes uniuersi consequerētur. aër enim, ut est calidus, affinis est igni; ut humidus, affinis est aquæ. aqua in frigiditate cum terra conuenit; in humiditate cum aëre: terra cōuenit in frigiditate cum aqua; in siccitate cum igne; ita ut ex iis contrariarū qualitatū connexibus, stabilis & permanens euadat uniuersi ordo, id quod per litem & amicitiam inuinit Empedocles.
- 12 QVÆ quidem elementa, ut in æquali etiā proportionē secundum quantitatem persisterent, ne si alterum excederet, omnia absumeret: æstatem quæ igni, uer quod aëri, hyemem quæ aquæ, autumnum



tumnum qui terræ respondet, statuit natura; in quibus anni temporibus ad debitam quantitatis proportionem ueniunt.

- 13 HUIUSMODI autem elementorum qualitates non sunt substantiales formæ, ut sensit Alexander, sed formam consequuntur. formæ uero illorum innominatæ quædam sunt substantiæ, quæ ob imperfectionem, mediam quandam naturam sapiunt inter substantiam, & accidens; & ob id (ut inquit Auerrois) suscipiunt intensiorem, & remissionem.
- 14 INTER qualitates nobilissima est caliditas, cuius proprium est homogeneas naturas in unum congregare, heterogeneas autem segregare; tametsi disputationis gratia calorem heterogenea congregare defendam.
- 15 FRIGORIS est proprium quæcunq; uel sint homogenea, uel heterogenea in unum congregare. siccitas proprio termino facillime terminatur, difficile alieno: humiditas uero facile alieno, difficile proprio.
- 16 HUIUSCEMODI autem qualitates, non ea ratione distinguuntur, ut duæ actiuæ sint, duæ uero passiuæ; sed omnes actiuas esse, simulq; duas actiuas, duasq; passiuas defendo:
- 17 ERRASSE tamen Philoponum crediderim, qui in elementorum generatione, omnes has qualitates

tes actiuas esse arbitratus est; ut autem ad missionem ueniunt, duas esse actiuas, duasque passiuas: quod quidem falsum est; dum enim ad missionē ueniunt, simul omnes agunt, & patiuntur.

18 ELEMENTIS non ea ratione qualitates hę prime insunt, ut altera sit intensior, altera sit remissior, id quod opinatus est Alexander; neque quod in extremis elementis, hoc est, terra & igne, sint intensiores, in mediis uero, nempe aere, & aqua, remissiores, ut Albertus: sed omnes sunt æqualium graduum, æqualisq; ambitus, ita ut tantum aer, quantum ignis sit calidus.

19 NEQUEVNT tamen hę qualitates in aliquo elemento reperiri synceræ, ut optime opinatus fuit Galenus; non ualere tamen argumentum Galeni crediderim, quod si syncera reperiretur aqua, cōglaciata semper esset.

20 RATIONE harum qualitatū elementa modo symbola, modo contraria dicuntur. symbolæ qualitates eiusdem esse speciei existimo, non analogę, sed uniuocæ, & specialissimæ, licet aliter senserit Simplicius.

21 IN elementis symboleitatē habentibus facilior est transitus, quam sit in contrariis; tamen neq; uelociorem, neque faciliorem esse motum defendere possumus.

22 PRAETER has qualitates si quis in elementis uirtuales

tuales illas ponere uoluerit, quas excogitauerunt Scotus, & plusquam commentator, peripateticę ueritati refragari crediderim.

- 23 PER illas uero agunt, & patiuntur elementa, simulq; corrumpuntur, & generantur, non solum extrema immediate cum medijs, sed etiam extrema simul, & media simul; quanuis Themistius alterius fuerit sententię.
- 24 NEQUEVNT tamen elementa simul agere, & simul pati a se inuicem, neque corruptiue, neque perfectiue. quare si aqua manens aqua calefieret, a se ipsa frigefieri nunquam posset.
- 25 A B extrinseco igitur corpore patiuntur, quod illis approximatum sit. quęlibet enim actio pręsupponit contactum.
- 26 CONTACTVS in iis, quę positionem tantum habent, reperiuntur; habent positionem sola corpora; in corporibus igitur uerus tantum contactus reperietur.
- 27 DVPLEX uero est in corporibus contactus; mathematicus quidam, alter physicus. mathematica corpora se contangere dicuntur, quę extrema habent simul; physica, quę non solum extrema habent simul, sed simul agunt & patiuntur.
- 28 VTRVM uero quęcunq; corpora physica in contactu agant, & patiantur; disputationis gratia utranq; opinionem sustinere tentabo.



29 **F**IT actio ratione contrarietatis, passio ratione communitatis in materia: in qua actione semper reactionem dari dicimus, non priuatiuam, ut Sueffanus, & Calculator, sed tum positiuam, tum in eisdem qualitatibus.

30 **Q**VAELIBET autem actio præsupponit physicū contactum. quapropter neq; intelligentiæ in hæc inferiora immediate agere possunt, neque anima nostra in externum aliud corpus, ut sensit Auicenna.

31 **E**A quæ agunt, & patiuntur, partim sunt similia, partim sunt contraria. in principio enim sunt contraria, in fine uero similia. finis enim est agentis, ut passum sibi simile reddat.

32 **E**X hac autem actione, & passione elementa ad mitionem ueniunt. est autem mistio miscibilium alteratorum unio, ex cuius mitionis diuersitate, diuersæ mistorum naturæ consurgunt.

33 **P**ORRO in mitione elementorum formæ non remanent illæfæ, ut Democritus & Auicenna arbitrati sunt; neq; secundum totum & qualitates & formæ corrumpuntur, ut sensit Alexander, Scotus, & Thomas; sed intenduntur, & remittuntur, ut perbelle sensit Auerrois.

34 **A**D faciliorem autem, & celeriore efficiendā mitionem cōducit diuisio. in minimas enim particulas diuisa miscibilia, & undique se inuicem  
contin-

contingentia celerius agunt, & patiuntur.

- 35 IN quorum elementorum mistione non æqualitas quo ad pōdus, seu quo ad gradus æquales, sed sufficit æqualitas quo ad iustitiam, ut cuilibet formæ misti, tanta sit elementorum proportio, quātam postulat forma misti.

## Ex libris Meteororum.

- 1 IN Meteorologica scientia, non ea quæ in sublimi producuntur, (a qua etymologia decepti fuere Olympiodorus, & Philoponus) sed ut latini & Auerrois, mista tum perfecta, tum imperfecta subiectum esse opinamur:
- 2 QUAE licet raro eueniant, & fortuita quædam entia in natura uideantur: non ob id a scientiarum consortio seiungenda sunt; neque de iis scientia habetur secundum suppositionem, ut dicunt Latini, sed simpliciter.
- 3 HABET quodlibet mistum duplicem parentem; cælum enim uicem patris, elementa uicem matris gerunt. quare haud immerito huic inferiori mundo annectitur cælestis superior, ut uirtus inde omnis gubernetur.
- 4 EMANAT autem hæc uirtus ex lumine, & motu, arithmetica in rebus naturalibus proportionem seruata; qua deficiente uniuersalis entium corruptibilium

bilium natura ad nihilum redigeretur:

5 QVAM proportionem si decuplam in elementis, aduersus Aristotelem non reperiri defendam, quæso, ne quis me arrogantia accuset, sed me magis ueritati, quam Aristoteli addictum esse diiudicet:

6 NEQVE tantum elementa proportionē seruant, sed inter sphæras cælestes, & elementa reperitur proportio, ut asserunt Astronomi, neque aduersantur philosophi; disputationis tamen gratia, nullam reperiri proportionem in cælestibus & caducis corporibus defendere conabor.

7 PORRO cum ex continuo cæli motu, & lumine elementa alterentur: euaporationes quædam ab aqua, & terra sursum tolluntur, quæ duplicis sunt generis; altera calida & sicca; altera calida & humida:

8 QVARVM quia leuior illa est, quæ magis ad naturam ignis accedit: ideo, ad aëris superiorem partem commigrabit; illa uero, quæ humida & calida est; iuxta maiorem, & minorem leuitatem modo ad mediam, modo ad inferiorem aeris regionem ascendet.

9 IUXTA has igitur uaporum, & exhalationum situationes aer in tres distinguitur regiones: in supremam, quæ hippocauma dicitur, & calida est, & sicca, & circulari motu uertitur, ut illorum Sa-  
cerdo-



cerdotum exemplo patet, qui semel in anno super cuiusdam eminentissimi montis cacumen characteres quosdam delineantes in puluere, quotannis eosdem reperiabant:

- 10 IN mediam, quæ frigida & humida est, tū quia calorem efficientia ab illa remouentur, tum quæ actu frigefaciunt ei applicantur: ibi autem incipit, ubi spatium reflexionis radiorum Solis terminatur.
- 11 ET quanuis radij Solis per illam transeant, radius incidentiæ non calefacit, sed reflexionis. ac inter radios reflexos, eos maiorem calorem causare asserimus, qui cum incidentibus radiis uniūtur, rectum angulum efficientes, cæteros autem magis aut minus, quāto magis ad illos accedūt.
- 12 IN postremam tandem regionem aer distinguitur, ex radiorum Solis reflexorum calefactione: est autem & ipsa, ut superior, calida, & sicca, tametsi magis impura, & crassa.
- 13 CVM igitur exhalatio, quæ calida & sicca dicitur, sua leuitate ad supremam aeris partem ascendit: ab illius regionis agitatione acceditur, diuersasque flammæ producit; hinc stipulæ, hinc dali, hinc stellæ discurrentes, hinc capræ saltantes.
- 14 QVÆ inter se non specie, non genere, sed sola materiæ positione distinguuntur. quare Albertus, & Seneca omnia flammarū genera connumerantes

72  
tes in re satis leuissimum operosi fuerunt.

15 **MOTVS** harum flammarum non uerus, ut uideatur rudibus hominibus, sed apparens existit: non enim, quæ stella cadens dicitur, mouetur, sed successiue noua generatur flamma.

16 **SI** uero a mediæ regionis frigiditate exhalationes huiusmodi expellantur, & in ea impulsione inflammantur: tunc illæ orientur flammæ, quæ a ueteribus Castor, & Pollux dictæ sunt, a nostratibus autem sanctus Nicolaus, & sanctus Hermes, quæ serenitatis potissimum sunt indicia.

17 **PORRO** si huiusmodi exhalatio crassior, tenaciorq; extiterit, ab eadem supremæ regionis circunlatione accensa, cometam efficiet.

18 **NON** est cometa una errantiû stellarum, ut Pythagoreorum fuit opinio; neq; plures simul coaceruate stellæ, ut Democritus, & Anaxagoras senserunt: sed exhalatio calida & sicca, crassa magis, in suprema aeris regione consistens, ab illius motu inflammata.

19 **COMETARVM** duæ sunt species: altera, quæ in superiori supremæ regionis aeris particula, in aduerso alicuius astri consistit ad illius motû circumlata, paululumq; ab illo motu deficit:

20 **ALTERA** est, quæ in aduerso alicuius astri non collocatur, sed uel in postrema, uel in media parte, regionis supremæ, (quælibet enim regio aeris

ris latitudinem amplam habet, secundum quam diuidi potest) & nullius stellæ motum imitatur, sed ad circularem illius regionis motum circumfertur.

- 21 COMETAM modo crinitum, modo caudatum, modo alia præditum figura conspiciamus ex materiæ positione; eademque ratione, modo rubeum, si ex uapore non ita crasso producat, modo nigrum, si nimia fuerit uaporis terrestris crassities:
- 22 HIC raro euenit; non enim simplicem Solis actionem requirit, ut cæteræ ignitæ exhalationes; sed Solis actionem, planetarumq; coniunctionem in debita ad terram appropinquatione:
- 23 INDE cometam, siccam anni constitutionem nobis ostendere, tum etiam uentos, procellas, inundationes nobis indicare, tum portendere incendia, populorum discordias, ciuitatumque euerfiones defendimus.
- 24 IIS accedit mala aeris temperies, ex qua nobiliora, delicatioraque corpora læduntur. quapropter tametsi omnium interitum portendat cometa: regibus tamen, & principibus mortem minatur; nisi forte id acciderit, quod regum mors ab hominibus obseruatur.
- 25 Ex hac eadem tenaciori & lentiori materia Galaxiam, hoc est circulum lacteum, constare opinatus est Philosophus, in qua opinione quia ho-



mo fuit, ideo labi potuit:

- 26 QVAM quidem Galaxiam neque cum antiquis philosophis cōbustionem a Sole in illa parte impressam, neque cum quibusdam aliis, lumen stellis aliis impertitum a Sole esse arbitramur, sed dēsiorem partem cæli substantificam, non ita densam ut stellæ, neq; ita raram ut cæteræ partes, ut perbelle sensit Philoponus.
- 27 QVARE si quispiam circuli lactei considerationem spectare ad Meteorologicum opinatur: a ueritate defecisse defendam. est autem uia lactea in orbe stellato Zodiacum interfecans, dum a pedibus geminorum incipit, in geminosque per principium sagitarij reuertitur.
- 28 ALTERA erat exhalatio, quæ calida, & humida proprie uapor dicebatur; huiusmodi ad mediam aeris regionem ascendēs, ab illius frigidityte coagulatur, in niuem, pluuiam, cæterasque frigidas impressiones conuertitur.
- 29 FIT pluuiæ si a mediæ regionis aeris frigidityte spissetur, in aquamque conuertatur. ualeat igitur opinio Theophrasti, qui a calidityte in montibus Arabiæ fieri pluuiam opinatus est.
- 30 VAPOR autem ille densior, & spissior effectus nubeseft, quæ medium est transmutationis aeris in aquam; sicut uapor medium est transmutationis aquæ in aerem.

- 31 HIC uapor, ex quo gignitur pluuia, quia facilius a Sole sursum tollitur, facillimeq; coagulatur: ideo sæpius pluuiam efficit, quam alias impressiones.
- 32 DIFFERENTIAE pluuiarũ uel a magnitudine sumuntur, uel a paruitate; hinc aliæ psecades, aliæ dicuntur labroteræ. inter quas quæ labroteræ dicuntur, hoc est magnarũ, rararumq; guttarum futuræ serenitatis prognosticum efficiunt.
- 33 ALIÆ sunt impetuosiores, aliæ minus; apprimè impetuosæ sunt pluuiæ post serenum tempus, quãdo caliditas ingens aeris compellit nubis frigiditatem; & huiusmodi pluuiæ ut plurimum sunt falsiores, ob siccæ terrestrisque exhalationis permissionem:
- 34 NEQVE tantum has dari pluuias defendo; sed etiam pluerè sanguinem, ranas, & alia animalia imperfecta, & lapides, ut scribunt historici.
- 35 PORRO ex eadem nube generatur etiam caligo. est autem caligo nubis sæculenta, & excrementosa pars, ex qua post pluuiam, serenitatis sumitur prognosticum:
- 36 HINC Albertum cognomento magnum hoc nomine honestandum non crediderim, qui caliginem nube rariorem esse defendit, eo quod a Sole citius resoluatur, cum eadem non sit nubis, & caliginis ad radios Solis reflexos distantia.

37 **I**N eadem regione aeris fit nix. est autem nix uapor a frigidity mediae regionis aeris congelatus, cum terrestri exhalatione permixtus.

38 **Q**UARE tametsi albicat ob multam aeris permissionem nix, denigrat tamen, ut communis experientia, & ratio attestatur.

39 **P**ER globos descendit nix; inter quos qui sunt maiores, maiorem in media regione frigidity indicabunt, & futurae serenitatis prognosticum efficient.

40 **I**N hyeme potissimum nix generatur, quanquam non in hyeme modo, sed etiam in aestate sustinebo; ut in montibus contingere saepius conspiciamus.

41 **V**T pruina niui, ita ros pluuiæ proportionem respondet: differunt tamen inter se, secundum maiorem, uel minorem frigidity, a qua producuntur, & secundum locum, in quo fiunt.

42 **G**ENERATUR ros & pruina ex uaporibus occidente Sole sursum latis; qui, cum ob caloris exilitatem non multum ascendant, a frigore occurrentis noctis spissantur.

43 **D**IFFERUNT ros & pruina, sicut nix & pluuiæ. si prius uapor congeletur, quam in aquam uertatur, fit pruina; si in aquam prius uertitur, quam congeletur, fit ros. quotidie uero huiusmodi mista imperfecta generantur, quoniam quotidie illis materia præparatur.

Postulat



- 44 **P**OSTULAT ros in eius generatione quendam aeris teporem; & ideo fit ros potissimum flante Austro; pruina uero requirit ingentem frigiditatem, quapropter flante Borea potissimum generabitur.
- 45 **Q**UOD si uapori huic calido & humido sicca aliqua subtilis exhalatio permisceatur: pro rore mel roscidum, siue ros syriacus generatur, ut in fœlicibus Arabiæ, Syriæq; oris: si uero halitibus exustis permiscetur ros, salso humore imbutus descendit, & segetibus occurrens exurit.
- 46 **L**OCVS, in quo pruina, & ros gignuntur, non est ultima aeris secundæ regionis pars, ut Albertus cognomento Magnus; sed inferior ista regio. hinc raro super montes conspicitur ros.
- 47 **A**LBI CAT non solum pruina, sed etiam ros ob multam increassati aeris permissionem, magis tamen pruina, quia multum lucidi aerei inculcatum habet.
- 48 **G**RANDO uero neutri istarum impressiõnũ per-  
similis est. non enim tantam nubis in aquam con-  
uersionem, ut ros & pluuia; neque uaporis con-  
gelationem, ut nix & pruina; sed tum nubis in  
pluuiam, tum pluuiæ in glaciem conuersionem  
requirit.
- 49 **Q**VAPROPTER decepti sunt antiquiores philo-  
sophi, ex coaceruatis pluuiæ guttis, simulq; con-  
gelatis

gelatis grandinem fieri opinantes. fit enim grando ex guttis pluuiæ descendentibus, dum singule a caliditate ambientis aeris per antiperistasin cōgelantur. quare in hyeme nullibi grando, in æstate raro, in autumno frequenter, in uere sæpissime generatur.

50 L O C U S generationis grandinis non est media aeris regio, ut Albertus Magnus arbitratus est; sed suprema ultimæ regionis particula: quam excedentes multi montes a grandine nunquam lædi conspiciamus.

51 E X cuius grandinis figura rationem loci, in quo genita fuerit, sumi potest. si enim erit rotundæ figuræ: in parte remotiori genitam esse fatēdum est. anguli enim in tam magno spatio collidūtur, & refranguntur. si uero ouatæ figuræ: in parte proximiori.

52 P O R R O non solum uapores calidi & humidi a Sole ab extimis terræ partibus, sed ab interioribus quoque terræ cauernis eleuantur: qui a lateribus illarum cauernarum frigescunt, frigefacti densantur, densati in aquam uertuntur, in aquam conuersi, percutientes cauernas illas meatum ad suum fluxum sibi parant. huiusmodi autem sunt fontes, & flumina.

53 O B id quilibet fons, cauernam aliquam, quæ sit suæ generationis primordium, requirit. huiusmodi

modi autem cœuernæ montibus potissimum subsunt. quapropter quilibet fluuius ab aliquo mōte scaturit, ut Aristoteles de Nilo, Hydaspes, & Tigris, & aliis testatur.

54 QVI Nilus ( ut de hoc tantum, cuius generatio latet, mentionem faciam, ) nulla alia ratione semel in anno nouum aluëum sibi parat, nisi quia a montibus Lunæ, siue argenteis, defluens, ex illorum montium niue colliquata, ita accrescit, ut ripis non contineatur.

55 HINC errasse Platonem & Plinium crediderim, qui fontes aquam esse pluuialem opinati sunt. ea enim existente, fontes quidem accrescunt; non existente, comminuuntur, non tamen ex illa tantum fontes defluunt.

56 FONTES per terræ uiscera decurrentes, sapore, quo infecta est terra, imbuuntur. hinc nonnulli sunt dulces, plerique amari, nonnulli acetosi, alij sulfurei, & bituminosi:

57 PRAETEREA aliqui sunt calidi, qui ex accensione illius, per quem transeunt, aluei, calefiunt, & Thermæ nuncupantur: aliqui tantæ sunt frigiditatis, ut quæcunq; illis sunt iniecta corpora, omni humore expresso in lapides uertant.

58 MOTVS fontium & fluminum naturalis est: fit uero modo rapidior, modo tardior, ex maiori, uel minori aluei decliuitate.

Defi-



- 59 DEFICIUNT porro flumina, & fontes ex planetarum, qui magnam æstatem efficiunt, coniunctione: generantur uero tunc, quando in aduersa parte, magna extiterit hyems. fit autem hoc multorum annorum curriculo. ex qua naturali ratione mare nostrum ADRIATICVM, aliquando desitutum coniiicimus. ubi enim nunc terra, olim mare; & ubi olim mare, nunc terra est.
- 60 HINC particularia fieri posse diluuiâ, quemadmodum etiam particulares fieri conflagrationes, Peripatetica philosophia admittit: uniuersalia uero tum diluuiâ, tum incendia sola fides nobis persuadet.
- 61 FERUNTUR uero naturali inclinatione quælibet flumina in mare. est autem mare omnium aquarum primordium & elementum. per mare autem neque Adriaticum, neq; Ligusticum, neq; Aegæum, sed Oceanum intelligo.
- 62 HUIUSMODI uero secundum Aristotelis principia nunquam cœpit neque desinet, licet continuo partes eius intereant, & gignantur. quantû enim mare ex fluminum decursu accrescit, tantum ex Solis calefactione decrescit.
- 63 SALSVM est mare, non ex falsis terræ sudoribus, ut antiqui; neque ex colliquatione salis montium, ut Plato; neque ex aluei falsedine, ut Theophrastus: sed ex halituum exustorum permistione, subti-

subtilioribus maris partibus resolutis. pon; am

- 64 QVOD si a terrestri halitu aqua maris segregetur: dulcis euadet. quare apud littora dulces aquæ, quia per arenam decolantur, undique scaturiunt. quod idē contingere arbitror in FAMOSO ILLO NOSTRI LITTORIS PVTEO, cuius licet aqua a nauis exhauriatur: nūquam tamen neq; multum accrescit, neque multum imminuitur.
- 65 FLVIT mare, & refluit. in cuius fluxus & refluxus assignanda causa Aristoteles obscurans suam sententiam, ueluti sepia atramentum nobis effudit. nec mihi, quæ a Platone, a Seneca, ab Alpe-  
tragio, ab Albumazar, a Linconienti, a Scoto, a Thoma, a Plinio, a Sueffano causa affertur, satisfacit: solam uero, quam Picus Mirandulanus posuit aduersus Astronomos, causam defendo; quam etiam Alexandrum attigisse crediderim.
- 66 NON est autem fluxus & refluxus cuiuslibet maris passio. Thyrrenum enim mare nunquam fluit, neque quod Charybdis, & Scyllæ mare dicitur; ex Bosphoro autem mare semper fluit, si expertibus accolis fides est adhibenda.
- 67 NON sunt uenti aer quidam motus, ut Seneca sensit: sed exhalatio sicca, & calida; tenacior quidem ea, ex qua ignitæ flammæ producuntur.
- 68 QVÆ exhalatio non suapte natura laterali fertur motu, ut Seneca; neque a generante, ut Sueff-

fanus; neq; a mediæ regionis frigiditate, ut Auerrois; neque immediate a cælo, ut Astronomi: sed a supremæ circumactæ regionis impetu deorsum deiecta, hæc laterali fertur motu, hinc loca quanto eminentiora sunt, tanto sunt magis uentorum flatibus exposita.

69 HANC ob causam cum sicca & calida sit uentus exhalatio: quilibet uentus calidus & ficcus erit; licet ratione locorum, per quæ transit, modo sit humidus, modo frigidus.

70 EFFICIENS principium uentorum est caliditas; materia uero ex qua generatur, est humefacta terra: quapropter in hyeme ob agentis defectum; in æstate ob materiæ inopiam pauci flant uenti; in fine uero autumnii impetuosius sunt; exoriente autem uere ualidissimi.

71 VENTORVM species licet undecim esse cum Aristotele defendere possimus, tum etiam duodecim: ad quatuor tamen insigniores, iuxta quatuor totius terræ insigniora puncta reducuntur. huiusmodi autem sunt Auster a meridie, Boreas ab Aquilone, Subsolanus ab oriente, Zephyrus ab occidente.

72 QVOS licet uulgaris hominum opinio sic distinguat, ut Boreas serenitatem, Auster uero procellas efficiat: ego tamen utrosque & serenitatē, & procellas efficere defendo.



- 73 FLAT a principio quilibet uentus exiliter; uerum tanquam per riuulos fons, aliis aduenientibus exhalationibus impetuosior fit; tantumque persistit, quantum impetus illi imperitus persistit.
- 74 ET licet Austrum ualidius flare, quam Boream, a terræ subiectæ magnitudine, a qua originem ducit Auster, subscripserit Aristoteles: ego tamen, licet Aristotelis opinionem defendam, eius oppositum disputationis gratia tuebor.
- 75 HUIUSMODI uero Boreas & Auster aduerso impetu spirantes sæpius conflictantur. quod si alterum alter deiecerit: tunc inundationes fieri periculosum est. ut de Achaia retulit Aristoteles, cuius duæ nobilissimæ ciuitates obrutæ fuerunt.
- 76 PORRO si huiusmodi exhalatio, ex qua fit uentus, uaporibus humidis & calidis inuoluta permisceatur nubibus: tunc ob eius cum nube inimicitias fulgur, tonitruum, corruscatio, & turbo efficietur.
- 77 EST corruscatio illius exhalationis in nube ob inimicitias reperiussæ accensio; tonitruum uero sonus in nube ex illa repercussione productus, non ignis in nube extinctio, ut ex antiquorum sententia in logica Aristoteles asseruit.
- 78 IN quibus impressionibus tamen si prius sit tonitruum, posterior sit corruscatio: ob celerem tamen uisus apprehensionem, prior uidetur corruscatio,

ruscatio; posterius tonitruum.

79. Ex percussione uaporis ficci in nube inclusi latera nubis percutientis tantum; sed non scindentis; sonus obscurus causatur sine corruscatione. si uero ex huiusmodi agitatione uapor ficcus nubem tum percutiat; tum scindat: terribilis generabitur sonus; & torruosa; micansq; corruscatio.

80. Si uero exhalationis in nube maior fuerit quantitas, a nubis frigiditate, non in diuersas partes distracta; sed tota simul expulsa, haud secus ac digitis ossa cerasiorum compellimus: fulgura generabuntur.

81. QVORVM motus lateralis neque simpliciter est naturalis, neque simpliciter uiolentus. est enim fulgur inflammata exhalatio a frigiditate nubis expulsa. inde uulgarium patet error, lapidem in quolibet fulgure quærentiũ; contingit enim hoc aliquando; sed per accidens.

82. EFFECTVS fulgurum semper in suas determinatas causas referendi sunt. fieri enim non est absurdum, ut sua tenuitate; flamma fulguris: meatus marsupij ingrediens aurum colliquet, illæso marsupio. quælibet enim actio determinatam postulat resistantiam.

83. Si uero huiusmodi exhalatio a frigiditate nubiũ expulsa non accendatur, sed per angustias nubiũ detrudatur: fiet turbo; qui terram percutiens; quæli-

quælibet occurrentia corpora sursum deorsumq;  
impellit.

- 84 Ex eodem exhalationum genere, sicco nempe, calido, crassiori; si a Sole in subterraneis locis eleuetur: terræmotus fiunt: est autem terræmotus exhalatio in uisceribus terræ conclusa, a se ipsa, cum in alieno sit loco, obstaculum remouēs, terramq; concutiens.
- 85 LATERALI motu hæc exhalatio non fertur, ut uenti, & fulgura; sed recto motu penes dominiū elementi, mouetur; tantoq; impetu, ut ciuitates euertat. quem impetum Sicilia, quæ olim cum Italia coniungebatur, manifesto indicat.
- 86 GENERATUR terræmotus frequētius noctu, quam diu; magisq; appetente uere, uel autumno, quam in æstate, & in hyeme, sicut etiam generantur uenti.
- 87 SI uero terra, in qua fit terræmotus, facile sit inflammabilis, quippe quæ uel sulfurea, uel bituminosa existat, in exhalationis agitatione inflammatur, ut patet de Aetna, & de Vesuuio mōte.
- 88 PRAETER hæc, quæ ex duplici exhalatione tum alterata, tum transmutata gignūtur, alia sunt, quæ epiphænomena dicuntur, hoc est, tantum apparentia, non autem existentia. huiusmodi autem sunt corona, iris, hiatus, & similia.
- 89 FIT corona non solum circa Lunam, & Solem, sed



sed etiam circa alia astra; & est uapor humidus rarus in nubeculas plures conuersus, per quas lumen astri transiens reflectitur.

90 EADEM quoque generatione fere fit iris, quando Solis inquam radij, seu Lunæ in nubem reflectuntur, in debita tamen ad intuentium oculos distantia.

91 HIATVS uero & uorago, ex irradiatione ignitarum exhalationum in subiecto uapore generantur, quæ accidente inter se differunt. ubi enim minus est lumini peruius uapor; ibi fouea conspicitur. quam causam obseruantes pictores hac sane ratione, antra; cauernasq; depingunt.

## Ex Quarto libro Meteorologicorum.

1 QVARTVS liber Meteorologicorum inter libros de generatione, & corruptione collocandus non est, ut Alexander censuit; neq; inter libros Meteororum, & libros de generatione medium locum obtinet, ut Themistius arbitratu fuit: sed priores tres Meteororum libros doctrinæ ordine subsequitur.

2 IN quo non de iis, quæ ex duplici constant halitu, pertractatur, ut Ioannes Philoponus existimauit;

mauit; neque de qualitatibus primis quatenus ad  
miftionem ueniunt, ut Alexander: fed de miftis  
perfectis, fecundum tamen fimilares partes.

3 GENERANTVR uero hæc mifta ex qualitatum  
actiuarum uictoria fuper paffiuis, quam definitio-  
nem incongrue, ( ni fallor ) interpretati funt, &  
Thomas de Garbo, & Gentilis .

4 TANDIV permanet miftum, quandiu humi-  
ditas caloris actione , ficcitati permifta , a na-  
turali caliditate regulatur . hæc autem elementa-  
ris eft; tametfi eam & animaleam & cælestem dici  
poffe, fufstinere conabor .

5 VTRVM autem frigiditas ad res generandas per  
fe naturæ fit ufui : aduerfus Galenum, & Auicen-  
nam miftorum quorundã generationi per fe con-  
ferre defendo . inaneque eft a Conciliatore inter  
Aristotelem, & Galenum adductum conciliũ.

6 GENERATIONI opponitur putrefactio, quæ cui-  
cunque miftio naturalis eft interitus; plantis, per  
arefactionem; animalibus per fenectutem. utrum  
uero aqua, aër, & ignis putrefcant, licet ab Ari-  
ftotele negentur putrefcere: hoc tamen difputa-  
tionis gratia aliquando contingere defendo.

7 FIT putredo, quando actiuæ qualitates a paffi-  
uis fuperantur . quod tunc accidit, quando ex in-  
nati caloris defectu humor una cum calore ab am-  
biente foras euocatur. hinc ex humefactis corpori-  
bus

ribus futuræ putrefactionis, aut inexistentis indicatio sumi potest.

- 8 **PRAESERVANTVR** uero mista ne putrescant, tum a frigidityte; hinc pauciora in hyeme putrescunt corpora, quam in æstate; tum ab iis quæ humorem exsiccant, meatusq; obstruunt, ut sal, & balsamum; tum etiam ab iis, quæ internum excrementosum humorem resoluunt, ut deambulatio, & balneatio.
- 9 **IN** eduçtione autem innati humoris, humor ex acçione putredinalis caloris sicco subtili ad exteriores partes permiscetur. ex cuius permissionis diuersitate, diuersæ animalium temperaturæ conflurgunt. hinc tot insectorum animalium differentia emanarunt.
- 10 **DIGESTIO**, quæ est quædam generatio, perfectio est a naturali calore proueniens in oppositis passiuis, quando humor superfluous a naturali calore resoluitur, & sicco permiscetur.
- 11 **QUAPROPTER** digestorum proprium est, ut se ipsis crudis crassiora & calidiora sint: non ea tamen ratione, ut Vgo Senensis, & Gentilis, & Thomas arbitrati sunt; quãuis nihil prohibet, quin oppositam opinionem tueri possimus.
- 12 **PORRO** cum oppositorum eadem sit ratio: indigestio erit imperfectio a frigidityte in oppositis passiuis. nec ob id Auicennam reprehensione



ne dignum existimò, qui indigestionem ab ingenti fieri caliditate arbitratus est.

13 SPECIES digestionis tres sunt, maturatio, elixatio, & affatio; quibus oppositæ tres respondent species. est autem maturatio digestio alimenti in pericarpio, quæ tunc fit, quando humor sicco permistus a naturali calore terminatur.

14 ET licet maturationem fieri a calido asserat Aristoteles: adiuuari tamen a frigido defendimus. hinc multa sunt, quæ nunquam maturescunt, nisi appetente hyeme.

15 FINIS maturationis perfectio est in planta, secundum quam planta sibi similem producere uolet. in digesto enim fructu quippiam reperitur proportione respondens formatiue uirtuti seminis, quæ a cælesti calore in actum redacta, plantam efficit: opposita autem cruditas a frigide semper fit, ut patet in umbrosis arboribus; quarum fructus sapore carent.

16 ELIXATIO concoctio est a calore humido, qui innatum misti humorem a centro uehit ad peripheriam. quapropter decipi medicos illos crediderim, qui ægrum inedia laborantem elixo auro in iure gallinaceo reficere student; cum omnino elixari, teste Aristotele, nequeat aurum:

17 HVC opponitur inquinatio, quæ a frigore humido producitur in oppositis passiuis. exiliter

M enim

enim agens calor imperfecte humorem a centro ad peripheriam deducit. hinc aquam dici nunquam posse elixatam, colligimus.

- 18 **ASSATIO** concoctio est, quæ a calido sicco efficitur alieno, dum meatus exteriores, ne humidum educatur, & a calore exsicceetur, obstruuntur. hinc assata interius humidiora sunt, elixata uero exterius.
- 19 **CONFERT** tamen nonnunquam ad assationem leuis quædam elixatio, ut humidum tenaciter hærens ad assationem disponatur. quod norunt coqui, quorum uirtus, teste Aristotele, magis in assandis, quam in elixandis edulijs conspicitur.
- 20 **CELERIVS** assantur edulia, quam elixentur. ualidius enim est agens in assatione, quam in elixatione. ad quam assationem reducitur frixio; tametsi ab agente calido, & humido fieri uideatur.
- 21 **PRAETER** huiusmodi misti affectiones, nonnullæ reperiuntur aliæ, quæ passiuas magis, quam actiuas elementorum qualitates insequuntur. hæc uero sunt durities, mollities, liquatio, congelatio, coagulatio, exsiccatio, & aliæ complures.
- 22 **EST** durum, quod tangenti secundum eandem superficiem non cedit; molle uero, quod cedit. quaresi quis aquam mollem appellare consueuit, eum decipi arbitrandum est.

23. **EXSICCABILE** illud est, quod uel aqueum, uel connaturalem aquam habet, nequit tamen aqueū corpus exsiccare, si omni caruerit sedimento; huiusmodi autem fit modo a frigore, per ingentem subtilium partium expressionem, modo a calido per earundem resolutionem.
24. **EXSICCATIONI** humectatio opponitur; quæ modo fit a frigore per subtilium & ærearum partium condensationem, modo a calore per congelatarum colliquationem.
25. **COAGULANTVR** a frigore aquea, licet horum uere non sit coagulatio, sed congelatio: quæ uero tum aquea, tum terrestria sunt, modo a frigore, modo a calore sicco coagulantur.
26. **PORRO** quæ tantum aquea sunt, licet coagulentur, spissari tamen nequeunt: quæ uero tum aquea tum terrestria sunt, simul tum coagulari, tum spissari dicuntur.
27. **INTER** ea quæ coagulantur, nonnulla sunt liquabilia, nonnulla liquari non possunt. non liquantur, quæcunq; a frigore fiunt incohærentes, & a calore coagulatione perficiente, ut lateres, uel contra, si tamē istorū super infusa humiditas euanuerit.
28. **UTRVM** autem liquabile sit ferrum, in qua re anticipitem Aristotelem inuenio: utranq; opinionem defendere polliceor; neque ob id Aristotelem errasse defendam.



92  
29] **QVÆ** autem liquantur, si a calido coagulata fuerint, a frigore liquabuntur; si a calido & sicco, a frigido, & humido. quod optime norunt Alchimistæ. contrariorum enim contrariæ sunt statuendæ causæ.

30] **HINC** flante austro, sales & nitrum colliquari cōspicimus. a sicco enim & calido coagulata fuerunt. in oleo autem liquari sales est impossibile; tametsi liquare nitantur ignari coqui:

31] **QVOD** quidem nitrū & sal licet facilius in aqua frigida, quam in calida, liquari deberent: facilius tamen liquantur in aqua calida, ut experientia docet, & ratio attestatur.

32] **INTER** colliquabilia, & coagulabilia oleum collocandum non est; tametsi rudibus hominibus tempestate celi frigida coagulatum uidetur, quod potius spissatum dicendum est.

33] **MOLLIFICABILIA** ea dicuntur, quæ habent humidum ductile super siccum diffusum, ita tamen ductile, ut a sicco ob meatuum clausuram separari non possit. huiusmodi sunt cornua, & ferrum, & alia id generis.

34] **HYMECTABILIA** illa sunt, quæ obliquos meatus habent. humidum enim iter peruium æquabiliter non habens madefacit, & non dissoluitur. quod si undique iter peruium habet: tunc dissoluitur, & liquabile dicitur.

Flectuntur

35 **FLECTVNTVR** illa, quorum potest longitudo in peripheriam, & peripheria in longitudinem commutari. hæc tenax humidum habent; ratione cuius humidi flectuntur; ratione uero tenacitatis in pristinam figuram retrahuntur.

36 **FRIABILE**, & frangibile differunt: quæ enim meatus, inter quos parvæ particulæ interiaceant, friabilia sunt; quæ uero magna habent interstitia, frangibilia nuncupantur.

37 **IMPRESSIBILIA** ea sunt, quæ tactu compressa recedunt in profundum, superficie indiuisa remanente. quare neque dura nimium corpora, ut lateres; neque humida nimium, ut lac, impressibilia sunt.

## Ex libris tum de anima, tum paruis naturalibus.

1 **C**VM scientiæ dignitas, uel propter rei demonstrandæ euidentiā, uel propter subiecti præstantiam iudicetur: scientia de anima summo honore, maximisque laudibus est efferenda, cum utraq; excellat nobilitate.

2 **NIHIL** igitur rerum naturalium est animastico subiecto nobilius, ac ne metaphysicæ quidem nobilitate cedit; quæ ars artium, & scientia scientiarum

tiarum appellatur; cæterorum philosophorum  
sententia prætermiffa.

3 E A præterea in tractatu de anima, demon-  
strandi est euidencia: ut in toto scientiarum ambitu lu-  
culentior reperiri nequeat; quanuis alia de ma-  
thematicis demonstrationibus circûferatur Auer-  
rois sententia.

4 P O R R O hæc scientia de anima usui est cæteris  
scientiis; scientiarum enim principia & dignitates  
illa corroborat, atque confirmat, neque particula-  
rium tantum, sed etiam ipsius Metaphysices, id  
quod, licet a communi Peripateticorum recedere  
uideatur opinione, ex sententia tamen Auerrois  
defendere tentabo.

5 S V B I E C T V M, circa quod uersatur liber de ani-  
ma, corpus non est animatum, cuius sententiæ  
fuit Scotus: sed est anima, in quam sententiam  
Græci, & Auerrois conuenerunt:

6 Q V A E porro anima numerus non est, ut Pytha-  
goras; neq; harmonia, ut Aristoxenus; neq; tem-  
peratura, ut Galenus: sed substantia; neque om-  
nis substantia, neque materia, neque compositum;  
sicut illi iudicant, qui animam uel ex igne, uel ex  
aere, uel ex aqua constare arbitrantur: sed est for-  
ma, aut endelechia nuncupata.

7 E S T igitur anima actus corporis physici orga-  
nici, potentia uitam habentis, non autem est qui-  
libet



libet actus, sed primus; neque tantum organica-  
rum, sed similium partium.

8 QVAE animæ definitio, tum uegetatiuæ & sen-  
fitiuæ, tum intellectiuæ congruit, non quidem  
uniuoce, ut Thomas, & Alexander opinati sunt,  
sed analogice, ut Auerrois optime sensit.

9 VERVM, quoniam non est anima tantum actus  
organici corporis, sed etiam dum utitur organo,  
principium in uiuentibus est operationum: haud  
incôgrue quispiam definiet animam, quod prin-  
cipium sit uegetandi, sentiendi, & intelligendi:

10 AD hæc, totius corporis apparatus finalis causa  
est anima. quare in triplici genere causæ reperie-  
tur, ut forma, ut efficiens, & ut finis corporis or-  
ganici.

11 HÆC porro neque loco, neq; subiecto distin-  
guitur: non enim rationalis in cerebro, nec ira-  
scibilis in corde, nec concupiscibilis in iecore, ut  
sensit Plato, & Hippocrates, collocatur, sed in qua-  
cunq; corporis particula.

12 ANIMA igitur tota est in toto, totaque in quali-  
bet parte, simulq; particula in parte; quanuis etiã  
medicorum & Platoniorum opinionem tueri  
possimus.

13 PER facultates uero, tanquã per proxima in-  
strumenta, suas exercet anima functiones; huius-  
modi autem facultates ab anima re nō distingun-  
tur,

tur, sed ratione, licet aliter diuus Thomas hac in re opinatus fuerit.

14. **QVARE** cum in qualibet animalium particula tota reperiatur anima: omnes quoque ibi aderūt facultates. quod tum in dissectis plantis, tum in insectis animalibus conspiciamus.

15. **SPECIES** animæ tres sunt, uegetatiua, sensitiua, & rationalis; quæ ordine quodam se consequuntur. ubi enim sensitiua, ibi uegetatiua; ubi rationalis, ibi sensitiua; rationalis autem a quacūq; est inseparabilis.

16. **VEGETATIVA** a sensitiua uirtute continetur, sicut trigonus in tetragono. & hac in re decepti sunt Platonici, qui has animas in animali realiter distinguī credidere.

17. **RATIONALIS** uero a sensitiua non est accidente tantum distincta, ut diuus Thomas opinatus est, & Christiana fides nobis persuadet: sed realiter distinguuntur in homine, si Peripateticam philosophiam profiteri uoluerimus.

18. **PORRO** uegetatiua, quæ cæteris animabus prior est origine, quia nulla cognitione præuia, secundum omnem conatum operatur, a Galeno inter naturales facultates iure collocatur.

19. **TRES** habet facultates uegetatiua, nutritiuam augmentatiuam, & gignitiuam. omnium uero finis est gignitiua. quare, si quis a fine uegetatiuam animam

animam definire studuerit, uirtus est, inquit, quæ animatum potest sibi simile producere.

20 **HÆC** in animalibus sanguine præditis potissimum in corde reperitur. perfectissimum enim ibi conficitur alimentum, & uerus sanguis absoluitur; tametsi Galenus, & Hippocrates alterius fuerint opinionis.

21 **IN** iis uero uiuentibus quæ carēt sanguine, qualia sunt imperfecta animalia, quales quoque sunt plantæ, in principe quodam membro uirtus hæc collocatur, quod animalium perfectorum cordi proportionem respondet:

22 **QVIBVS** autem fungitur operationibus uegetatiua, caloris instrumento fungitur; cui tamen uirtutes aliæ quædam famulantur, attractrix, retentrix, concoctrix, & expultrix, quarum læsionē exquisitè per excrementa dignoscimus.

23 **OBJECTVM** nutritiua est alimentum; quod quidem tale debet esse potentia, quale nutritum in actu; a principio enim reluctatur nutrito, deinceps per ulteriorem actionem fit ei simile, & alimentum uere tunc ultimum nuncupatur.

24 **EST** alimentum cuicumq; animatorum missioni proprium & familiare, ob temperaturæ cum alimento sympathiam. quod natura discernunt plantæ, id animalia per omnes sensus, præcipue tamen per gustatum uenantur.



- 25 PROXIMUM in perfectis animalibus alimentum non sunt humores, ut omnes sentiunt medici, sed uerus & syncerus sanguis, ut a cæteris humoribus distinguitur.
- 26 QVO quidem sanguine, non solum quæ sanguine prædita sunt membra: sed exanguia quoq; nutriuntur, ut cartilago, os, neruus; quæ falso spermatICA a medicis nuncupantur.
- 27 QVARE iure Auicennam accusandum esse crediderim, qui fame confecta animalia, nutrirī pituita, memoriæ mandauit; hoc enim per accidens est.
- 28 ALIMENTVM, ut superioribus membris nutriti corporis agglutinetur, superius mouetur. qui motus neque simpliciter ui, neque simpliciter natura factus est, ut sensit perbelle Auerrois, in quem rationes adductę a plusquamcommentatore nihil concludunt.
- 29 NVTRITIVAE uirtutis operatio, nobis a primordiis uitæ congenita, usq; ad interitum nos comitatur. calore enim deficiente, humidoque innato consumpto, eodem tēporis momento cessat tum nutritiua, tum uita.
- 30 NVTRITIVAM facultatem augmentatiua sequitur. nobilior autem est augmentatiua. cuius finis est, uiuens ad talem deducere magnitudinem, ut sibi naturales possit operationes exercere.

Obiectum

- 31 **OBIECTVM** istius facultatis cum obiecto nutritiue realiter conuenit, ratione distinguitur. huiusmodi est alimentum quantum, ut quantum est, cæteras conditiones habens, quas superius recensuimus.
- 32 **NEQVIT** autem fieri augmentatio, nisi aliquid extrinsecus assumatur. quare decepti sunt philosophi, qui augmentationem esse rarefactionem opinati sunt.
- 33 **EST** autem augmētatio motus ad quantitatem, qui continuus est, quod tamen in tertio physicorum negauit Auerrois; tametsi Auerrois sententiam tueri possimus.
- 34 **PRAECEDIT** uero generatio incremētum, cum tamē a generatione distinguatur. quare haud immerito ii sunt reprehendendi, qui per instantia fieri augmentationem opinati sunt.
- 35 **ID** quod per se augetur, uiuens est; quod idem a principio augmentationis, usque ad finem existit, & secundum partes omnes augetur.
- 36 **AVGETVR** uero secundum partes omnes, si secundum formam fieri augmentationem constituerimus. per formam uero non sunt organicae partes intelligendæ, ut Albertus; neque porrosæ, ut Parisienses: sed ueram de prædicamento substantiæ formam intelligere oportet.
- 37 **ERRAVIT** tamen hac in re Philoponus, qui for-

mam, fluente materia, permanere arbitratus est, quo modo permanet umbra in fluuio, decurrentibus aquis; quoniam falsum est, quod eadem in fluuio persistat.

38 FIT augmentatio a calore innato; qui si plus reficit humoris aerei, quā ab eo fuerit consumptus: tunc augmentationem efficiet; si minus, decrementum; si æqualiter, consistentiam.

39 ATQVE huiusmodi sunt uiuentium ætates non septem; iuxta septem planetas, ut astronomi arbitrantur; neq; quatuor, ut medici: sed tres, nempe iuuentus, uirilitas, & senectus.

40 HUMOR qui a calore instauratur, non qualiscunq; humor est, sed oleaginosus, & complexionalis, in quo calor depascitur. sed hic humor nunquam ualoris eiusdem est cum dissoluto; diluit enim instauratus humor radicalem, sicut aqua uinum:

41 QVARE aquosior in dies fit, & excrementosus, ut in senibus conspiciamus: quo statim consumpto, mors occurrit, quæ radicalis humoris est consumptio.

42 HUIUSMODI autem corruptibilium uiuentium miserta natura; cum indiuidua perpetuare non posset: generatione succurrit per speciē, id quod per numerum abstractæ mentes obtinuerunt.

43 QVAM ob causam parentes eos qui sunt minores



res natu filios maiori amore prosequi crediderim: cum in iis iuxta naturæ ordinem, se uitam nancisci diuturniorem confidant:

- 44 HÆC uero æternitas ab iis uiuentibus non magis comparatur, quorum generatio est continua, ab iis uero minus, quorum est interpolata ( ut Græci sensisse uidentur, ) sed ab iis quidem, quæ præter diuturnam ætatis periodum, uitam nobilissimam agunt:
- 45 GENERATIVÆ facultatis obiectum, est gignēti uiuens simile producere. hoc autem in iis contingit, quæ perfecta, & non orbata, neq; ex putri materia sunt genita.
- 46 PROXIMUM generationis principium semē est, non a quacunq; corporis particula decidens, ut Empedocles arbitratus fuit: sed ex postremi, & utilis alimenti excremento productum:
- 47 IN quo uirtus illa residet formatrix tanquam pitor, a Galeno creator nūcupata; quæ dū a superiori efficiente gubernatur, membra omnia effingit, atque conformat.
- 48 VIR actiue tantum ad foetus generationem concurrat, foemina uero passiue; quanuis Scoti, & Galeni opinio defendi possit, mulierē actiue concurrere.
- 49 MATERIAM generationis præbet mulier, hæc uero est menstruum, sanguis incoctus, & imperfectus.

fectus. ex quo frigiditatem in muliere, non caliditatem arguere debemus.

50 **FOETVM** modo marem, modo foeminā conspiciamus. cuius rei causa est seminis maior minorq; caliditas. caliditate enim mas a foemina tantum distinguitur.

51 **PORRO** arduum in Philosophia uidetur, quam ratione modo auis, modo proavis foetus assimiletur. de quo ferre sententiam dubitauit Galenus; accidere ex motibus tamen quibusdam, ut in respondendo dicam, crediderim, qui agnatorū omnium species referūt, in quibus si priores corrumpuntur, succedunt posteriores:

52 **SED** iam ad sensitiuam animam nostra se conuertat oratio; quæ animalium est forma, & potentia talis existit, quale est sensibile actu. cuius finis est salus animalium; in homine uero rerum cognitio, & iudicium.

53 **PRAECIPVVM** sentiētis animæ organum cor est: a quo, ut a fonte, sensitiuarum operationum riuuli emanant; quanuis cerebrum ad sensationē necessario concurrat.

54 **OBJECTVM** sensitiuæ facultatis est sensibile. quod cum sit materiæ inuolutum: ob id interstitium obiecti ad organum in sensatione necessario requiritur, ut expurgetur obiectum.

55 **SENSIBILE** igitur sensorio appositum nullam  
in

in sensorio motionē causabit; sensibilis uero species in quolibet medij puncto multiplicatur, ut congrue docent Perspectiui.

56 **I**N productione uero specierum deceptus fuit Gandauensis, & Gaietanus, cum sensum quendam agentem, ad sensibilibus species efficiendas introduxerint; qui non tantum non reperitur, sed si reperiretur, inanis potius esset, quam necessarius.

57 **R**ECIPITVR in sensorio quidem animato sensibilis species. ex qua receptionē sensus patitur, passionē porro perficiente, dum uero tali specie affecto utitur sensus, actiuus est. quare & actiuum, & passiuum esse sensum defendimus.

58 **S**ENSVM quidam interiores, quidam exteriores: exteriores sunt quinque, uisus, auditus, olfactus, gustus, & tactus; qui in perfecto tantum animali reperiuntur.

59 **S**ENSIBILIA uero, quæ a sensibus percipiuntur, triplicia sunt, propria, communia, & per accidens; circa quæ decipi sensus non contingit, si tamen seruet tres conditiones, ut inquit Themistius; nēpe organum bene dispositum, debitam distantiam, mediumq; uniforme.

60 **C**OMMUNIA sensibilia sunt quæ a pluribus sentiuntur sensibus. huiusmodi uero sunt quinque, motus, quies, magnitudo, numerus, & figura; ad quæ



quæ reducuntur illa, quæ Vitellio in sua perspecti-  
ua, se reperisse gloriatur.

61 CERTIOR, luculentiorq; est sensibilibum pro-  
priorum cognitio, quam sit communium. quâuis  
aduersus alios interpretes, uno tantum excepto  
Ioanne Philopono, communia luculētius a nobis  
sentiri, quam propria sustinebo.

62 SENSIBILIA uero per accidens propriis spe-  
ciebus sensum in organo non excitant, sed alienis  
sentiuntur.

63 IAM de particularibus sensuū operationibus uer-  
ba facienda sunt. in quibus sensibus pertractandis  
nulla prioritas, nulla posterioritas reperitur. quare  
tum Auicennam, qui a tactu exorditur, tum Ari-  
stotelé, qui a uisu inceptit, defendi posse censeo.

64 PERFECTISSIMVS inter cæteros sensus est ui-  
sus; quippe qui & plurimas rerum differentias  
nobis ostendat, & scientiarum inuentioni aptior  
sit; quanuis auditum quoque ad comparandas  
scientias maiori esse usui defendam. commodius  
enim cæcus, quam surdus scientias assequitur.

65 EST autem uisus potestate talis, quale uisile in  
actu est. cuius organum est oculus, qui non per  
neruos opticos, ut Vessalius; non per araneam, seu  
vueam tunicam, sed per crysalloidem, tanquam  
per principalem partem, suam exercet opera-  
tionem:

- 66 **I**N oculo tum aquam, tum ignem prædominari defendimus, qui constat pluribus, & tunicis, & humoribus. quarum tunicarum, quæ dicitur uvea, colore non est affecta, ut uisiva uirtus, ( ut opinatur Galenus ) in eius uisione recrearetur.
- 67 **N**E Q U E nervos opticos, qui spiritus sensorio deferunt, ea ratione coniungi, seu decussari mihi persuaferim, ut delatæ species in decussatione, ( quod arbitrantur medici ) cõiungantur. si enim disiuncti essent optici nerui, unitæ adhuc essent species.
- 68 **O**BIECTVM uisus neque color, neque lumē est: sed quidpiam innominatum; quanuis singula ista uere possint dici uisus obiecta.
- 69 **C**OLORES sensum non immutant, nisi medio illuminato. non est autem lumen corpus, neque corpusculorum a radios corporibus defluxus; sed actus & perfectio diaphani, quatenus diaphanum est.
- 70 **D**IFFERT autem a luce. qualitas enim est lux permanens & fixa luminosi corporis: lumen uero est imago lucis, spiritalis quidem, & momentanea.
- 71 **D**ECEPTVS tamen est Auicenna, lumen formā esse coloris, nullosque in obscuro dari colores arbitratus; quanuis refragante Auerroe, eius opinionem tueri possimus.

72. **LUMINI** opponuntur tenebræ, sicut priuationi habitus. non sentiuntur tenebræ per proprias species, ut existimauerunt Themistius, & Simplicius, sed per oppositum lumen. rectum enim est iudex sui & obliqui.
73. **DIAPHANVM** est quod a lumine perficitur, & per ipsum est uisibile; & ignotæ cuidam naturæ primo inhæret, per accidens autem, aeri, aquæ, & alijs corporibus.
74. **E**st diaphanum in actu a lumine redactum, colorum omnium delatiuum. colores sunt extremitates perspicui in corpore terminati.
75. **COLORVM** quidam sunt extremi, quidam sunt medij: extremi sunt niger, & albus color; medij, ut croceus, uiridis, cæruleus, purpureus, & alij huius generis.
76. **ALBUS** color, non ex magna luminis permistione, ut Albertus, & Auicenna opinati sunt; neque ex igne lucido, ut Auerrois: sed ex aeris incrassati permistione gigni crediderim; nigredinem uero ex opposita ratione.
77. **MEDIJ** colores non ex extremis in misto refractis existentibus generantur, ut arbitrati sunt Auerrois, & Gandauensis, sed ex sola uirtuali extremorum permistione. in quam opinionem uenerunt diuus Thomas, Scotus, Albertus, & Egidius.



187  
78 **COLORVM** quidam uisui iucundi sunt, quidam iniucundi: hoc autem ex maioris, uel minoris perspicui cum opaco permixtione contingit; iuxta quā modo magis, modo minus spiritus uisui disgregantur, aut congregantur.

79 **EX** coloribus autem temperaturam indicare, ut inquit Auerrois satis arduum est, tum etiam periculosum. albiora enim modo frigidiora sunt, modo calidiora, ut Aristoteles existimauit.

80 **IS** igitur præhabitis, quæ ad uisionem sumenda erant, de ipsa uisione dicamus. fit uisio nō per emissionē uisualis radij, ut perspectiui omnes, excepto Vitellione, arbitrati sunt; neque luminis, ut Plato; neque spiritus animati, ut Galenus; neque atomorum, ut Democritus: sed per simplicem specierum uisibilibus in oculo immixtionem.

81 **INTER** cætera uero animalia, quæ colorum differentias optime cognoscunt, unus tantum reperitur homo; quanuis nonnulla sint animalia, quæ ex rapina uictum sibi quæritant, quæ ob oculorū conformationem acutius perspiciant.

82 **OMNIVM** quidem animalium imperfectissimus uisus est in talpa, quæ sub pellicula latentes oculos habet, non ea sane ratione quam excogitauit Zimara, ob exilem caloris uirtutem, quæ exterius membrum illud expromere non potuit:

83 **SE** D, ut optime dixerunt Græci, tum quia non

100  
magnus illi fuit usus, sub terra uitam degenti, tum  
etiam quia nisi pellicula tegerentur oculi, a pro-  
minentibus durisq; terræ particulis obceçaretur  
hoc animal.

84 AUDITVS ad uisus naturam proximius, quam  
alij sensus nobilitate accedit, est autem auditus  
uis sensitua, organica, quæ sonos cognoscit.

85 HVIVS organum membrana illa non est, quæ  
*μινιγ* græce dicitur, aut nerui spiritus deferen-  
tes: sed quidam aer innatus membranam attin-  
gens, qui animatus existit:

86 QVI facillime a quacunq; leui impulsione mo-  
bilis est, quanuis eatenus immobilis quoq; dici  
possit, quatenus sonorum differentias percipit.

87 PLVRIBVS autem anfractibus tanquam mœnijs  
muniuit natura hunc aerem, ne ab ambientis ae-  
ris contrarijs qualitatibus læderetur.

88 OBIECTVM auditus est sonus. qui sonus non est  
percussio, ut Gentilis arbitratus est: sed qualitas  
percussionem consequens ex uehementi corpo-  
rum ictu.

89 SONATIVA dura quidem debent esse, lenia, &  
plana, seu concaua, & tremula, si diutius sonum  
ipsum retinere debent.

90 NON est autem percussus aer, qui sonum de-  
fert, cuius opinionis fuit Albertus Magnus: sed fi-  
xus immobilisq; quo species ad aures deferuntur.

Media

- 91 **MEDIA** autem deferentia, aqua, & aer sunt, quatenus in ea natura conueniunt, quæ a Theophrasto dicitur *σινγές*, id est medium sonorum; licet aliter senserint Albertus & Philoponus, qui in aqua fieri sonos negauerunt.
- 92 **E A** sane ratione sonus in medio gignitur, quæ regurgitationes in aqua ex alicuius lapidis projectu fieri conspiciamus; & hac in re bene sensit Auerrois.
- 93 **I N** hac autem regurgitatione reflectitur sonus, sicut in illuminatione reflectitur lumen: est autem reflexus sonus modo sensibilis, modo insensibilis.
- 94 **SONVS** reflexus est Echo, quæ fit ex aeris in obstaculum durum, & concavum repercussione; qui si orationis dearticulatione distinctus fuerit: distinctam orationem representabit.
- 95 **SONORVM** differentiarum duæ sunt, grauis & acutus, a qualitatibus tangibilibus per similitudinem desumptæ. sonus grauis multo tempore, pauca afficit sensorium motione; acutus autem pauco tempore magna afficit sensorium motione.
- 96 **PRAESTANTISSIMA** inter alias soni species est uox, quæ sonus est ex percussione expirati aeris ad uocalem arteriam, ab anima, ut quippiam significet, producta.
- 97 **INSTRUMENTA** uocis sunt trachea arteria, pulmo,



mo, palatum, & lingua, in quibusdam etiam animalibus dentes, & labra. hæc uero perfectissima reperitur in homine, cum suos nō solum affectus, sicut in cæteris animalibus, sed etiam conceptus exprimit; quare mentis interpret dicitur.

98 POSTULAT porro uox necessario expirationem; & ideo exanguia animalia, ut muscæ, cicadæ, & pisces, uoce carent; quanuis ex spiritu quodam ad diaphragma percusso in quibusdam sonus causetur.

99 EST inspiratio non solum ad uocem conficiendam animalibus usui, sed ad cordis calorē quoq; moderandum, fit autem hæc caloris moderatio in terrestribus animalibus per pulmones attrahētes aerem, in aquaticis per branchias attrahentes aquam.

100 EST igitur inspiratio motus pulmonis factus ab anima ad cordis refrigerium. qui motus neq; simpliciter naturalis dici potest, neq; simpliciter uoluntarius, ut Galenus opinatus est.

101 FIT inspiratio, quando externus aer intus suscipitur; expiratio uero, quando extra mittitur. cum quo expirato aere excrementa fuliginosa excernuntur.

102 EX pulmonis diuersitate diuersæ fiunt inspirationes. quædam enim animalia diutius absque inspirato aere uitam agere possunt, quædam minus.

nus. diutius absque inspiratione uiuunt, quæ sunt amphibia, ut ranæ, serpentes, aliaque id genus. maiores enim in pulmonibus anfractus, exilemque habent calorem.

103. **OPPOSITA** est auditui surditas. generatur autem surditas ob malam affecti organi temperiem. in quam si quispiam ab incunabilis inciderit; obmutescet; non autem e contrario, ut qui sint muti a naturæ ortu, sint surdi.

104. **AVDITVM** olfactus subsequitur. cuius organum non sunt caruncule mammillares; neque membrana iuxta cribrosum os cerebri perforata, ut Galenus opinatus est: sed nerui quidam expansi, pleni meatuum, qui ex inspiratione aperiuntur.

105. **INDE** perspicuum est deceptos fuisse medicos Aristotelem reprehendentes, quod existimauerit operculo claudi, & aperiri olfactum; cum apertos clausosque hos meatus nominauerit operculum Aristoteles.

106. **OBIECTVM** olfactus est odor, qui est qualitas ex ablutione sicci terrestris cum humido consurgens, per natiui caloris digestionem, sensum olfactus immutans.

107. **NON** est odor realis qualitas, in quam opinionem incidit Auicenna, sed spiritalis: quare falluntur, qui exhalationem esse odorem arbitrantur.

108. **MEDIA**, per quæ deferuntur odoris species, duo

duo sunt, aqua, & aer, quatenus tamen in natura quadā innominata conueniunt, quæ a Theophrasto dicitur *διοςμὸς*, id est medium odorum.

109 VTRVM quæ maiori sunt humore affecta, odora quoque sint magis, utranq; opinionem sustinendam polliceor, sed enim nitro est odorabilior, quia humidior, plantæ uero terrestres palustribus sunt odorabiliores, quia ficciores:

110 ODORIS species tot sunt, quot saporis; tametsi ob nostri olfactus intemperiem, uel sub amari, uel sub dulcis odoris specie quæcūq; olfaciamus, & hoc modo Galenum, & Theophrastum, & Aristotelem esse conciliandos existimo.

111 RATIO uero, propter quam idem odor uni suauis, alteri insuauis existat, non ad temperaturam, ut Theophrastus, & Galenus: sed ad spiritus dispositionem referenda est.

112 DIFFERENTIAE odorabilium duæ sunt, quædam enim per se, quædam per aliud olfacimus. odorabilia per se, solus homo, ut sensit Aristoteles olfacit, quanuis experientiæ, quæ bruta odores per se olfacere attestatur, uideantur esse in oppositum.

113 PERFECTVM animalia olfactum habent, quæ inter olfactum & cerebrum magnam habent intercapedinem, ut canes, fues: homini uero imperfectissimus est olfactus ob nimiam cerebri,

tum



tum propinquitatem; tum frigiditatem :

114. Nō nō obstat tamen quicquam, quinimmo id admittit Aristoteles, perfectissimum homini inter cetera bruta esse olfactum, & pantheræ odorem, quod non assentitur Aristoteles, ab eo percipi.

115. P O R R O si quis odorem nutrire crediderit, quam opinionem secuti sunt Galenus, & Hippocrates : deceptus iure dicetur. utilis tamen est odor, dum animi defectui succurrit.

116. G V S T A T V S est olfactu ignobilior, præstantior tamen tactu, qui ab Aristotele quidam tactus appellatur, non ea sane ratione, ut arbitratur diuus Thomas, quod interno utatur medio, dum suam exercet operationem : sed quoniam absque tactu fieri nequeat.

117. G V S T A T V S organum cor ab Aristotele diiudicatur; neque hoc dubitativè, ut Alexander arbitratur, sed ex proposito asseruit Aristoteles, tametsi etiam gustatum in palato, & lingua reperiri sustinendum sit.

118. G V S T A T V S obiectum est sapor : est uero sapor qualitas ex humido aqueo, sicco terrestri a caliditate digerente permixto consurgens, gustatum de potentia deducens ad actum.

119. S A P O R V M quidam sunt medij, quidam extremi. medii non ab extremis actu in mediis permanentibus gignuntur, quod opinatus fuit Theo-

phrastus, sed ex causis extremorum.

- 120 SAVORVM species ad septenarium numerum redigi possunt. in quo conuenerunt Aristoteles, & Galenus; errauerunt autem Plinius & Aui-cenna, plures adhuc saporum species esse asse-  
rentes.
- 121 EXTREMI sapon, ut opinatus est Galenus, sūt acidus & acris; ex Aristotelis autem sententia, dul-  
cis & amarus. ego utranque opinionem tueri co-  
nabor.
- 122 SAPONES quanuis maxime ad temperaturam accedant, ueruntamen nequit ex illis fieri iudi-  
cium. amara enim modo calida, ut absinthiū, mo-  
do frigida, ut opium. quāuis disputationis gratia;  
omnia amara esse calida, defensusus sum.
- 123 DVL CIS sapor cuicunque uiuenti tam fami-  
liaris est, ut solo dulci quælibet nutriantur uiuen-  
tia, licet aliter hac in re sentiāt medici, nutriri ani-  
malia solo sanguine negantes.
- 124 NEQVIT gustatus nisi humore saliali suam  
exercere operationem, quod perspicuum fit in fe-  
bricitantibus. ob id sagax natura glandulas quas-  
dam illi ad hoc munus obeundum construxit.
- 125 PERFECTISSIMVS inter cætera animalia inest  
homini gustatus, qui omnium saporum differen-  
tias solus cognoscit. rudis autem & imperfectus  
inest spongiis & ostreis; quibus ancipitem esse  
gustum

gustum sustinebo.

126 POSTREMVS inter sensus est tactus; qui ita necessarius ad esse animalis existit, ut eo posito ponatur animal, ablato auferatur. est uero tactus organica uirtus, qua tangibiles percipimus qualitates.

127 TACTVS organum non sunt, neque spiritus, neque cutis, ut uarie philosophati sunt philosophantes tum ueteres, tum recentiores: sed cor; quanuis & per carnem nos tangibiles qualitates sentire possimus.

128 MEDIVM specierum tangibilium deferens est nobis quoddam adnatum, seu internum, quod quanto magis ad ponderis equalitatem accedit, tanto species tangibiles melius defert.

129 FIT contactus penes tangibilium qualitatum excessum, uel defectum; ideo cui exquisita inest temperatura, inest perfectum tangibilium qualitatum iudicium; hoc uero potissimum inest hominibus, cuius usus conducit ad scientias adipiscendas.

130 DIGNOSCITVR uero hæc in hominibus nobilibus temperatura, ex mollitie carniū, si tamen laxa non fuerint, cuiusmodi sunt mulierum. hinc falso dicuntur melancholici sapientiores; hoc enim dum contingit, est per accidens.

131 PORRO ubi tactus, ibi quoque primarum qualitatū



litatum est apprehensio; ubi uero primarum qualitatatum est apprehensio, ibi sensus alimenti: ubi sensus alimenti, ibi fames & sitis.

132 **E**st fames sicci & calidi alimenti appetitus; sitis uero frigidi, & humidi. quæ oriuntur ex quadam in ore uentriculi inanitione, dum membra at uentriculo, tanquam ab officina, in qua præparatur alimentum, cibum expostulant.

133 **I**am superest de interioribus sensibus uerba facere; de exterioribus enim egimus, qui tantum sunt quinque; a quibus nulla potest reperiri qualitas sensibilis, quæ non apprehendatur.

134 **I**NTERIORES uero sensus non sunt unus, ut sensit Vgo Senensis; neque duo, ut Iacobus Parmensis; neque quatuor, ut Auerrois: sed tres tantum, communis sensus, phantasia, & memoria. in quam opinionem uenerunt Simplicius, Philoponus, & Michael Ephesius, & fortasse etiam Auerrois.

135 **O**bjectiæstimatiua, quam excogitauerunt Latini, inter sensus interiores non collocatur; cum nullus sit usus, neque necessaria in animalibus.

136 **I**NTERIORVM sensuum præcipuum organum ex Aristotelis sententia est cor; quanuis opinionem etiam Auerrois sustinere possimus, quod interiores uirtutes, tanquam ancillæ in propriis cellulis operantes in cerebro manifestentur.

137 **P**RIORE ordine inter sensus interiores est sensus

sus communis : ad quem exteriores sensus tanquã tabellarij suas species deferunt; ipse uero tanquã rex & iudex specierum sensibilibum differentias declarat.

138 COLLOCATVR sensus communis in centro, a quo plures protrahuntur lineæ ad exteriores sensus, qui diuersa ratione modo unus, modo plures dici possunt.

139 OBIECTVM sensus communis tum particularia, tum communia sunt sensibilia; quæ non solum sentit sensus communis, sed etiam diiudicat.

140 PRAETER hæc exteriorum sensuum operationem cognoscit communis sensus, neque ad hoc opus est opinione, ut Plutarchus arbitratus est, neque attentiuâ uirtutis ut Philoponus.

141 POSTERIOR sensui communi est phâtasia; quæ ex opinione & sensu non cõstat, ut Plato: sed motus est factus ab anima ab in actu existẽte sensu:

142 CUIVS uirtutis obiectum non sunt tantum sensibilia, quæ a particularibus sensibus sentiuntur: sed ea quoq; quæ a natura omnino fieri nequeunt, possibilia uero sunt phantasæ, dum suo arbitratu, quas uult imagines, connectit.

143 PRAESTANTISSIMA uero illius species est cogitatiua, quæ a phantasía neque ratione, neque re distinguitur, sed differt tantum ut species a genere.

Hæc

- 144 **H A E C** tantum in homine reperitur. est enim hominis forma dans illi esse, quæ & generatur & corrumpitur; licet aliter opinati sint Latini. quorum sententia quo propius ad christianam ueritatem accedit, eo magis ab Aristotelis philosophia recedit.
- 145 **P R O P T E R** hanc rationales homines nuncupantur, rerumq; particularium naturam perscrutantur. quare non ab re ab Aristotele passiuus intellectus appellatur.
- 146 **H A C** quidem antecellunt, qui perfectissima affecti sunt temperatura. contra uero irrationales fere uidentur homines, ad scientiasq; inepti, qui corpoream molem intemperatam habent.
- 147 **P O S T R E M A** est inter facultates sensitivas memoria, quæ in intellectu nullo modo reperitur, ut sensere Scotus, & Thomas, sed tantum in sensu.
- 148 **R E** a phantasia non distinguitur memoria, sed ratione; cuius obiectum est species rei præteritæ sensatæ. qua de re quæcunque differentias temporis non apprehendunt animalia, memoria carent:
- 149 **P L U R I M A** tamen sunt memoria prædita animalia, quorum quædam confusam habent, cuiusmodi sunt apes, muscæ; quædam numeris omnibus absolutam, ut homo:
- 150 **I N T E R** homines ij memoria præstant, qui consisten-



sistentem ætatem habent; pueri autem & senes segnus recordantur, tametsi nihil uetat, quin celerime pueri recordentur.

151 **FIT** obliuio, quando a memoria species undequaque elabitur. quod si aliqua ex parte fuerit species abolita: tunc per reminiscentiam recuperari potest.

152 **EST** autem reminiscētia restauratio imaginis, partim collapsæ, partim in memoria cōseruatæ, quā per obliuionem separatus fuerit imaginum istarum ordo.

153 **FIT** reminiscentia, uel a similibus, uel a contrariis, uel a coniugatis. ratio autem reminiscendi est ut in connexis catenæ annulis uno commoto cæteri mouentur: ita connexæ imagines se ipsas consequuntur.

154 **REMINISCENTIA** solum in hominibus reperitur; solus enim homo discurrit. inter homines uero, qui perfectiorem habent memoriam, segniores habent reminiscentiam; raroq; uni excellētes utrasque facultates natura tribuit.

155 **PORRO** cum quilibet sensus uirtus sit corporea, quæ in operatione defatigatur: ob id ad reficiendas sensuum uires, instaurandosque spiritus in uigilia consumptos, nobis a natura somnus datus est.

156 **QUI** somnus, ea sane ratione, qua in nullis ani-

animalibus sempiternus est, eadem etiam eius oppositum uigilia; quanuis ob breue somni interual-  
lum, quædā animalia semper uigilare uideātur.

157 **E**ST somnus animalium passio, non autem ui-  
uentium: ob id plantas dormire in hyeme, ut sen-  
sit Plato, non est admittendum:

158 **D**EFINITUR uero, quod uinculum sensus com-  
munis sit in primo sensorio, dum uapores a calo-  
re naturali eleuati, a cerebri frigiditate densati,  
meatus obstruunt, caloremque ad inferiora repel-  
lunt.

159 **Q**VI porro calor ita pulsus, atque ad intima  
uocatus perfectiores efficit digestionēs tādēmq;  
uapores eleuatos resoluit; quibus resolutis, exci-  
tatio fit a somno:

160 **O**B nimiam uero uaporum repletionem, ca-  
lorisq; exilitatem diuturniores efficiuntur somni,  
ut in gliribus, serpentibus, ceterisq; tesaurizatibus  
animalibus conspiciamus.

161 **E**X somno animalia sæpius somniis mouentur,  
quæ non sunt in sensu exteriori, neq; in sensu com-  
muni, neque in intellectu, neque in opinione, ut  
diuersi diuersa senserunt, sed in primo sensorio  
quatenus tamen phantasiatur.

162 **E**FFICIENTS somniorum est phantasia, quæ aliis  
quiescentibus sensibus, per imagines in illa exi-  
stentes libere uagatur, nobisque res ponit ante  
oculos,

oculos ita, ut dormientes illis fidem adhibeamus.

163. PRAESTANTISSIMA tamen nobis sese offert species animæ, quæ est intellectualis; secundum quam homines recti fiunt, diuinæ naturæ consortes, & intellectualis uitæ participes.

164. EST hæc anima tanquam rutilans quidam Sol, totum humanum orbem perlustrans, unicuique lumen suum largiens. quod si quempiam non illustrat: imputetur crasse, terrestriq; permissioni, non quidem illi.

165. PORRO singulis hominibus non inest singula intellectualis anima corruptibilis, ut sensit Alexāder; neque immortalis, ut Thomas, & Albertus: sed unica immortalis omnibus assistit. quam opinionem sicut Peripateticā esse sustineo: ita falsam & ridiculam secundum ueritatem, hoc est christianæ persuasionis principia, certo scio:

166. EST igitur intellectus æterna impassibilis intelligentia, licet aliter Aphrodisiensis arbitretur, postrema tamen est inter abstractas mētes. ob cuius imperfectionem, cum orbem secundum indiuiduum æternum consequi non potuisset; secundum speciem æternum consecuta est.

167. VERVM dum intellectus annectitur humano orbi a se ipso progreditur: in qua progressionē tantum quidem imperficitur, ut quæ sibi prius erant



ideæ, obliterentur; similisq; nihil depictæ tabulæ remaneat, possibilis tamen omnia fieri:

168 AD priorem uero fœlicitatē, ut dicunt Platōnici, reuertitur, dum quæ sibi oblitteratæ erant rerum omnium ideæ, a diuina luminis agentis irradiatione illustrantur.

169 C V I V S operationis principium actiuum non sunt phantasmata, quam opinionem Latini sequuntur: non enim phantasmata totalia, neque partialia agentia dici possunt ad species intelligibiles efficiendas.

170 S E D intellectus est agens, qui Deus non est, ut Alexander arbitratus est; neque re a possibili distinguitur, ut Gandauensis, qui ex possibili & agente, tanquam ex forma & materia fieri compositum existimauit: sed ratione tantum a possibili differt; cuius ea tamen est natura, ut omnia possit facere.

171 P O R R O quanuis non sint phantasmata intellectiōnis actiuum principium: necessario tamen in ipsa intellectuōne requiruntur. ansam enim præbent possibili intellectui, ut ad agentem cōuersus, ab eius lumine illustretur.

172 H I N C nullam fieri in intellectu nouam intellectuōnem, concludendum est; neque ob id scire nostrū est reminisci, cuius sententiæ fuit Plato.

173 N E Q V E particularia possunt ab intellectu ratione

tione ulla apprehendi, cum a quacunque; seiunctus sit materia, neque directe, neque reflexe, cuius opinionis Latini fuere, sed ab eius tantum ministrante cogitativa.

- 174 POSTQVAM vero beneficio agentis rerum omnium formis est exornatus: corrumpitur possibilis intellectus, totusque agens efficitur; in cuius intellectione idem est intelligens cum intellectu, ne, & intellectu; maiorque fit unio, inter intellectum & intelligentem, quam inter formam & materiam.

## Problemata Metaphysica.

I **M**ETAPHYSICA haud immerito ab Aristotele ars artium, & scientia scientiarum nuncupatur, quippe quæ tum ea considerat, quæ omnino sunt a materia seclusa, tum particularium scientiarum principia, si negentur, ipsa stabilire, & tueri potest.

2 QVOD si per possibile, siue impossibile huiusmodi abstractæ mentes tollerentur: tunc inter omnes scientias iure diceretur prima naturalis philosophia.

3 E S T Metaphysicæ subiectum substantia, licet nos non lateat, communem omnium philosophantium esse opinionem in metaphysica subie-

Aut esse ens, ut ens.

- 4 **CVIVS** entis uniuersalissima diuifio non est in substantiam & accidens: sed in sensible & in insensible; tametsi diuifionem entis in substantiam & accidens esse uniuersalissimā tueri conabor.
- 5 **SVBSTANTIA** & ratione, & notitia, & tempore, & natura est prior accidente. cum autem prior dicitur tempore, non de aliqua substantia intelligitur, hoc est, de Deo, ut exposuit Alexander: sed de materia, & de composito, ut optime interpretatus est Auerrois; cui tamen refragatur Scotus.
- 6 **DIVIDITVR** substantia in formam, materiam, & compositum. sed quod generatur non est forma, neque materia; sed compositum. hinc corollarie colligimus, posse defendi hominis animam secundum Alexandri principia esse immortalem.
- 7 **FORMA** est tota rei quiditas, ut optime arbitratus fuit Auerrois: sed materia subiectū potius dicenda est quiditatis, quam quiditatis pars; pace Scoti, & Latinorum hoc dictum sit.
- 8 **PRINCIPIVM** indiuiduationis non est materia tantum, neque forma tantum: sed forma & materia simul. sicut enim indiuidua forma indigent, ut per ipsam materiæ ligatam distinguantur, &, ut proprio utar uocabulo, hecheizentur: ita etiam materia indigent, ut per ipsam multiplicentur.

Verum



- 9 **VERUM** quoniam de substantia & accidente  
 uberius in problematibus logicis & naturalibus  
 egimus: ideo ad abstractas mentes nostra se con-  
 uertat oratio; quarum existentia a philosopho na-  
 turali tantū demonstratur, ut perbelle sensit Auer-  
 rois; non autem a metaphysico, ut credidere &  
 Thomas, & Scotus.
- 10 **NUMERANTVR** intelligentiæ ad numerum or-  
 bium. proprium enim quælibet intelligentia ha-  
 bet orbem, quem mouet; inter quem & orbem  
 determinata est proportio.
- 11 **EST** illa intelligentia præstantior, cuius orbis  
 proximior est primo orbi. penes primam enim  
 intelligentiam aliarum intelligentiarum perfectio  
 mensuratur.
- 12 **SUNT** omnes intelligentiæ æternæ, immateria-  
 les, & impassibiles; ex potentia, & actu constan-  
 tes, citra primam, quæ purissimus actus est.
- 13 **EST** autem prima intelligentia Deus optimus,  
 & maximus, qui intellectualis uita est, summe per-  
 fectus, summeque fœlix, a quo tanquam a quodā  
 summe bono, & appetibili, totius mundi natura,  
 uniuersiq; ordo dependet, & sine quo omnia rue-  
 rent, & interirent.
- 14 **A** CVIVS diuina sapientia, ita mundus inferior  
 connexus fuit mundo superiori: ut suprema infe-  
 rioris ordinis species coniuncta semper existat in-  
 fine

finæ superioris ordinis speciei. quapropter iuxta  
Homerum, aurea catena omnia colligata a Deo  
fuisse haud immerito dici potest:

- 15 DAEMONES igitur esse non intellexit Aristoteles. allucinatur ergo, qui illos ex eius mente asserunt;  
sed Christiana fide, quam imbibere non fuerunt  
digni peripatetici, illos esse constantissime credendum est: id quod & Platonici asseruerunt.

## Problemata Moralia

### Ex Ethicis.

- 1 **A**LITERVM est Philosophiæ genus, quod in  
actione consistit. hoc Socratem de cælo ad  
usus hominum traduxisse memoriæ proditum est;  
cum eos ab inanibus de sublimi altercationibus,  
ad animorum moderandas affectiones, reuocauerit.
- 2 **V**TRVM autem præclariùs sit, intellectum in  
actione, an in speculatione uersari: proculdubio  
contemplationem antiquiorem actione esse  
habendam existimo. siquidem exteriorẽ hominem  
ad interiorem ita colligit, ut proprio fine  
in se potiatur.
- 3 **A**CTIONEM uero maiori hominibus esse emolumento, fatendum est; cum pluribus ferat opem,  
&

- & deprauatam sensuum rationem corrigat.
- 4 SED nec, me hercle, huiusmodi ita sunt uiuendi rationes distinguendæ, quin sint quoque simul connectendæ; altera enim auxilio alterius indiget. non enim speculatiuus deprauatis moribus potest speculationi incumbere, neque actiuus agere, nisi aliqua in eo præfuerit speculatio.
- 5 MODERATVR autem actiuam uitam practicus intellectus; rerum omnium, quæ in actione uersantur, existens mensura; qui quidem subiecto & loco a speculatiuo non distinguitur, sed obiecto fine, & operatione:
- 6 HVIVS obiectum bonum est quod in actione uersatur: non enim speculatur scientiæ gratia, sed operationis; cui, tametsi particulares discursus componere ille nequeat: cogitatiua tamē minores ministrat propositiones, Latinorum hac in re opinione prætermissa.
- 7 PORRO duplex est bonum, alterum agibile, alterum effectibile: circa hoc operatrices artes, circa illud morales uersantur scientiæ, quarum subiectum humanæ sunt actiones.
- 8 QUAE cum uariabiles & mutabiles sint, pro natura rei ab illis demonstrationes petendæ sunt; æque enim esset absurdum si mathematicus suadere, atque si orator demonstrare conaretur.
- 9 QUI uero ad has scientias capeffendas, se præbere



bere uult idoneum, moribus equidem, tanquam agrum, cui semina credenda sunt, se ipsum excolere debet. secluduntur enim ab iis tum pueri, tum uitiosi homines, magis autem pueri, quibus etiam rerum deficit usus.

10 AGIBILIUM finem, quem propter se ipsum expetimus, & alia propter illum, (non enim omnia propter aliud optamus) perspicuum est, esse summu, atque optimum bonum; cuius cognitio multum ad rectam uitam instituendam confert: est enim tanquam scopus ante oculos sagittarij.

11 NON est autem summum bonum uoluptas, ut Eudoxus censuit, cum seruile quoddam sit, nobis & pecudibus commune; neque est honor, quem elegantes uiri sibi proponunt, hic enim magis in afficiente, quam in affecto uidetur esse; neq; sunt diuitiae, quae alterius gratia expetuntur: sed honesta est operatio in uita perfecta consistens.

12 MINVS autem sunt accusandi, qui honores, quam qui diuitias, aut uoluptatem summum bonum esse dixerunt; quippe cum honor testimonium sit uirtutis, quapropter tum in affecto, tum in afficiente, magisq; in affecto, quam in afficiente, quanuis Aristoteles hac in re dissentire uideatur:

13 STORICI uero absque calumniae nota recensendi non sunt, qui tantum uirtutibus tribuere, ut iis imbutus aliquis, tametsi omnibus fortunae telis afflictus,

afflictus, & in Phalaridis tauro constitutus sit: felicitate tamen potiatur: absurdum enim humana putauit ratio, in angustiis quempiam felicitate frui; licet & sit secus secundum fidem dicendum.

14 SED quauis commoueant nos animi perturbationes: non adeo tamen commouent, ut ex beato miserum quempiam reddere ualeant. quapropter & Stoicos tueri possumus; sufficiens est enim uirtus, quo quispiam uitam saltem miseram non agat.

15 VIRTUTIS tres sunt species, moralis, intellectualis, & naturalis; quauis naturalis uere uirtus dici non possit: nihil tamen uetat aliquam uirtutem tum moralem, tum intellectualem esse.

16 MORALIS uirtus non ex doctrina, ut intellectualis scientia, sed ex assuetudine comparatur; quæ nobis neque natura, neque præter naturam insita est, sed ad ipsam capeffendam secundum naturam sumus idonei; quauis & natura nobis uirtutem esse insitam defendere conabor.

17 PORRO incongruè moralem uirtutem definiunt Stoici, quod affectuum sit uacuitas; non enim est uirtuosi affectus tollere, sed moderari; nihil tamen incommodi sequetur, si tollere, pro Stoicis dicamus.

18 CVM autem tres sint passionēs in anima, potentia, secundum quam affectus suscipimus; affectus, qui

qui suscipitur; & habitus secundum quem boni uel mali nos sumus; uirtus ad habitus reducetur; cum peries illos tum laus & uituperium, tum bonos & malos nos fieri contingat.

19 **NEQUE** habitus quicumque uirtus est, sed in mediocritate consistens. uitij enim est defectus, & excessus. neque in quacunque mediocritate uirtus uersatur; non enim in arithmetica, sed in geometrica.

20 **PRAETER** hæc autem electio, & spontanea operatio ad uirtutem requiruntur. non enim, qui iusta agit, iustus est; sed qui sponte, & electione.

21 **EST** autem spontanea operatio, cuius principium est in ipso sciente singula, quæ agit: in spontanea est ex qua post actionem, dolorem, & poenitentiam sentimus.

22 **HAEC** uel per ignorancem, uel per uiolentiam fit. uiolentum id est, quod passio confert uim. utrum uero qui metu alicuius mali, quippiam dedecoris perpetraverit, uel damnum aliquod acceperit, sponte, uel nolens id fecisse dicendus sit: ego neque sponte, neque nolentem hunc egisse sustinebo.

23 **QUI** uero per ignorancem quippiam facit, neque postea se fecisse dolet, sponte non fecit, quod nesciuit, neque rursus inuitus, doleret enim utique.



- 24 **ELECTIO** non est uoluntas, cum non sit impossibile; neque concupiscentia, cum molesti, atq; iucundi non sit: sed spontanea est eorum actio, quorum & consultatio præcessit; & in nostra sunt potestate.
- 25 **CONSULTATIO** uero non de iis, quæ casu, aut necessitate eueniunt: sed quæ penes nos sunt, & ad nos spectant. est autem consultatio, rationis inquisitio, qua aliquid certi de rebus dubiis acquiritur: hinc de æternis nemo consultat.
- 26 **DIFFERT** consultabile ratione ab eligibili, id enim; quod consultando cæteris prætulimus, eligibile dicitur; quod prius ante rem deliberatam, dicebatur consultabile.
- 27 Ex iis porro colligimus, quod uirtus habitus sit electiuus, recta ratione consistens in mediocritate geometrica, nempe quo ad nos.
- 28 **VIRTUTIS** species quatuor sunt, fortitudo, temperantia, iustitia, & prudentia: ad quas reducuntur tum quæ circa pecunias, ut liberalitas, & magnificentia; tum quæ circa honores, ut magnanimitas, & modestia; tum quæ circa usus hominum, ut ueracitas, amicitia, & comitas.
- 29 **FORTITUDO** mediocritas quædam est; cuius extrema sunt ignauia, & audacia. non autem circa quemlibet timorem uersatur fortis; quædam enim sunt, quæ metuere humani est, & uerecundi;

- & non metuere impudentis; cuiusmodi uidetur  
esse dedecus.
- 30 **P**AUPERITAS forsitan metuenda non est; neque  
morbus; neque illa; ut unico uerbo dicam; quæ  
neque ab improbitate, neq; a nobis proueniūt.
- 31 **C**YMI autem circa summum in uno quoque ge-  
nere uersetur uirtus: circa summum terribile con-  
sistet fortitudo, hoc uero mors est; neque genus  
omne mortis: sed quod ob honesta pericula pro-  
pter bonum aliquod potissimum in bello con-  
tingit.
- 32 **Q**UANTVIS absurdum esset; si uita priuari fortis  
uir cuperet; cum se maxime dignum uita conspi-  
ciat: non ita tamen dolore afficietur, quin hone-  
stam mortem ceteris bonis, quæ sibi adsunt uiuen-  
ti, proponendam censeat.
- 33 **Q**UINIMMO cum propter honestatem agat: iu-  
cunditatem in acquisito fine percipiet; quanuis  
a præuiis doloribus, ut quæ multo sunt sudore par-  
tæ uictoriæ, uoluptas illa satis obscuretur.
- 34 **F**EROCES ij sunt; qui ante pericula ualentes  
existunt; dum adsunt, non sustinent: fortes autem;  
cum ad rem peruenerunt, feruidi sunt, ante rem  
quieti: desperantes uero, qui cuncta formidant.
- 35 **T**EMPERANTIA circa dolores, & uoluptates  
consistit, neque circa omnes, sed corporis tantū;  
neque circa quascunque corporis, sed tactus, &  
gustus,

gustus. quid autem circa uoluptates olfactus? quid si circa omnes?

36 DIVERSIMODE tamen fortis, & temperans uersantur circa dolorem: ille, quæ sibi officiunt, leniter fert: hic, quæ sibi uoluptatem non afferunt, æquo animo sustinet.

37 HINC magis accusandus intemperans, quam timidus. molestius enim est obiectum dolor, quàm appetitus uoluptatis; cum labefactet ille naturā: hæc tantum allicit.

38 TEMPERANTIAE repugnat insensibilitas, & intemperantia; magis tamen aduersatur intemperantia. quas enim ad res natura sumus procliuiores, hæ sunt magis contrariæ medio. cuiuslibet enim insitus est uoluptatis appetitus; quapropter raro insensibiles homines reperiuntur.

39 VIRGINITATEM Deo gratissimam nunquā satis laudarem, quæ præstantissima est uirtus: Aristoteles autē huius ueritatis ignarus ad insensibilitatē retulit, & impie inter peccata collocauit.

40 CIRCA dandam & accipiendam pecuniam media est liberalitas, magis tamen in danda, quam in accipienda consistit. ille enim honesta agit: hic a turpibus desistit.

41 Iuxta fortunas compensari debet liberalitas, non enim in multitudine donorum, sed in dantis habitu uersatur. quare sæpius minora donantes munera



munera, liberaliores sunt.

42 ANIMADVERTERE debet liberalis, quibus, quantum, quomodo, & quando donet, hoc est, quod honestis uiris, quod quantum fuerint opes, quod alacri animo, quod honestatis grātia donet, non magnificiens pecuniam, nisi quantum ad honestas actiones obeundas usui sibi est.

43 LIBERALIORES ij sunt, qui ab aliis acquiras opes, quam qui suo labore comparatas, largiuntur; magis enim isti eas diligunt, quoniam sua industria congesserunt; sicut magis quoque amore prosequitur artifex opus propriū, ut poetæ magis suum poema diligunt, quam oratores suas orationes.

44 EXTREMA liberalitatis, auaritia & prodigalitas sunt. magis tamen auaritia liberalitati, quam prodigalitas repugnat. prodigus enim multis prodest, auarus ne sibi quidem ipsi. ille facilius curari potest, huius uero salus fere desperanda est.

45 PRODIGVS sæpenumero contingit, ut auarus quoq; sit: a multis enim plus, quam oportet, quod iure quaq; iniuria accipit, ut aliis ipse plus, quam oportet, effundat.

46 PRODIGORVM donationes liberales non sunt: quoniam interdum honestis hominibus nihil tribuunt; assentatoribus autem, & uoluptatem afferētib; quamplurima profundunt.

Magni-

- 47 **MAGNIFICENTIA** circa magnos sumptus ex proportionē agentis ad passum consistit, ita ut & sumptus opere, & opus sumptu dignum sit; uel potius sumptus excedat, quam deficiat.
- 48 **MAGNIFICVS** pari sumptu præclarius opus efficiet, quam liberalis. splendorem enim, & excellentiam operis spectat, ut omnes trahat in sui admirationem.
- 49 **MAGNIFICI** sumptus gradum habent: quidam enim nobiliores, ut publici, & inter publicos Deorum cultus: quidam priuati, ut epulum, nuptiæ, hospitia, & alia id generis.
- 50 **RATIONEM** debet habere magnificus personæ, diuitiarum, & sumptus, ita ut persona diuitijs, diuitiæ sumptui, sumptus personæ respondeat; & præter hæc honestatis, non ostentationis gratia magnificus agat.
- 51 **SORDIDVS** est qui magnis sumptibus in re leui abutitur: modicus, qui in magnis rebus a sumptu abstinet.
- 52 **UTRVM** autem pauper magnificus esse possit, cum magnos efficere nequeat sumptus: aduersus alios expositores utranque tuebor opinionem.
- 53 **MAGNANIMVS** is est, qui magnis se dignum existimat honoribus, cum dignus sit. est enim magnanimitas ornamentum aliarum uirtutum, & sine illis non consistit.

- 54 **MAGNANIMVS** cum summis honoribus a præclaris uiris afficitur: lætatur mediocriter; in aduersis uero, & secundis rebus moderate se habet:
- 55 **NON** osor, non maledicus, non rerum admirator, non ad beneficia accipienda, sed ad collocanda promptior est magnanimus, id semper, quod perfectissimum est in quacunque uirtute sibi ante oculos proponens.
- 56 **PVSILLANIMVS** est, qui cum magno sit dignus honore, nullo tamen se dignum putat. quare aberrat, cum iis bonis, quæ meretur, se ipsum priuet; nequit tamen malus dici, cū nemini malefaciat.
- 57 **TVMIDVS** & inflatus sui ipsius ignorās est, cum, tāquam dignus, plures suscipere posse prouincias sibi persuadeat, quas tamen sustinere non potest; minus tamen malus est, quam pusillanimus. hic enim in quocunque opere ob eius ignauiam torpere, ille uero nimis feruere uidetur.
- 58 **MODESTVS** is est, qui cum paruis sit dignus honoribus, se ipsum quoque dignum paruis existimat; differtque a magnanimo sicut magnificus a liberali.
- 59 **MANSVETVDO** est mediocritas circa iram; magisq; circa defectum, quam circa excessum consistit. mansuetus enim potius clemēs, quam uindex uideri uult.
- 60 **QVI** non irascuntur in quibus oportet, nec quando



quando oportet, nec aduersus quos oportet, stupidi sunt, uidentur enim neque sentire, neque dolere.

61 CUM mendacium per se improbum sit, ac uituperatione dignum, & ueritas proba, & laudabilis: utique mendaces sunt uituperandi, magisque ostentatores.

62 QUI magis quam oportet, risum mouere student, scurræ uidentur esse; qui uero neque iucundum aliquid dicunt, neque dicere patiuntur, rudes & agrestes nominantur.

63 IUSTITIA duplex existit: altera uniuersalis, secundum quam res iustas agunt homines, & hæc nobilissima est uirtutum; uirtutes enim continet omnes, quæ sunt ad alium; & legalis appellatur, quoniam leges secundum quamlibet uirtutem actiones nostras dirigunt.

64 PARTICULARIS iustitiæ duæ sunt species: una quæ in distributione consistit, uel honoris, uel diuitiarum, uel ijs similium, quæ diuidi possunt inter eos, qui in ciuili societate uitam degunt;

65 ALTERA est iustitia, quæ in commercijs hominum corrigendis existit: quorum quædam sunt uoluntaria, ut emptio, uenditio; quædam inuoluntaria: quorum aliqua sunt clandestina, ut furtum, fraus, dolus; quædam ui facta, ut mors, rapina.

66 **IUSTITIAM** tum distributiuam, tum correctiuam, dum rerum seriem, & naturam speculantur philosophi, nacti sunt; inuentam uero rebus particularibus applicare, aspernati sunt: sed negotiosis uiris, cuiusmodi sunt iurisperiti, eam reliquerunt.

67 **DISTRIBVTIVA** cum æquitas quædam sit, & ad aliud referatur: necessario in quatuor saltem minimis terminis reperietur: qui non musicam, non arithmeticam, sed geometricam inter se feruabunt proportionem.

68 **CORRECTIVA** uero, cum non personarum dignitates, sed æquationem lucri & damni refarcire uideatur: in arithmetica uersabitur proportionem. quid si ad geometricam? quid si ad personarum dignitatem spectare dicamus?

69 **IUS** alterum naturale, alterum est legitimum: naturale est id, quod ubiq; eandem habet uim, fundamentumq; est omnium legum; sicut dignitates sunt demonstrationum; nec distinguitur a iure gentium, licet aliter iurisperiti hac in re senserint:

70 **LEGITIMVM** ius esse dicitur, quod nihil referebat ab initio, hoc uel illo modo fieri; postquam autem lata est lex, multum refert.

71 **PECCATVM** non est in lege, neque in legislatore, sed in natura rei, de qua uniuersalis haberi non potest

- potest sermo: quapropter corrigenda est ipsa lex,  
quod utique faceret, si legislator adesset: 77
72. HÆC autem emendatio legis in aliquo parti-  
culari, quod est a legislatore prætermis-  
sum, equitas nuncupatur, quæ in Venetorum iudiciis potif-  
simum floret.
73. VERVM enimvero cum uirtus habitus recta ra-  
tione consistens sit: iam quid recta sit ratio, aperia-  
mus: in qualibet enim uirtute rectam rationem  
tanquam scopum sibi proponit studiosus. hæc au-  
tem cum in intellectu reperiatur: iam de habiti-  
bus, qui in intellectu consistunt, uerba faciamus: 87
74. QVINGVE sunt uirtutes, quibus intellectus as-  
sentiendo, aut dissentiendo percipit uerum: ars  
scientia, prudentia, & sapientia, & intellectus. 88  
utrum autem prudentia inter intellectuales, an in-  
ter morales uirtutes collocanda sit: disputandi  
gratia utranq; defendo opinionem.
75. SCIENTIA syllogismus est demonstratiuus, de  
qua latius supra meminimus: ars habitus est, recta  
ratione factiuus eorum tum quæ possunt esse &  
non esse, tum quorum principium est in fa-  
ciente.
76. ARTIFICIS munus est, sine concepto media ad  
illum consequendum excogitare, deinde opera-  
ri, postremo formam inducere, quæ primo fuerat  
in eius mente excogitata. hoc autem fit, aliquid



subiecto uel addendo, uel minuendo, uel subiectum transmutando.

77. **PRVDENTIA** habitus est uerus cum recta ratione & appetitu; qui in iis agēdis uersatur, quæ sunt homini bona uel mala: quapropter in iis, quæ aliter se habere non possunt, nulla contingit haberi prudentia.
78. **PRVDENTIS** uiri est bene consulere posse circa illa, quæ sibi & aliis bona, & utilia sunt; cuius conferuatrice est temperantia. ex uoluptatibus enim labefactatur iudicium.
79. **INTELLECTVS** habitus est principiorum, sapiētia intellectus est & scientia, ac uelut caput habēs, inter alias scientias exactissima est.
80. **CONSULTATIO** bona, quæ pars est prudentiæ, non scientia, non coniectatio, non opinio: sed relictitudo est consilij circa bonum, per quod oportet, ut oportet, & quando oportet.
81. **SAGACITAS** quoque circa idem uersatur, circa quod prudentia; quanuis prudentia inueniat, sagacitas uero diiudicat. est autem sagacitas bona quædam intelligentia eorum, quæ a prudentia reperiuntur.
82. **ALIA** quoque pars est prudentiæ, quæ sententia dicitur; differt autem a sagacitate, quod illa tantum diiudicat, hæc uero tum diiudicat, tum corrigit, si opus est.

Neque

83 NEQUE tantum hæ partes dicuntur prudentiæ, sed quælibet quoque uirtus, cum recta agendi sit ratio, prudentia sibi opus est, ita ut ubi illa adsit, cæteræ adsint; parique ratione; ubi aliqua aliarum desit, & illa cum cæteris desit. connexæ enim sunt simul uirtutes Herculeo nodo, ita ut dissolui nequeant.

84 ACQVIRITVR autem hæc recta ratio, magis rerum usu, quam demonstrationibus. hinc pueri potius mathematici, quam prudentes euadunt. adipiscimur enim, ipsa docente experientia, oculum quendam, uirtute quadam affectum, quo præterita obseruamus, præsentia scimus, futuris prouidemus.

85 INCONTINENTIAE, atque immanitati continentia, atque heroica quædam uirtus opponitur. quemadmodum autem raro cõtingit uirum quempiam esse heroem: sic immanem quempiam inter homines raro prouenire, est uerissimile. contingit immanem quandoque, uel ex morbo sæuo, uel ex uitiosa natura, uel ex consuetudine.

86 INCONTINENS sciens quod praua sunt, propter cupiditatem tamen ad ea declinat. continens autem sciens quod cupiditates prauæ sunt, eas propter rationem non sequitur: ambo autem circa uoluptates, & dolores uersantur, sicut temperati; quanuis ij quidem elegant, illi uero non.

- 87 **FIERI** non potest, ut unus & idem incontinens simul & prudens sit. uersutum autem nihil prohibet esse incontinentem. ex quo fit, quod prudentes uiri nonnunquā incontinentes appellantur.
- 88 **VO LVPTATVM** quædam uehemēter amplectendæ, ut quæ honestæ; quædā fugiendæ, ut corporeæ, circa quas intemperans uersatur.
- 89 **PRAETER** hæc autem ad beatitudinem numeris omnibus absolutam confert amicitia. nemo enim est, qui solus cunctis bonis abundans, possidere ea sine amicis eligeret.
- 90 **TRES** sunt amicitiarum species; quapropter totidem erunt amabilia: quarum duæ secundum similitudinem amicitiae nuncupantur, uoluptuosa, & utilis: alia propria, & præcipua, qua boni uiri pari uirtute coniuncti sunt.
- 91 **INVENITVR** hæc amicitia in ijs, qui inter se paritate, & æqualitate pollēt. aliud autem genus est, quod in excellentia cernitur; qualis est patris cum liberis, uiri cum uxore, & principis cum subditis; atque horum inter se amicorum diuersæ sunt amicitiae.
- 92 **AMICITIA** & dilectio differunt: nam similis est dilectio affectui, amicitia habitui. amici enim bona uolunt, & non secundum affectum, sed secundum habitum.
- 93 **BENEVOLENTIA** amicitiae similis est: differunt tamen



tamen penes hoc, quia beneuolētia extenditur ad ignotos, non autem amicitia.

94 BENEVOLENTIA amor non est: non habet enim intentionem, & desiderium; sapissime tamen ex iucunda amantium consuetudine, amor repente fit beneuolentia.

95 Iis omnibus acquisitis, tunc dispositus est intellectus, ut perfectissima in uita perfecta operatione fungatur; hæc autem est diuinæ mentis illustratio,

96 SECUNDVM quam ad Dei naturam quammaxime accedimus; quinimmo ei amicissimi euadimus. qui si aliquam rerum humanarum curam gerit, quam secundum ueritatem Christianam certissime gerit: consentaneum est, eum gaudere optimo, & sibi cognatissimo uiro, qui sapiens est.

## Ex Oeconomicis.

1 VERVM, quia ad societatem natura fertur homo: (solitariam enim uitam agens homo, aut Deus est, inquit, aut bestia) ideo de societatibus humanis dicamus. huiusmodi uero tres sunt, nempe domus, pagus, & ciuitas.

2 Ex homine & seruitute domus constituitur, ex domibus pagus, ex pagis ciuitas. domus est societas

tas in uitam, & utilitatem quotidianam, a natura constituta, quæ non ea ratione a ciuitate distinguitur, quod domus ciuitas parua sit; ciuitas uero, magna domus: sed quia utrisque diuersus est tum usus, tum gubernandi ratio.

3 CIRCA hanc autem quotidianæ uitæ societatem uersatur œcōnomicus: cuius finis est, ut nihil rerum familiariū, quas humana fert necessitas ad temperatā liberalēq; uitam ducendā, sibi desit.

4 TRES uero ad quotidianam uitā requirūtur societates, uidelicet uiri cum uxore, patris cum filio, & domini cum seruo. inter quas maxime naturalis est uiri cum uxore; cuius scopus est filiorū procreatio, non tantum ut id acceptum naturæ referant homines: sed ut inde cōmoda capiāt.

5 EX hac autem uiri cum uxore societate, maximam utrique consecuti sunt utilitatem. cum enim uterq; sibi non sufficeret: eos natura sagax & prouida matrimonio coniūxit, ut quod alteri deesset, id alter suppeditaret.

6 AD huiusmodi uero communem utilitatē comparandā, diuersa quidem illis a natura sunt conformata corpora. mollior est uxor, ut domi ad munera sua aptior esset; robustior est uir, ut foris commodius sua negotia gereret.

7 PORRO utriusque interest proli consulere: sed uiri partes sunt, liberos erudire, mulieris uero alere,

alere; ad utrosque spectat rei familiaris curam habere: sed uiri officium est extra limen, matura cōsultatione opes augere; mulieris uero domi sedulitate haud illiberali, opes partas a uiro conferuare:

8 **PRAETER** hæc uiri munus est, cui a natura mulier socia uita est coniuncta; ex cuius sedulitate ipse uel ad literarum studia, uel ad Rēpublicam gubernandam otium nanciscitur, ut ad illius usum is leges sibi imponat, ut iis tanquam uallis uim suam coerceat, ne ex ciuili gubernatore tyrannus euadat.

9 **RECTE** autem ab Hesiodo illud institutum est, puellam uxorem duci oportere, ut bonis moribus a uiro imbui possit: dissimilitudines enim nequaquam conciliant animos.

10 **UIR** uxore iniuria afficere non debet, alioquin iniuriam pateretur, non faceret. uir autem uxori iniuriam facit, alienum torum sollicitans. tanto enim magis mulier studebit se castam sobriamq; præbere, quanto cognouerit se ardentius a uiro diligi.

11 **CASTVS** etiam & temperans sit uiri cum propria uxore congressus. adsit in uerbis pudor, in operibus probitas, & honestas, in cōsuetudine fides & moderatio.

12 **QVOD** si a proprio scopo deflectat mulier: non

**T** morosus



morosus obiurgator: sed iuxta criminis mensuram facilis illi sit uir admonitor. nihil enim est, quod maiori sit ad rem tuendam impedimento, quam uiri cum uxore sub eodem tecto dissidium.

13 PROBA uero mulier, statim in connubio mores uiri tanquam suæ uitæ leges a Deo sibi fuisse impositos existimare debet; quibus nisi obtemperabit, ultorem putet fore Deum.

14 QVINIMMO perinde uiro morigerā se præbere debet, ac si emptā domum uenisset. magno enim emitur pretio, dum ad societatem uitæ filiorūq; procreationem uocatur. mirifice autem hoc mulier consequetur, si non tantum uiro morem geret: sed etiam illius uoluntatem præuenire studebit;

15 NEQUE hoc secundis rebus tantum, quibus bene uti haud est difficile: sed etiam in aduersis (nisi quippiam dedecoris, aut per amentiam, aut per ignauiam perpetrare illā uir coegerit,) suam animi celsitudinem, si æquo animo illa pertulerit, conspicuam futuram prospiciat, seq; inde immortalitatem consecuturam.

16 IN re uero familiari tuenda, mulier domi tanquam dux apum in alueari, ut inquit Xenophon, operam suam nauet, seruis officia distribuat, eos qui extra facturi sunt opus, emittat, alijs illa præsit, importata accipiat, atque recondat, instauranda

randa reficiat, quæ sunt esui, iuste deprompta par-  
tiatur:

17 **LOCVMQVE** suppellectilibus omnibus oppor-  
tunum constituat, ut unico intuitu, & quæ salua  
sunt perspiciat, & ut paratis rebus (ut fert neces-  
sitas) facilius uti possit.

18 **PRAETER** hæc intelligat proba mulier pulchrio-  
rem se a natura conditam fuisse, ut formam cum  
pudicitia se domi continendo tueretur: dedecere,  
sicut fictos mores, ita fictas corporis partes ha-  
bere. quare absit a muliere fucus, ne a natura, quæ  
longo sunt examine membra conformata, illa suo  
arbitratu corrigere uideatur.

19 **SVMPTV** quoque & uestitu minori etiam utatur,  
quam leges ciuitatis patiantur. maiorem enim af-  
fert decorem mulieri modestia, & moribus exor-  
natus animus, quam formæ excellentia, corpo-  
risque ornatus.

20 **EST** secunda societas patris cum filiis. nobilissi-  
ma autem parētum cura est filios tales erudire, ut  
senectutis sint pastores, parentum optimi custo-  
des, domusq; totius conseruatores.

21 **EX** morigera autem educatione hæc omnia fa-  
cillime comparantur. recentia enim uasa diutius  
odorem, quo semel imbuuntur, seruant. ad hanc  
igitur educationem omnes parentum conatus in-  
tendantur.

22 **ULTIMA** est societas domini cum seruo, quæ naturalis existit in ijs, in quibus tanta est diuersitas, quanta est inter corpus & animam; quanuis sæpius rerum uicissitudine contigat, ut serui gubernent, domini seruiant.

23 **PRAESTAT** seruus uiriũ robore, dominus uero ingenij acie; utrique tamen mutuam sibi tradunt operã. est uero seruus domini instrumentum animatum actiuũ separabile, qui instrumentum etiã instrumentorum dici potest; si enim inanima instrumenta ad nutum domini mouerentur, seruis non indigeremus.

24 **SERVORVM** duæ sunt species, curator, & opifex. huiusmodi autem, neque nimium timidi, neque nimium fortes esse debent: nam & nimis timidi non ferunt laborem; & ferocibus non cõmode imperatur. quare domini officium est, ut neque superbos, neque nimium abiectos efficiat seruos.

25 **SED** quia tria sunt, opus, cibus, & castigatio: ideo cibus quidem sine castigatione & opere petulantem reddit seruum; opus uero & castigatio sine cibo uiolenta res est. restat igitur, ut dominus opus seruo faciendum tribuat & cibum, ui merces illi sit, non sine tamen castigatione.



## Ex Politicis.

- 1 **C**IRCA nobilissimam societatem uersatur politicus; huiusmodi autem est ciuitas: quippe quæ illius gratia cæteræ existant societates.
- 2 **E**ST ciuitas perfecta societas ad bene beateque uiuendum; ciuis uero est qui gubernandæ ciuitatis est particeps: & proinde tum qui perfectam ætatem adhuc non habent, tum qui senio confecti sunt; uere non sunt ciues dicendi, cum a publicis muneribus uacent; sed illi quidem immaturi ciues, hi uero nimium maturi dicentur.
- 3 **P**ERSPICVVM etiam illud est, communem hominum opinionem esse falsam, cum eos diiudicet ciues, qui ex ciuibus parentibus oriuntur: huiusmodi autem nisi ciuitatis muneribus fungantur, tanquam profugi in eorum ciuitate appellandi sunt.
- 4 **I**DEM munus, atq; eadem debet esse uirtus tum probi ciuis, tum optimi uiri: utrisque enim prudentia opus est tanquã regula, qua suos moderantur actus. quare idem quoque ciuiliſ scientiæ, & prudentiæ erit habitus, licet ratione distinctus.
- 5 **I**NDE patet sordidos artifices, & qui mercenariã uitam agunt, ciues non esse appellandos. neque enim institutione, & exercitatione florere uirtutum.

tum, quare neque ciuili scientia; tametsi ad usum  
quotidianum sint necessarij.

6 **E**ST uirtus ueluti corpus animatum, cuius uita  
est Respublica: est autem Respublica ordo, & di-  
stributio circa omnes magistratus.

7 **S**P ECIES Reipublicæ tres sunt: Monarchia, Ari-  
stocratia, & quæ cōmuni nomine Respublica di-  
citur; hoc est Regia gubernatio, Optimatum, &  
Popularis: his autem oppositæ species sunt Tyrā-  
nides, Oligarchia, & Democratia:

8 **I**NTER has species quænam præstantior sit,  
difficile est in medium afferre sententiam: ar-  
bitror tamen quod, si quis inter homines tanquam  
Deus reperiretur, heroica uirtute præstans, ut in  
nostra Republica Illustrissimus LAURENTIUS  
PRIOLEVS, tunc nobilissima diceretur Monar-  
chia. multitudo enim principum, ut inquit Ari-  
stoteles, bona simpliciter non est: sit unus ergo  
princeps.

9 **S**ED quoniam huiusmodi tanta excellentia uir  
raro inueniri potest: ideo ad Reipublicæ duratio-  
nem accommodatior est Aristocratia. ex pluribus  
enim hominibus, particulam uirtutis habentibus,  
fit unus homo, qui est simpliciter bonus. quapro-  
pter perspicuū inde est Rempublicam Venetam  
diuinissime esse institutam, cum ex Monarchia, &  
Aristocratia conflata sit.

Mode-

- 151
- 10 **MODERANTVR** Respublicæ legibus, quas tunc optime latas arbitramur, quando optimi Rempublicam administrant; illisque cuncti obtemperant, & absque ciuili discordia permanet imperium. ex iis causam afferre possumus, quare Respublica Veneta tandiu permaneat.
- 11 **VTILIS** est in recte instituta Republica, ut ex scriptis legibus, quam ex iudicis, licet probi, sententia lites dirimantur. lex enim nulla animi perturbatione afficitur, neq; unquã perueri potest.
- 12 **SI** uero deficiat, lex tunc illam iudex ad legislatoris sententiam corrigere debet; neque ad hoc unicus constituatur iudex, sed plures. melius enim pluribus, quam unico oculo conspiciamus.
- 13 **SED** tamen si corrigendæ sunt ciuitatis leges: non sunt tamen immutandæ, licet ex earum abrogatione, aliæ meliores sancirentur. multo enim minus mutatæ leges ciuitati profunt, quam infirmata legum uirtus illi nocet. lex nanque nullam habet uim, nisi a tempore; mos autem nisi longitudine temporis fit.
- 14 **OPTIME** uero illa se habet Respublica, quæ non tantum optimis legibus instituta est: sed cuius bonum est ius. ius autem est, quod paribus paria, imparibus imparia confert. & hæc secundum proportionem æqualitas, ciuitatis iure dicitur fundamentum.



magnæ fuerint, ut uicinos ad bellum inferendum alliciant, neque ita paruæ, ut bellum sustinere non possint; neque tantum in Republica mediocris fortunæ possessio laudatur, sed etiam in ciuibus. difficile est enim tum qui opulentissimi sunt, tum qui pauperrimi, ut rationi pareant.

- 21 MAXIMUM etiam bonum in ciuitatibus est amicitia. omne enim sæuum odium in ciuitate contingit ob ciuium discordiam, uel propter honorẽ, uel propter cupiditatem habendi; huic autem refragatur amicitia.
- 22 FILIOS autem communes habere, ut tollantur discordiæ, nullo modo ciuitati est usui, ut opinatus fuit Socrates, sed maximo est damno. quoniam magis dissiderent ciues, magnaq; in ciuitate oriretur socordia:
- 23 CONFERT tamen ad ciuitatis institutionẽ pueros bene esse institutos, tum etiam mulieres. sunt enim mulieres media pars hominum liberorum; ex pueris uero deliguntur, qui ciuitatem gubernant.

FINIS.

21

BIBLIOTECA NAZ.  
ROMA  
VITTORIO EMANUELE.

BIBLIOTECA NAZ.  
ROMA.  
VITTORIO EMANUELE.

21413